

Eqmaro Ke Ebeq sáhnsahwe ahtebé ehwehne.

Árúkaga ebeq sóteh arámbéhriéna anehe wega Pora kérena séhréh atena púku áwíq Árúkae ue sehiranúwe. Anehenura mah pukú Eqmaro Ke pukúe ue sehiranúwe. Sísaga miraéna irarú ehwehnsábé ebeqte pukúgá teíre. Manikáne Awanka miraú arámbéhri Eqmaro Ke pukúgá teíre. Sísaga eqmaro kega pokue mó kehiná suwahpeq mó kehiná suwahperue Sísa éhwéh koreríúwe. Teríútaq Manikáne Awanka se págege aritena séhréh aritowara áhnte kegá sene ehweh irera Sísansabé aiq pútare atówe. Mi ehwéhnká abae agúwara Sísa tagaríah ké áhnte úkuwe. Mah pukúípéqté éhwéhnká minayabeákáq eqmaro kega mirau arámbéhriákáqsábé teíre.

Eqmaro kega miraunsabé éhwéhne.

Sísaga, Manikáne Awa eqmaraníe ú ehwehne.

¹ Tíópírasao, néne sehiramé kawerue sáhnsahwe iro. Menah tanáhráq mó pahsí sehiranue áwátáuge. Mi pahsiípéq moke Sísaga miraúnsabe sehiranue teawena wega íwáhnorúnsabeakáq teawátáuge.

² Wene arambehri áhwárótaqkakáq íópeq kiu tanáhráqsábéákáq teawátáuge. Wega marakóipeq míotaq wehuke eqmaq suanieéna omaq sitowe.

Manikáne Awanka Sísa iwíáh atowana wega íópeq kinaútaq omaq sito ke síwáhnorúwe.

³ Téhwe Sísa awankátaq táhpague pukéna anehe oga úkéna mó wehekáh mó wehekáhnue omaq sito keba sényéena wewe sokigi aritowara tagowe. Tagowana 40 wehekáh miraéna Manikánka wah-nah wahnahnirabeqte éhwéh teriuwe.

⁴ Mi tanáhráq sega momiwíuriótaq Sísaga mahraréna, Sarúsarama suwahpeq apubúue sueq pokiyehboq Nániboga eqmarahna aní tuinayabé wensabé áwénunoro. Menah Nániboga eqmarahna aní éhwéh teiyátáuge.*

⁵ Naho Sóniga wání meriuwana Manikáne Awanka áhníbórá tunse iteba mía míainkehe úwe.

⁶ Mó tanáhráq eqmaro kega momiwíuriótaq sega Sísansabé kasenéra, Ísara ke iteitene marakóraq amahnága wahnahnoro aitaníbo uwe.†

⁷ Uwana Sísaga sensabé, Nániboga moke mi tanáhráqkákáq wéhékáhnakaq wahnahnire. Minawé íre iteitene arambehri puaq itega mi tanáhráqkákáq wéhékáhnakaq íre tagariáhwe.

⁸ Minawé íre tagarawéq mahraue tagariagehe. Manikáne Awanka iteba tuinaraq ite págege aitah-naq itega íné éhwéh mah kehiná kékíná korerigéhe. Sarúsarama suwahpeqte kéreq moke mó Súria marákórápéqté kéreq Sámária marákórápéqté kéreq moke mah kehiná kékíná korerigéhe úwe.

* **1:4:** Sísaga eqmarahna anímé Manikáne Awa mire. Árúka 24.49, Sóni 14.16-17, Eqmaro 2.33 tagáhno. † **1:6:** Sísa marakóipeq tutaq Aroma kegá Ísara kené marakó págegeue wahnahnuwara áhnte kegá iwíáhéra, Wega Aroma ke kaqsuena iteitensabé, Wahnahnoro aitankéhe íwíáhuwe.

*Sísa íópeq kibekú ehwehne.**(Máhka 16.19-20; Árúka 24.50-53)*

⁹ Mah kehiná kéhíná korerigéhe úwana eqmaro kega tagotaq Sísa tumerowana íópeq kire írabúyápipeq kibekúwe.

¹⁰ Kibekúwara sega íópeq awahnkanue tagariówara taberábe korósíákáq ánítégá iriwe míoye.

¹¹ Iriwe méra sensabé, Kehrari marákórápéqté kéo, aneqsabé iriwe méq íópeq ebitiaho? Sísaga ite iuwena íópeq pokiraq tagahwe. We amahnága pokinserah mókake tuinawire uye.

Súrásane arambehri awaq mio ehwehne.

¹² Uyara eqmaro kega Óríwi sawéhrápéqté tunse Sarúsarama suwahpeq wahtotaq tueaguwe.

¹³ Tueagéra sega kaegaeu nah abobórähpeq kíúwe. Sensíwíqmarimé mahraue Píta, Sóni, Sémísi, Ehntaru, Pírípi, Tómáhsí, Pátórómíyu, Mátíyu, Ápiásane ahninkáwá wenáwíq Sémísi, ebeh ehwéh iriaréh ání wenáwíq Sáímóni, mó Sémísine ani wenáwíq Súrása mirauega kíúwe.

¹⁴ Sereq Sísane ábákawaréhreq wenanoreq mó inínsónseqka sirupipeq peh morá íwíáhue moráráq púreq aruqaruruwe.

¹⁵ Mó wehekáh sega mirautaq 120 ke áhnte Sísa tagariáh kégá momiwíuriówe. Pítaga iriwe ména mahraréna,

¹⁶ Nánuwahraho, naho Manikáne Awanka Tébíti iwíáh atowana Súrása éhweh sehiranúwe. Súrásaga Sísane naruo kowerironsabe mi sehirá aiq pútaraguraire.

17 Sísaga Súrása omaq atowaq Súrásareq itereqka moráráq arambehriuraune úwe.

18 Súrásaga Sísane naruo kowerironsabe móne meyowara mi monéráté marakó paiqmárówe. Súrásaga sáwéhrapeqté ayahqno maraipérue surahúwana wene ayahba tapoagúwe. Wene ayahba tapoague wene ayamári pehrápeq sahagúwe.

19 Wega miraúnsabe moke Sarúsarama suwahpe-
pte kégá irera mi marákoyábé áwírumé sene ehwéh Ákérámae atówe. Mi awíqmé Korahq Marakóe atówe.

20 Pítaga Súrása éhwéh mó mahraréna, Buk Songipeqté éhwéhnká aiq mahraréna,
Wene mátabu susa matábú kanae. Mó kegá mitaq
íre míáhro arito ire. *(Buk Song 69.25)*
Mi ehwéhnká mó mahraréna,
Mó anínká wene arambehri awaq miankéhe ire.
(Buk Song 109.8)

21-22 Sóniga Sísa wání meawátáitaq táhmaro kegá Sísa kétówe. Segá kékérue Sísaga oga úkuraitaqkákáq íópeq kiraitaqkákáq tagarowe. Mó ke Sísa éhwéh terigeheeéq mina tahnsa Sísa kékéri aní iwíáhue omaq atanéhe úwe.

23 Pítaga mi ehwéh teriuwara segá téhraníté omaq sitówe. Mó aní wenawíq Máhtíásae. Mó aní wenawíq Sósépae. Sósépawe we mó awíq Pásábae. We mó awíq Sásátae.

24-25 Segá mahrarue púreréra, Itene Wahnahno, arega ómi kehináné sirupipeqté íwíáhwé aiq tagariahne. Arega eqmatona arámbéhri Súrásaga aiq suena ahbabárorabeq pokuraire. Wene

arambehri mirainkeheé arega omaq atahna aní sokigi aio éra púreruwe.

26 Manikánka omaq ato aní taganeheéra sega káriq ebáh tuparuqme tagéra Máhtiásawe Súrásane arambehri mirainkehe atówara we Sísa kéró ke, airápétē morá kéréq arambehriúno átowe.

2

Manikáne Awanka tu ehwehne.

1 Asiu kené siahreraq ko tanahráq áwíq Péntíkósie.* Ebeqte wehekáh sutaq Sísa tagariáh kégá moke peh morábí sáhuríowe.

2 Sáhuríowana íopeqté éhwéhnká anotah soíríqká uu inserahnúwara ómi nahupeq tútuue mío kega apubúue írówana

3 anehbí irobina tahnsá náneqmarí ábóraragúwara tagowe. Tagowara irobina abae ague mó anípá mó anípánue abae agúwe.

4 Manikáne Awanka sirupipeq tuména iwíáh arito púara sega mó kehináné kambare ehweh iraruwe.

5 Mi tanáhráq áhnte Asiu ke mó kehiná mó kehiná su wahpeqte Sarúsarama su wahpeq sewíowe. Mi ke Manikánsabe iwíáh íwíáh atáh ké wóe.

6 Segá mi ehwéh irera sega morábí sáhurawéra írówarawe Sísa tagariáh kégá mó kehiná mó kehináné ehweh iraruwe.

7 Iraruwara seyene ehweh irarunsabé író kega áhtenéra, Árahue irareo éra iwíáhue tagowe. Segá

* **2:1:** Péntíkósiyabé éhwéhmé púku anehepeqte séhirámé “Manikáne Púkuipéq Kéh Áwahe Éhwéhne” ue kéhrabeq tagáhno.

áhtenéra mahraréra, Iteitene ehweh irare kewé se peh morá Kehrari marákórápéqté ké wóe.

⁸ Segá iteitene ehwehmarí irarewaq irone. Segá itene ehweh árahue irareo?

⁹ Ite Pátia kewé Míria kewé Érámi kewé Mésópótémia marákórápéqté kewé Súria marákórápéqté kewé Kápárósia marákórápéqté kewé Póntusa marákórápéqté kewé Esia marákórápéqté kewé itene ehweh irarewaq irone.

¹⁰ Párígia marákórápéqté kewé Pámbíria marákórápéqté kewé Ísípi marákórápéqté kewé Áribía marákórápéqté kewé Saíríni suwahpeq wahtotaq mi kewé Aroma suwahpeqte náhnsó kewé itene ehweh irarewaq irone.

¹¹ Mi kewé Aroma suwahpeqte náhnsó kewé táhmaro Asiu keúrá míáhwe. Mó mitaqté ké Asiu kené sásá mero ke míáhwe. Kíriti marákórápéqté kewé Árébía marákórápéqté kewé moke mi kegá itene ehweh irarewaq irone. Manikánka págege arámbéhrínsabé sega irarewaq irone. Moke iteruwahrahga irarewanserah itene ehwehmarí irarewaq irone uwe.

¹² Segá áhtenéra sene sirupipeq iwíáh kikiréra, Itene ehwehmarí árahue irarewapómo? Aneq sansápómo uwara

¹³ mó kegá siwiréh aritera, Segá peh píah nah puara múguwahgu ehwéh irarewe uwe.

Pítaga pahsuo ehwehne.

¹⁴ Uwara Pítareq airápété moráue eqmaro kerekka iriwe míówe. Pítaga mipi sáhurió keyabé anotahtaq teriena, Sarúsarama suwahpeq kaegaeo

kereq moke mó Asiu kerero, ehweh teiníboq írátiáhro.

¹⁵ Abehq wání nah puara múguwahgu ehwéh irarewe eme írakaumo. Amahnága pópoqnah peh ákáhtaq kéhrana íre píah né tanahráre.

¹⁶ Mó kené ehweh irarensabé Manikáne ehweh irarú ani, Sóériga mahraréna,

¹⁷ Manikánka iraréna, Anehe tanahráq Néniwa mah kehiná kékéhínápá eqmaq auwaníe. Néniwanka néne ehweh iwíáh aritahnara itenahnimáhqsonseq iteriyahumáhqsonseqka ehwéh irarigehe. Itene mahbigauné siwanka tagagehe. Orerónká áónáh tagagehe.

¹⁸ Mi tanáhráq néne arambehri mirao weh áhrébá néniwa eqmaq auwaníe. Néniwanka néne ehweh iwíáh aritahnara ehweh irarigehe.

¹⁹ Íopeqté íre tagariáh náneq sokigi ainíe. Marakóipeqté moq págege sansá sokigi ainíe. Korahqkakáq iraakáq áúnínaakáq tagagehe.

²⁰ Pópoqnah sunkíkíraginae. Íotaq korahq tahnsa tautáúraginae. Miraínagake anotah Wahnáh ánínka págegeue wahnahnína tanáhráq áhníbóránire.

²¹ Are néne Wahnah míahno ue níáhrabira kewé kaweraritanauge ire úwe. *(Joel 2.28-32)*

²² Pítaga mó mahraréna, Ísara keo, mó ehwéh kawerue írátiáhro. Sísa Néhsara su wahpeqte ání éhweh teiúge. Wega Manikáne arambehri mi-rainkeheeéna Manikánka Sísa omaq atowe. Minayabe tagariageheéna Manikánka págege atáráire. Págege atáráirana wega íre tagariáh náneqkakáq págege arámbéhriákáq sokigi aitáráire. Itene iu-ranka tagahnsabé aiq ahtebahwe.

23 Naho Manikánka iwíáhue tagarionserah menah itega Sísa táhtoqme ahbabáq ke móriátówara sega awankátaq táhpatowana putiaraire.

24 Sísa íre airaiq pusa ání míahrahurai puana Manikánka érorahirabeqte iriatena organúq atáráire.

25 Naho naho Tébíti, Sísane aigaqnaga íre wewensabé irarena peh Sísansabé teiena,

Néne Wahnhahnka ínéreq mía míaime tagarióge.

We néne niyah púpeq mía míai puana íre áhreúge.

26 Minayabe nirupipeq eyoyóire. Néne níwéhrate iwíáh iwíáh atóge. Íné pukonaraq arega organúq intaniewóne iwíáhuge.

27 Íné pukonarabeq arega néniwa íre nuwankéhe. Peh organúq intankéhe. Arene kaweq aníné nínonka íre karekinawire.

28 Arega oga mía mía ahtápéq sokigi aníátóne. Arereq mía míáuya puana nirupipeq eyoyónawire úwe. *(Buk Song 16.8-11)*

Mi ehwéhmé Tébítiga teiuwe.

29 Pítaga mó mahraréna, Nánuwahraho, itene igaqna Tébíti éhweh pahsuqme teiníe. We naho putiowara maisarówana wene kárékú anónká amahnága maisia máiq mahtaq kéhre. Minayabe íre wewensabé iraréna peh Sísansabé irarúwe.

30 Tébítive Manikáne ehweh irarú ani ména Manikánka mirainauge ú ehweh írátíowe. Manikánka naho Tébíti teawena, Amahnága arega wahnhahnónanserah mókake arenanahga wahnhahninkehe. Peh aiq pútariahnsanuge únsabe

31 Manikánka mirainaú arámbéhríyábé Tébítiga ahtebówe. Ahtebéna we aiq tagariomé Manikánka

ite meirena kaweraitankeheéna omaq ato aní organúq atanawire. We pukirabeq íre auwanawire. Wene anonka íre karekinawire. Peh organúq atanawire tagariowe úwe.

32 Pítaga mó mahraréna, Manikánka Sísa iriatena organúq atowaq ite moke tagarawéq teiune.

33 Manikánka Sísa wene ayah púpeq atowana antotah Wahnáh ání míaraire. Míarairana Manikánka teawátainserah Wenawa Sísaba eqmatairana Sísaga Manikáne Awa iteba eqmaréhre. Minayabe itega amahnága aiq tagariáhwe. Itega íráh éhwéhmé Manikáne Awanka iwíáh aítéh éhwéhne.

34 Tébíti pukútaq wene anonka íópeq íre kiuwe. Minayabe íre wewene anonkansabé peh Sísa íópeq kiunsabe irarúwe. Wega mahraréna, Itene anotah Wahnáhnká néne Wahnahnsabé, Niyah púpeq kiwíáhno.

35 Mókake arene naruoaakáq wahnahnarito ataníe irarire úwe. *(Buk Song 110.1)*

36 Pítaga mó mahraréna, Ísara keo, ite ómi kawerue iragéhboq íratiáhro. Itega Sísa awankátaq táhpáreq subiq sutowe. Manikánka mi anínsabé, Are ínéga omaq ató ání móne. Anotah Wahnáh ání míahno atáráuge úwe.

Áhnte wehekéqká Manikánsabe aiq pútare atera wání meyo ehwehne.

37 Morábí kiranehnuríó kega írówana mi ehwéhnká sirupipeq pówé. Sirupipeq pówara sega Pítareq mó eqmaro kereqsabé kasenéra, Iteruwahraho, aneq miraonehnkono

38 Úwana Pítaga sensabé, Itene ahbabáq kaquiuwankéhboq itene ahbabáq sansa sueq Sísansabé

áhraboro. Sísansabé áhrabéq wání meyháro. Mirairataq Manikánka itene ahbabáq kaweraitena Wenawa iteba eqmarankéhe.

³⁹ Itereq itene animárínseq íre wahtopeqte kéréq ómi mirairataq Wenawa iteba eqmarankéhe. Maniká itene Wahnahnká ómi omaq sito kega mirairataq Manikánka Wenawa iteba eqmarankéhe úwe.

⁴⁰ Pítaga mi keyábé áhnte mó págege ehwéh pahsuqme teriena, Manikánka kaweraitankéhboq mó kegá ahbabárorabeq sueq kaweqlaq míáhro úwe.

⁴¹ Áhnte író kega wene ehwehnsabé aiq pútare atówara wání meríúwe. Wání meríuwara mi wehekáh sega Pítarehba kobaritawé míówe. Peh íregáritaq wehekéq 3 táchuséni (3,000) wehekéqká kobaritawé míówe.

Peh morá íwíáhurió ehwehne.

⁴² Seba méra Pítareq mó eqmaro kerekka síwáhnoru ehwéh irera peh morá íwíáhuwe. Peh morá íwíáhéra sene tópah mewe moraráq néra moraráq púreq aruqaruruwe.

⁴³ Manikánka págege aritowara Pítarehga áhnte otáq sásá mirauwe. Mirauwara moke tago kegá áhtenuwe.

⁴⁴ Moke Sísansabé aiq pútare ató kega moraráq méra sene ménsámehnsánsabe peh morá íwíáhuriówe.

⁴⁵ Segá sene ménsámehnsátate méyó moné mewera Sísá tagaríáh tábónáh ké náriúwe.

⁴⁶ Mó wehekáh mó wehekáhnue sega Manikánsabe iwiáh íwiáh atáh náhtápéq séyéuwe. Séyééra pokue sene nahmarítápéq táchutahuq

moráráq naruq naruwore. Sirupipeq eyoyóúwara táhutahuq moráráq naruq naruruwe.

⁴⁷ Segá Manikánsabe iwíáh íwíáhuwara moke tago kegá iwíáhéra, Kaweq kee uwe. Mó wehekáh mó wehekáhnue áhnte mó kegá Sísansabé aiq pútare atówe. Aiq pútare atówana Manikánka se kawerari-towara Sísansabé aiq pútare ató ke áhnte aguwe.

3

Soriqnah ani kawerato ehwehne.

¹ Tunsorerutaq Asiu kegá púreq aruqarurotaq Pítareq Sónireq Manikánsabe iwíáh íwíáh atáh náhtápéq seyeherauyé.

² Mi nah méhpéh áwíq Kaweq Mehpéhne. Mitaq soriqnah ani tútuue míowe. Wenanoga maq-marotaq soriqnah ani maqmarowé. Mó wehekáh mó wehekáhnue wene iyahnabo anímárínká meqmera mi mehpéh móata móatauwe. Nahupeq kíra keyábé ineh inehinkeheéra meqmera móátówe.

³ Wega Pítareq Sónireq nahupeq kibekoyehera uyataq tagéna, Náníétao úwe.

⁴ Náníétao úwana Pítaga we ebitáwéna wensabé, Ite tagáhno úwe.

⁵ Úwana wega se tagéna iwíáhéná, Aneqpopoq nánigéhe íwíáhúwe.

⁶ Iwíáhúwana Pítaga wensabé, Íné íre móneakáq ání múge. Mirainieu naneq teawiníe. Néhsara suwahpeqte ání Sísa Karáhé áwírue teawúge. Iriwe nogo atóge úwe.

⁷ Miraréna wene púpeqte áyáhnkárátáq táhtoqme iriatowe. Iriatowana wene aiaurankakaq aigáránkákáq apubúue págege agúwe.

⁸ Págege agúwana mi anínká suansúá keirigue nogena nahupeq kierirowe. Kierirena wega nogena ahkuagu ahkuaguéna Manikánsabe iwíáh íwíáh atowe.

⁹ Manikánsabe iwíáh íwíáh atowara ómi nahupeq míó kega we tagéra,

¹⁰ we Kaweq Mehpéhtáq tútuue ineh inehéwéh ání míre uwe. Wene aigará kaweragúnsabe, Éhneh. Aiq kaweragire éra áhtenuwe.

Pítaga mitaq míó ke teriu ehwehne.

¹¹ Kaweragú aninká Pítareq Sónireq táhtorowara ómi tago kegá áhtenéra pehbeheráh seba suwe. Anotah wahnáh wenáwíq Sórómóni Asiu kené wah-nah míotaq pearó owewéhpéhtápéq suwe.

¹² Suwana Pítaga tagéna sensabé, Ísara keo, we kaweraginsabé aneqsabé áhtenoo? Itewe aneqs-abé ebitiaho? Ite págege aníté méta kaweratehye íwíáho? Manikánka itensabé, Kaweq aníté wóye aitéhnsábé kaweratehye íwíáho? Írakaumo. Íre itegae.

¹³ Manikámé we Ébárähmareh Áhísáhkireh Séköpareh itene igaqnaréhne Maniká ména wewega mah aní kaweratéhre. Áhnte kegá wene arambehri awahbeh ani Sísawe, Anotah aní míéhre atageheéna kaweratéhre. Sísa marakóipeq míaraitaq sega we subigeheéq itega táhtoqme naruó kebá meqmeq móátárówe. Wahnah aní wenáwíq Páhíratiga, Sísa íre ahbabáq ani púana pugeq auwaníe íwíáhurairaq itega ahqáho atárówe.

14 Manikánsabe arutaboiri anímé kaweqtaq mía míaurai anímé itega ahqáho atárówe. Peh mó ke subiq sutai aní pugeqio urowe.

15 Oganúq itahráhi aní subiq sutowe. Itega Sísá subiq sutowana Manikánka iriatáráire. Minayabe Sónireq ínéreqka itene iuranka tagéta teiuye.

16 Sísansabé aiq pútare ateta wenawírue áhrabúya puana wega mi aní kaweratéhre. We awaho ani míéhraq tagahwe. Sísansabé aiq pútare atoyanka mi aní kaweratéhraq tagahwe úwe.

17 Pítaga mó mahraréna, Nánuwahraho, itereq itene wahnahmarínseqka Sísá subiq sutotaq we Manikáne ahninkáwá míéhnsábé itega íre ahtebarowe. Íre ahtebéq pehipi subiq sutowe. Minayabe aiq tagaríoge.

18 Manikánka wene ehweh iraru ke iwíáh aritowara ómiga mahraréra, Manikánka omaq ato aníká pukina ínaraq anotah érinawire uwe. (*Aisaia 50.6, 53.5*)

19 Minayabe Manikánka itene ahbabáq kaqui-wankéhboq itene ahbabáq sansa sueq wensabé áhraboro.

20 Mirairataq Manikánka itene irupipeq eyoyó aitankéhe. Sísá Karáhé itene Wahnah míánkeheéna Manikánka omaq atowe.

21 Amahnága Sísá íópeq mía míaire. Manikánka wene ehweh iraru ke iwíáh aritowara naho mahraréra, Mókake Manikánka moke kawerinkehe uwe. Amahnága Sísá íópeq ména mi tanáhráqsábé áwénunire.

22 Mósísiga itene igaqnansabe naho mahraréna, Maniká itene Wahnahnkwa wene ehweh irarinke-heéna itereq míonarabeqte aní eqmarankéhe.

Ínega mirauraunserah eqmarahna anínká mirainkehe. We sínaraq irarína ehwéh moke kawerue íráhro.

²³ Wega irarína ehwéh íre íréhra kewé pukigehe. Manikáne animári míéhrarabeqte kaqsuhnaraq pukigehe úwe. *(Lo 18.15-19)*

²⁴ Manikáne ehweh irarú ani Sáhmúériga Sísa tutai tanáhráqsábé irarúwe. Moke we anehe su anímári, Manikáne ehweh iraru anímárínseqka moq amahnága tánáhráq, Sísa tutai tanáhráqsábé iraruwe.

²⁵ Manikáne ehweh iraru kewé itene igaqnareh wóe. Íre peh morá itene igaqnarehyabe iraruwe. Moke itensabéákáq iraruwe.

Manikánka itene igaqna Ébáráhmansabé naho teawena, Arenahninká mah marákó mårákóípéq mó kahnáh mó kahnáhnue kaweraritankéhe teawuwe éna

²⁶ Manikánka wenahni wene arambehri awah-beh aní iriatena ebeq ite Asiu keba eqmataire. Itene ahbabáq kaqiuwankeheéna wenahni eqmataire úwe.

4

Pítararé karábúsiipéq móritó ehwehne.

¹ Pítareq Sónireqka Manikánsabe iwíáh iwíáh atáh náhúpéq míó keyabé síwáhnoruye. Síwáhnoruyataq Manikáne ehweh mibeq mahbeq arítáh kéreq Manikánsabe iwíáh iwíáh atáh náhtápéqté wáhnáh párisíreq Sáyúsi kéreqka suwe.

² Pítararégá síwáhnoréra, Sísa oga úkurainsabé mókake pukira ke mó oga úkoneherawoe uyara mina su kegá írówe.

Irera sene ehwehnsabé anotah abíáhnsánéra

³ Pítararébá sure táhtoqme meriqmera karábúsiipéq móritówe. Íó tupekútaq puara ahbiahipeq kотiigeheéra móritówe.

⁴ Mi wehékáh áhnte író kega Sísansabé aiq pútare atówe. Peh íregárítatq wéh 5 táchúséni (5,000) wehgá aiq pútare atówe.

Sega Pítararéyábé ehweh arító ehwehne.

⁵ Ahbiahipeq Asiu wahnáh kéreq Asiu kené aboawah wehreq Mósísine ehweh síwáhnoru kereq Sarúsarama su wahpeq sáhuriówe.

⁶ Sáhuriówana Manikáne ehweh mibeq mahbeq arítáh kéné wahnah wenawíq Ánásá míowe. Ánásá wenawahrah sensíwíq Káiyápásareh Sónireh Árékásántareh mó wenawáhráhreqka moraráq sáhuriówe.

⁷ Mitaq sáhurawéra, Meriqme sero uwana Pítareq Sónireq meriqmera seba móritówe. Móritówara mipi sáhurió kega kasenéra, Insegá págege aitáráiraq mi soríqnáh ání kaweratáróyo? Inse áwírue kaweratáróyo uwe.

⁸ Uwana Manikáne Awanka Píta págege atena iwiáh atowana Pítaga sensabé, Wahnah kereq aboawah wehrero, Írátiáhro.

⁹ Soríqnah ani séhréh atáráuyansabé inse áwírue kaweratáróyo kasenoo?

¹⁰ Itereq moke Ísara kereq iragéhboq írátiáhro. Itega Sísa Karáhé Néhsara su wahpeqte ání awankátaq táhpatowana putiaraira. Putiarairana Manikánka iriwe organúq atáráire. Sísa Karáhé págege ání míeh púana wénawíq áhraburauyansabé

soriqnah ani kaweratáráire. Kaweratáráirana ite míáhrabeq we amahnága awaho ani míéhre.

11 Nah pearáh kégá wahq awanká tagéra, Iroke awankáne éra sutowana anehe mi wahq anotah kawéq wáhq úkire.* *(Buk Song 118.22; Aisai 28.16)*

Mina inserah itega Sísansabé ahqáho atárówana we anotah Wahnáh ání úkuraire.

12 Peh morá Sísaga webataq itene ahbabáq kaweraitahráhire. Peh morá Sísa áwírue ahrabo ke wega kaweraritankéhe. Mah marákó márakóípéqmé mó morá áninká itene ahbabáq íre kaweraitahráhire úwe.

13 Pítareq Sónireqka míó keyabé íre áhreia ehweh pahsúóyansabé wahnah kereq aboawah wehreqka író kega áhtenuwe. Áhtenéra iwíáhéra, Se íre sigaruuroya aníté peh wahba arámbéhríráté aníté wóye iwíáhuwe. Iwíáhéra, Sewe Sísa kétóya aníté wóye uwe.

14 Wene aigará kawerato aninká Pítararébá míowara tagéra mó ehwéh mi tanáhráq íre irarerahuwe.

15 Íre irarerahunsabe wahnah kereq aboawah wehreqka Pítararé kaunsíri kegá momiwíurabeqte máhpeq sitera só siouwe.

16 Sío síoéra, Mi aníté aneraruanéhnkono? Segá ótaq sansá aiq pútaq mirauroyara moke Sarúsarama suwahpeqte kegá tagariáhwe. Segá kaweratóya ehwéh itega íre epéq suahráhúne.

17 Mi ehwéh abae agínehboq págegeue ehiya míáhtao aritanéhe. Mó ke Sísa áwírue síwáhnoriyeho ue terianéhe uwe.

* **4:11:** Mátíyu 21.42 aigárápéqté ehwéh tagáhno.

¹⁸ Terianeheéra Pítararé síáhrabéra sensabé, Sísá áwírue móñkakáq síwáhnoréta teríyehboq túbah ago-tao ue teríúwe.

¹⁹ Teríuwara Pítareq Sónireqka sensabé, Manikáne ehweh sueta itene ehweh íréhyataq Manikánka itensabé kaweróye aitankéhbo? Írakaumo. Minayabe iteitega iwíáhue tagahro.

²⁰ Itega tagéta írátáuya ehwéh íre ehiya míáhrähuye. Peh teri terinoyehetauyue uye.

²¹ Soriqnah ani kaweratonsabe ómi kegá Manikánsabe iwíáh iwíáh atówe. Minayabe wahnah kegá iwíáhéra, Mó kegá itensabé sibiahnsa aitehboq Pítararé pehragaritanehe uwe. Sega Pítararéyábé, Subónehboq Sísane ehweh móñkakáq íre teriétao éra kaqsúowé.

²² Kaweragú aní 40 opéq peh soriqnah ani míowe.

Sísá ehweh terigeheéra págege aito ue púreru ehwéhne.

²³ Kaqsúowara Pítararégá sensuwahrahba pokuye. Pokéra Manikáne ehweh mibeq mahbeq arítáh kéné wahnahnseq Asiu kené aboawah wehreqne ehweh teríúye.

²⁴ Teríúyara irera Manikánsabe moraráq púreréra mahrraréra, Itene anotah Wahnáhno, arega íópeqkákáq mah marákó márakóákáq sóreq wanínkákáq miraróne. Moke mahnana kéh náneqkakáq miraróne.

²⁵ Arene arambehriú ani, itene igaqna Tébíti Arenawanka iwíáh atowana sehiranue mahrraréna, Nahnso kewé aneqsabé anotah abíáhnsánoo? Aneqsabé ehweh pehipi moraenoo?

26 Mah marákó márákóípéqté wáhnáhmárínseq antah anímárínseq ebehoneheéra sokah sokahowe. Manikánseq wega wehuke merinkeheéna omaq ato anínseqsabé kotioneheéra morábí sáhuriáhwe úwe éra púreruwe. *(Buk Song 2.1-2)*

27 Segá mó púreréra, Tébítiga naho sehiranúmē amahnága iteruwahpeq Sísá suboneheéra sorupariarowe. Kaweq arénáhní arega eqmarahna aní Sísá suboneheéra sorupariarowe. Érótireq Póntíasa Páhíratireq wáhnaupéqté kéreq Ísara kerekka Sísá suboneheéra sorupariarowe.

28 Arega naho págege iwíáhue miraóna iwíáh anehe kaqme miraurowe. Arerega mina íwíáhóna puara sega menah miraurowe.

29 Anotah aníno, amahnága sega itensabé, Subónehboq túbáh agotao eme aiq irahne. Ite arene arambehriúna anímári múne. Minayabe ite íre áhreia peh arene ehwéh págegeue irarenehboq séhréh aito.

30 Arene ehwéh irarenaraq awahre ke kaweragigehboq arene ayahtate táhtoro. Sísá arene arambehriyabé awahbeh aní áwírue áhrabonaraq ótaq sansámári miraúno éra púreruwe.

31 Púreruwana momiwí nah míu míuúwana Manikáne Awanka sene sirupipeq tunse séhréh arito púara moke sega íre áhreia Manikáne ehwéh págegeue iraruwe.

Ménsámehsá morábí matawéra tabonah ke náríú ehwehne.

32 Moke Sísansabé aiq pútare atáh kégá peh morá íwíáhéra sene ménsámehsá morábí matíowe. Mahna peh morá néne wíre íre iraria peh morábí matíowe.

³³ Eqmaro kega Sísa oga úkú ehweh anotah pagégeue irare irareuwana Manikánka séhréh arítowe.

³⁴ Sísa tagaríah kékáté mó morá tabonah ani íre míowe. Sega iwíáhutaq sene ménsámehnsá paimaq paiqmaréra meyó moné mewera

³⁵ eqmaro ke náriúwara eqmaro kega tabonah ke saraqme náriúwe. Minayabe tabonah ke íre míowe.

³⁶ Wehukení wenawíq Sósépa míowara eqmaro kega mó awíq Páhnábásae átówe. Mi awíq Páhnábásawe áawahewé séhréhi aníne awíq míre. We Sáipára marákórápéqté ánínéna Áríwái káhnáh áníne.

³⁷ Wene marakó peh ákáhtaq éberiopéq paigmarena meyó moné mewe eqmaro ke siuwe. Sega tabonah ke saraq miageheéna Páhnábásaga siuwe.

5

Ánáníásireq wene ahrerekka Manikáne Awa áhwárawe tagoya ehwéhne.

¹ Mó akéqká iwíáhue mó sansánuye. Wehukení wenawíq Ánáníási wene ahre awíq Sapairae. Sene marakó peh ákáhtaq éberiopéq paiqmarera móne meyóye.

² Ánáníásiga mi moné saime ebeqtaq kopéqmarowana wene ahrega tagówe. Tagówana wega mó akáhtáq mewe eqmaro keyabé péhenue peh ákáhtaq moné náriuwe.

³ Náriuwana Pítaga wensabé, Ánáníásio, owainawanka iwíáh atéhrah aneqsabé mira íwíáhono? Arene marakó paiqmarahna moné

ákáhtaq kopéqsuahnayabé Manikáne Awansabé péhe éhwéh teawene.

⁴ Arene marakó íre paiqmarahnaraq tahirí peh arerene kagai iripo? Arene marakórate paiqmatona moné peh arerene matiarona wino. Arega, Móne ákáhtaq kopéqsue péhe éhwéh teriníe íwíahóna wino. Arene arupipeq aneqsabé ahbabáq iwiáhono? Íre peh wehukeyabé Manikánsabe moq péhe éhwéh teawene úwe.

⁵ Úwana Ánáníasiga mi ehwéh irena aunúnkaq márunsurahue putiowe. Putionsabe író kega anotah ahténéra áhre aguwe.

⁶ Mibeqté máhbígáúnká séra pukú aniné anonka ambantataté úbíqme sehgiwera mómaisarówe.

⁷ Ánáhkawagá wenawehq putiéhre u ehwéh íre irena apahtáró áhwáh sótaikúwana suwana

⁸ Pítaga wensabé, Marakó paiqmarehyame mahraue moné meyehyo úwana kowe miraue meyoye úwe.

⁹ Úwana Pítaga wensabé, Itega iwíahétawe Manikáne Awa áhwárawe tagayehe íwíahewoyo? Arenawehq maisaráh máhbígáúnká amahnága kouwekue méhphehsah seuriáhwe. Segá arenkakáq sehgiwera pokigehe úwe.

¹⁰ Sehgiwera pokigehe útaq mi iní aunúnkaq Pítane aigárátáq márunsurahue putiowe. Putiowara mahbigaunká nahupeq kire putio iní tagéra sehgiwera awehkawa maisarórabeq mómaisarówe.

¹¹ Moke Sísa tagariáh kéreq mó kereqka putióya ehwéh irera anotah ahténéra áhreuwe.

Ótaq sansámárínunsabe éhwéhne.

12 Eqmaro kega wehuke míópi áhnte otáq sánsámári mirauwe. Asiu kené wahnah aní Sórómóni míotaq pearó oewéhpéhpéq Sísa tagaríah kégá mitaq sáhuria uriauwe.

13 Sáhuriówara mó kegá iwíáhéra, Sísa tagaríah kewé peh kaweetaq míáh ké wíre íwíáhéra áhtenéra mibeq seba íre suwe.

14 Áhnte weh áhrégá mó wehekáh mó wehekáhnue Sísansabé aiq pútare atera mó Sísa tagaríah kéká sáharuqaruowē.

15 Eqmaro kega áhnte otáq sánsá miraunsabé awahre kegá iwíáhéra, Pítane mánkánahnka iteba sótaikínaraq itene awahre kaweraginkehé íwíáhuwe. Mira íwíáhunsabé sene iyahnaboga meriqmera ahtapeq máhriqtaq mórítówe.

16 Sarúsarama suwahpeq wahtote kereqka awahre kereq owainawanka síwíoqnó kereq meriqmera mórítowara moke kaweragúwe.

Íópeqté áninká karábúsiipéq míó ke máhpeq sito ehwehne.

17 Manikáne ehweh mibeq mahbeq arítáh kéné wahnahnseq wereq míó ke, Sáyúsi kereqka iwíáhéra, Ótaq sansá mirao kegá ite kiotaikiyehboq aneraritanéhnkono uwe. Aneraritanéhnkono éra eqmaro keyabé anotah abiáhnsánéra

18 se táhtoqme wahba karábúsiípéq mórítówe.

19 Inokáhpeq Maniká míéhrabeqte íópeqté áninká karábúsiipéqté ónsá siwe eqmaro ke máhpeq sitowe.

20 Máhpeq sitena sensabé, Manikánsabe iwíáh íwíáh atáh náhtápéq kowéq moke náneqmarí oga mía mía ehwéh koreríero úwe.

21 Úwara sega ahbiahiperura pokue íópeqté áninká inokáhpeq koreríero aritonserah Manikánsabe iwíáh íwíáh atáh náhtápéq kosíwáhnoruwe.

Kosíwáhnoruwara Manikáne ehweh mibeq mahbeq arítáh kéné wahnahnseq wereq mío kerekka Asiu kené aboawah wehreq mó kaunsírí kéreqsabé síáhrabuwe. Síáhrabuwaru sure morábí méra párisiwarínsábé, Karábúsiipéq móritáráu ke koweriráhro uwe.

22 Uwara párisiwarínká pokue karábúsiipéq kragowara eqmaro ke íre míowe. Íre míowara kouwekue sene wahnahnsabé,

23 Itega tagónawe karábúsiipéqté ónsá paisa tagóne. Karábúsiipéqté wáhnáhmárínká onsarapéq máhpeq iriwe wahnahnatiáhwaq tagóne. Segá wahnahnatiáhwaq onsa siunaraq kabarúna ke íre míáhwe uwe.

24 Uwara Manikánsabe iwíáh íwíáh atáh náhtápéqté párisíwáriné wahnahnseq Manikáne ehweh mibeq mahbeq arítáh kéné wahnahmarínseqka mi ehwéh irera áhtenéra, Árahiro? Se eheragowamo íwíáhuwe.

25 Se eheragowamo íwíáhuwana sú aninká sensabé, Itega karábúsiipéq sítáró kegá Manikánsabe iwíáh íwíáh atáh náhtápéq amahnága iriwe síwáhnorowe teriuwe.

26 Teriuwara Manikánsabe iwíáh íwíáh atáh náhtápéqté párisíwárinseq sene wahnahnseqka

pokue Pítareh kowerirera áhreéra, Mó kegá ebahtaté subíyeho éra pehwehrue kowerirówe.

Pítarehga sene ehweh ayahqme teriú ehwehne.

²⁷ Koweriqmera kaunsíri kebá móritówe. Mórítowana Manikáne ehweh mibeq mahbeq arítah kéné wahnahnka Pítarehyabe ehweh aritowe.

²⁸ Ehweh aritená, Sísane ehweh mónkakáq síwáhnoriyeho teiátáu mino. Teiátáume íre ireq síwáhnoronsabé áhnte Sarúsarama suwahpeqte kegá Sísane ehweh íráhwe. Itega Sísa subitáúna ehwéh aneqsabé teri terinoo úwe.

²⁹ Aneqsabé teri terinoo úwara Pítarehga mahraréra, Manikáne ehweh anteruéhnehboq wehukene ehwehme árahue iranéhnikono?

³⁰ Itega Sísa awankátaq táhpáreq subiq sutowe. Subiq sutowana itereq itene igaqnáréhne Manikánka iriatena organúq ataráire.

³¹ Organúq atena wensabé, Niyah púpeq míahno atena wehuke kawerarito urairana Sísa mitaq ména ite Ísara ke kaweraitéh ání míéhre. Itene ahbabáq súéhrataq wega kaweraitankéhe.

³² Manikánka miraurai naneq tagarionayabé teiune. Íre itebataq teiasa Manikáne Awanka mó teíre. Manikáne sansá mirao kebá Wenawa eq-maréhre uwe.

Pítarehyabe pehragarítáhro ú ehwehne.

³³ Uwara anotah Asíú wéhwárínká Pítarehne ehweh irera sensabé anotah abiáhnsánéra, Subiq suanehe íwíáhuwe.

34 Iwíáhuwana mibeqté káúnsírí ání wenawíq Kámária we Péhrasi ání míowe. We Mósísiga sehgíoro ú ehweh síwáhnorú ani míowara mó kegá, We ahtebia ání míre iwíáhuwe. Wega iriwe ména, Mi ke wéhuwa máhpeq sito úwara máhpeq sítówe.

35 Máhpeq sítowana wega momiwíu keyábé, Ísara keo, mi kegá miraira naneq irareneheqmé kawerue iwíáh atawéq irarero.

36 Menah wehukení wenawíq Téúrása ména, Íné anotah ání múge urairara áhnte wehuké 400 wehuké we kétówe. Kétowara mó kegá we subiq sutowara we kétó kega wene arambehri auwera abae ague sene nahtapeq sáh poké agurowe. Poké agurowana wene arambehri parabaguraire.

37 We subiq sutowara anehe Kehrari marákórápéqté ání wenawíq Súrásá míaraire. Wahnah kegá wehuke síwíq merotaq mi tanáhráq Súrásareq we kétó kereqka kámáhni wahnáh ké subiq suanehe éra ite kámáhni wahnáh ké míaneheqmúne urowara kámáhni wahnáh kegá Súrásá subiq sutowana pukuraire. Pukurairara we kétó kegá moq abae ague sene nahtapeq sáh poké agurowe.

38 Minayabe teiníboq írátíáhro. Pehwehrue míáhro. Máhpeq míáh ké pehragarítáhro. Mi ehwéh peh seyene iwíáhwé pehipi túbáh agoneherawoe.

39 Manikánka sene sirupipeq mi iwíáh aritéhmé itega íre ahqáho aritahráhúne. Manikánka itene naruo ání úkínehboq pehwehrue míáhro úwe.

40 Úwara momiwíu kegá Kámáriane ehweh irera Pítareh síáhrabuwara suwe. Suwara

sega subiqmaro atowara wiahnó karatáté subiqmarowara, Sísane ehweh móñkakáq síwáhnoriyeho teriera kaqsúówe.

⁴¹ Kaqsúówara Pítarehga kaunsíri ke suera mágheq pokuwe. Sísane arambehri miraunsabé wahnah kegá subiqmáró púara sene sirupipeq eyoyóuwara pokuwe.

⁴² Segá mó wehekáh mó wehekáhnue Manikánsabe iwiáh iwiáh atáh náhtápéqkákáq wehukene nahtapeqkakáq mahrarue síwáhnoréra, Manikánka eqmaraníe ú aní, ite kaweraitahráhi anímé we Sísa wire ue síwáhno aruqaruruwe.

6

Sítibénireh omaq sitó ehwehne.

¹ Mi tanáhráq Sísansabé aiq pútare ató ke áhnte úkuwe. Káríki ehwéh iraru Asiu kegá peh morá Asiu kené ehweh író keyabé abiahnsanuwe. Abi-ahnsanéra ehmuniq éhmúniréra, Wahnah kegá táhutahuq mó wehekáh mó wehekáhnue saraq-maráhtáq peh morá Asiu kené ehweh író kene keweinínsó áhnte náriera itene keweinínsó pehgáriq nári nárinowe uwe.

² Úwara mi airápété téhraníté eqmaro kega mó Sísa tagariáh kékabé momiwíoneheqmúne ue síáhrabuwara suwe. Suwara sensabé, Táhutahuq kawerue sararaneheeéq ite Manikáne ehweh síwáhnoré arámbéhrí suewé anotah íre kawerire.

³ Minayabe íráhro. Iteruwahraho, mi arámbéhrí miraigehboq itega ite míonarabeqte abapete téhraníté omaq sítáhro. Mó kegá, Kaweqtaq mía míowe e ke omaq sítáhro. Manikáne Awanka sereq mía míai ke méra kaweq iwiáho ke omaq sítáhro.

4 Ite eqmaq íuwátái kegá peh púrerue Manikáne ehweh íwáhnoroneheqmúne uwe.

5 Uwara moke író kega, Mi ehwéhmé kaweq ehwéhne íwíahéra wehukení wenawíq Sítibéni omaq atówe. Sítibéniga Sísansabé kawerue aiq pútare ato aní míowana Manikáne Awanka wene arupipeq mía míaéna séhréh atowe. Mó ke sensiwíq Pírípi, Pókóra, Níkánori, Tímóni, Páménásá, Níkóra miraue omaq sitowe. Níkórawe we Ántíóka suwahpeqte ánine. Téhwe we wáhnaupéqté ání ména anehemé we Asiu kené sánsá miraúwe.

6 Mi ke omaq sitera eqmaro kene siuranabiahtapeq móritówe. Móritówara táhutahuq saraqme arámbéhrí miraigeheéra eqmaro kega siyahnkaratáté táhtoqme púrerarítówe.

7 Manikáne ehweh áhnte síwáhnoru puara Sarúsarama suwahpeq íregáritaq kegá irera Sísansabé aiq pútare atówe. Áhnte Manikáne ehweh mibeq mahbeq arítáh kéreqka mi ehwéh irera Sísansabé aiq pútare atówana Manikáne ehwehnka abae agúwe.

Sítibéninsabé ehweh ató ehwehne.

8 Manikánka Sítibéni séhréh atena págege ato púana wehuke míórabeq anotah otáq sánsámári miraúwe.

9 Miraúwara Sáírini suwahpeqte Asiu kereq Árekásántaría suwahpeqte Asiu kereqka Sarúsarama suwahpeq momiwíuwe. Sene momiwí nahtápéqsábé Pugeq Súó Kene Nahne ue áwíratówe. Mi kereq Sírisía marákórápéqté kereq Esia marákórápéqté kéreqka Sítibéniba pokue ehwehuwe.

10 Ehwehuwana Manikáne Awanka Sítíbéni págege ato púana wega ahtebia éhwéh irarúnsabe mi kegá íre ehweh atahráhuwe.

11 Íre ehweh atahráhunsabé sega mó keyábé epéráhpéréra, Sítíbéni péhe éhwéh átéhrataq móne náienéhe. Péhe éhwéh mahrarero. Sítíbéniga Mósísireq Manikánseqsabé síéhruru arítaráiraq írátáune ero uwara sega móne mewera mi pehe éhwéh teriúwe.

12 Mi pehe éhwéh teriúnsabe író kereq Asiu kené aboawah wehreq Asiu kené sánsá síwáhnoru kereqne sirupipeq págegeue abiahnsanuwe. Segá Sítíbéniba pokue táhcoqme kaunsíri kebá móatówe.

13 Móatera péhe kégá mahraréra, Mi anínká Manikánsabe iwiáh iwiáh atáh náhtápéqkákáq Mósísine sánsánkákáqsábé abehq éhwéhne arítáráire.

14 Sísa Néhsara suwahpeqte áninká Manikánsabe iwiáh iwiáh atáh náh sokoruankéhe uraire. Mósísiga teiu sansamé Sísaga sabi iuaníe urairaq írátáune uwe.

15 Uwara moke kaunsíri ke tútuue méra Sítíbéni tagowana wene aru ukiqme míonsabe wene auranabiah íopeqté áníné auranabiah tahnsa ágúwe.

7

Sítíbéniga teriu ehwéhne.

1 Manikáne ehweh mibeq mahbeq arító kene wahnahnka Sítíbéninsabé kasenéna, Segá irare ehwéhmé aiq pútaqpo úwe.

2 Úwana Sítíbéniga mahraréna, Nánuwahraho, kawerue írátíáhro. Naho naho itene igaqna Ébáráhmaga Áráni suwahpeq íre pokútaq

Mésópotémia marákórápéq míowana Maniká anotah pagégé áninká íopeq auwena Ébáráhmaba séna

³ wensabé ehweh teawena, Arene marakówé arenawahrahwe sue teawéna marakórápéq pokúno teawuwe.

⁴ Teawuwana Ébáráhmaga Kária kené marakórapeq suena pokue Áráni suwahpeq kowíowana mitaq wenabo pukúwe. Pukúwana Manikánka ite amahnága míona marákórápéq Ébáráhma eqmarowe.

⁵ Eqmarowana súwana Manikánka Ébáráhma mahtaqté márakó íre eqatowe. Pehgáriq marákó íre eqatasá peh teawena, Mókake arereq arenanahréhreq iníe úwe. Mi ehwéh teawu tanahráq Ébáráhma íre wenahninkákáq ání míowe.

⁶ Manikánka we mó teawena, Arenanahréh mókake wáhnaupéqté kéné marakórapeq míagehe. Mi kegá arambehrriraq saiqraritera subiqmarera áhnte opéq 400 opéq síwíloqnagehe.

⁷ Síwíloqnehra ke kamah arinauge. Kamah ariénaraq arenanahréhga mitaq suera mahtaqté márakóráq ínénabe iwiáh iwiáh aintagéhe teawuwe.

⁸ Teawu ehwéh ahreraq kankeheéna Manikánka Ébáráhmansabé, Áú amurúrue sansa miraúno úwe. Úwana Ébáráhmaga animai wenawíq Áhísáhki maqatowana abapete apahtáró wéhékáh ména wenahniné áú amurú auwowe, Áhísáhki weh úkéna animai wenawíq Sékópa maqatowe. Maqatowana Sékópaga airápété téhtaré anímái

masitowara wene ahninkáwáréh itene igaqnaréh úkuwe úwe.

⁹ Sítibéniga mó mahraréna, Sékópane ahninkáwáréh airápété téhranité méra se ábárahahnahnka sensíbáq Sósépa abiahnsanéra wáhnaupéqté ké eqsitera móne meyówe. Wáhnaupéqté kégá Sósépa meqmera Ísípi marákórápéq móátówana Manikánka wereq mía míáéna

¹⁰ mó kegá we íre kawerató tanahráq séhréh atowe. Ísípi marákórápéqté wáhnáhnká Sósépa áhrabútaq Manikánka kaweq iwíah atowana Sósépaga ahtebia éhwéh irarúwe. Ahtebia éhwéh irarúwana Ísípi wahnáhnká, Mah anímé kaweq iwiáhire éna Sósépansabé, Arega moke Ísípi marákóákáq néne nahtapeqté ménsáméhnsánkákáq wahnahnúno atowe.

¹¹ Mi tanáhráq Ísípi marákórápéqkákáq Kénáni marákórápéqkákáq anotah ehwéhrótaq áhnte kene sirupipeq umeh aguwara moq itene igaqnaréh táhutahuq íre kowe.

¹² Íre kowana Sékópaga Ísípi marákórápéq táhutahuq kéhre u ehwéh irena wenahnimáhq táhutahuq sabatáhq Ísípi marákórápéq téh eqmaq suowe.

¹³ Eqmaq suowara Ísípi marákórápéq pokéra táhutahuq mewera sene nahtapeq kouwekuwe. Mi tahutáhúq parabagúwara se Ísípi marákórápéq mó pokutaq Sósépaga wenawahrehyabe, Íné iteríbáq múge ue pahsuqme teriuwe. Pahsuqme teriuwana Ísípi wahnáhnká moq Sósépane awahwáréh ahtebówe.

14 Ahtebówana Sósépaga wene awahwáréhyabe, Nánibo Sékópa meqmeq sero éna eqmaq suowe. Eqmaq suowara awahwáréhgá sensíbo koweqmera áhnte wehekéq 75 wehekéq weba suwe.

15 Sékópaga Ísípi marákórápéq tuména mitaq pukúwara anehe itene igaqnáréh moq mibeq pukuwe.

16 Ébáráhmaga naho maisaró marakó áwíq Sékéma ebah monéráté paiqmarowe. Ámóríne ahninkáwáréhgá, Maisia marakó meyo atówana paiqmarowe. Itene igaqnáréhgá pukuwara sene animárínká sene ayahnsa mewera mina maisaró marakórápéq ónapipéq móárówe úwe.

17 Sítibéniga mó mahraréna, Itene igaqnáréhgá Ísípi marákórápéq mía míáéra peh íregárítáq aguwe. Manikánka Ébáráhmanásabé marakó iníe teawu ehwéh áhnibórá mirainaútaq itene igaqnáréhgá íregárítáq aguwe. (*Stat 15.5; Buk Song 105.24*)

18 Íregárítáq aguwana Sósépa pukúwana Ísípi marákórápéq we íre tagario anínká wahnah aní úkúwe.

19 Mi anínká wahnahnéna itene igaqnáréhyabe péhe aritena síwíognówe. Sene animárínká pukige-heéna wega sensabé, Ani maqmaréhrataq mewe máhpeq súáhro aritowe.

20 Mi tanáhráq wenanoga Mósísi maqmarowana Manikánka, Aiq kaweq aníne íwiáh atowe. Apahtáró ío sega wenabone nahtapeq kopípéq kirabo atowe.

21 Apahtáró ío parabagútaq subíyeho éra máhpeq kopípéq áuwówe. Kopípéq áuwówana Ísípi

marákórápéqté wáhnáhné ayahunkawagá we tagéna, Kaweq aníne íwíáhéna meqmena wewene ani tahnsa kirabo atowe.

²² Kirabo atowara Ísípi kegá Mósísi áwáhnoruwana we moke Ísípi kené sánsá ahtebówe. Ahtebéna we págege ahtébiá ání úkéna wene ehwehnkakáq wene arambehriakáq págegeue miraúwe úwe.

²³ Sítibéniga mó mahraréna, Mósísi 40 opéq ména, Nánuwahrah Ísara kebá koraganie íwíáhéna koragówe.

²⁴ Peh morá Ísípi anínká Ísara aní subutaq Mósísiga tagéna wenawahrah aní éhnehéna mi Isípi ání subiq suowe.

²⁵ Subiq suena iwíáhéna, Manikánka ínénabe, Arenawahrah séhréh arito éna omaq intowe. Omaq intonsabé nánuwahrahga aiq tagaríáhwe íwíáhúwara wenawahrahga íre tagaríówe.

²⁶ Mó wehekáh wenawahrah aníté tobehuyataq Mósísiga tagéna ayositanieéna sensabé, Ite morá káhnáh móye. Aneqsabé tobehoyo úwe.

²⁷ Úwana ahbabárato aninká Mósísi pagunsuena wensabé, Insegá wahnhahnarito teawátáiro?

²⁸ Inokáh Ísípi aní subiq sutonanserah íné moq nubiq suaníbo úwe.

²⁹ Úwana Mósísiga mitaq suena pehbeheráh pokue wáhnaupéqté kéné marakó áwíq Míríána marákórápéq kowíowe. Nahnsó aní kowéna mibeqté áhré meyowana téhtaré ánímáíráré maqmarowe úwe.

³⁰ Sítibéniga mó mahraréna, Mósísiga mitaq 40 opéq míowe. Sáwéh áwíq Sáinái wega mitaq

wahtotaq abataq marákórápéq noguwe. Mitaq noguwana káriq awánká irarówana íópeqté áninká mi iráípéqté ábóraragúwe.

31 Ábóraragúwana Mósísiga tagéna áhtenéna, Wahtotaq koraganie íwíahéna sútaq Manikánka teawena,

32 Íné arene aigaqnaréhne Maniká múge. Íné Ébáráhmareh Áhísáhkireh Séköparehne Maniká múge úwe. Úwana Mósísiga iransánéna áhreú púana aura íre pankeqme tagówe.

33 Íre pankeqme tagówana Manikánka wensabé, Íné míó púaḥ arega órira marákórápéq iriwe míahne. Minayabe arene súu ugurúruqme pehipi iriwe míahno.

34 Ísípi marákórápéqté kégá Ísara ke néne animári síwíoqnahtaq tagaríóge. Segá uwo uwo aruqarurotaq íróge. Ínéga mibeqté meriqmena móbeq móritanieéna tumióge. Mósísio, are Ísípi marákórápéq eqmaróge. Pokúno teawuwe úwe.

35 Sítibéniga mó mahraréna, Mósisi ítaq mahbí míotaq Ísara kegá wensabé ahqáho atera, Insegá wahnhahnarito teawátáiro uwe. Mina ahqáho ató ánime Manikánka arenawahrah amahnága Ísípi marakóráq míowah kowahnahnue meriqme mérito atena eqmarowe. Mósisi abatapi míowana káriq awánká irarowana íópeqté áninká mi iráípéqté ábóraragútaq Manikánka Mósisi eqmarowe.

36 Eqmarowana Mósísiga Ísípi marákórápéq ótaq sansá miraéna mi marákó suena wání aroipéq áwíq Káhtore Waní ayehráq móritowe. Móritena mitaq

mó otáq sánsá miraéna abatapi móritena mitaq mó otáq sánsá miraúwara 40 opéq míowe.

37 Mósísiga Ísara keyábé, Manikánka ínénsabe, Néne ehweh korero éna eqmaq nuwonserah mókake mó wene ehweh terí ání iteruwahrahni eqmarankéhe teniátáire úwe.

38 Mirarena mi tanáhráq Ísara ke abatapi míowana Mósísi seba míowana íopeqté áninká Sáínái sawéhráq Mósísi ehweh teawuwe. Teawuwaná Mósísiga itene igaqnaréh mi ogá mé ehweh teriuwe úwe.

39 Sítibéniga mó mahraréna, Itene igaqnaréhga Mósísine ehweh anteruera wensabé íre iuwah-behre éra Ísípi marákórápéqsábé sirutaboiruwe.

40 Ísara kegá Mósísine awahwá Áróninsábé, Arenábáq Mósísi ite Ísípi marákórápéqté meitái aní aiq taqnobagire. We eheq míehrapómo. Ite ebeq itáh mánikámári míagehboq arene ayahnkaratáté maniká tahnsa náneqmarí miraúno uwe.

41 Miraúno éra itene igaqnaréhga káho áráhq tahnsa náneq mirarówe. Mirarera minayabe titirarera sene siyahtate miraró naneqsabé iwíáh íwíáh atówe.

42 Iwíáh íwíáh atówana minayabe Manikánka se suowara sega íopeqté náneqmarínsábé iwíáh íwíáh atówe. Minayabe Manikáne ehweh irarú aninká naho sehiranúwana wene ehwehnka mahraréna, Ísara keo, itega 40 opéq abatapi méq itega ménkámehnká subiqmareq titirurowe. Íre ínénsabe iwíáhhéq subiqme titiraintárówe.

43 Péhepehe maniká Móríkine sériraté pearó wehuwéhú nahtapéq móateq mi nahnkákáq sehgieq

poku pokuurowe. Itega wehyoq tahnsá náneq mirareq wenawíq Árépánie ateq itene manikáne atarówe. Iwíah íwíahoneheéq itega mi pehepéhé mánikámári mirarurowe. Miraruronsabé Pábíróni marákórápéq seberaebéq eqmaq iuwanauge ire úwe. *(Amos 5.25-27)*

44 Sítibéniga mó mahraréna, Itene igaqnáréhga abatapi míotaq Manikánka Mósísinsabé, Ínénabe iwíah íwíah aintéhna sériraté wéhuwehu nah mahraue pearo úwe. Manikánka Mósisi sokigiúnserah itene igaqnáréhga mirarówe.

45 Itene igaqnáréh pukuwara sene animárínká mi seríraté pearó wehuwéhú náh sehgiwera wehukení wenawíq Sósúa kérówe.

Manikánka itene igaqnáréh séhréh aritená sene naruq kaqsuowe. Kaqsuwara itene igaqnáréhga sene naruone marakó meyówe. Mewera mi seríraté pearó wehuwéhú náh sehgiwera kowiówe. Mi nah áhnte opéq kagaúwana Tébíti Asiu kené wahnah úkéna

46 kaweqlaq mía míaúnabe Manikánka wensabé arutaboírúwe. Arutaboírúwana Tébítiga iwíahéna, Nigaqna Sékópane Maniká kaweqlaq nahupéq míankehboq pearaníe iwíahéna Manikánsabe, Arene nah pearaníe úwana Manikánka ahqáho atowe.

47 Ahqáho atowana wenahni Sórómóniga Manikáne nahtapeq pearowe.

48 Pearowana Manikánka anotah aní mía míai puana wega íre peh morá wehukega pearáh náhtapéq mía míaire. Minayabe wene ehweh irarú aninká mahraréna,

49 Itene Wahnahna mahraréna, Íópeqmé néne wahnahnu síah tahnsane. Mah marakó

márákówé néne nigúnúbá tahnsane. Minayabe íné moke iópeqkákáq mah marákó márákóákáq wahnah wahnahnuge. Minayabe aneq nah peintanéhbo? Íné íre ahreno aní múge.

50 Ínélataq ínéga moke mah marákó márákórápéqté náneq miraráhwa mino ire úwe teriuwe. (*Ai-saiia 66.1-2*)

51 Teriena Sítibéniga mó mahraréna, Ite saiyoue píribahri ke wóe. Itene irupipeq íre irasa, ahre parosa ké wóe. Ite Manikáne Awansabé ahqáho atáh ké wóe. Itene igaqnaréhga miraunserah itega amahnága miraowe.

52 Itene igaqnaréhga Manikáne ehweh iraru ke moke síwioqno mino. Íre áwíoqno aní insebo? Naho Manikáne ehweh iraru kegá mahraréra, Mókakewe kaweqtaq mía míai aní mahtaq tumíanawire uwara itene igaqnaréhga mina iraru ke subiq súówe. Segá miraunserah itega moq miraurowe. Kaweqtaq míeh ání tumíowaq itega táhtoqmeq móateq subiq sutowe.

53 Íópeqté kégá Manikánka sehgóro ú ehweh teiéwaq itega íre ireq mi ehwéh anteruq anteruro mino úwana wene ehweh aiq parabagúwe.

Sítibéni subiq súó ehwehne.

54 Sítibénine ehweh parabagúwara író kega anotah abíáhnsánéra sirupipeq págege aguwe. Segá Sítibéninsabé anotah abíáhnsá atówana

55 Manikáne Awanka wene arupipeq ména séhréhue págege atowe. Séhréhue págege atowana Sítibéniga iópeq ebitáwéna Manikáne téhreh

naneqkakáq tagówe. Sísawe Manikáne ayah púpeq iriwe míowana tagéna

⁵⁶ mahraréna, Tagahro. Íopeq sawekirana wehukení úkurai anínká Manikáne ayah púpeq iriwe míéhrana tagoge úwe.

⁵⁷ Úwara sega kareéra ahre parotawéra moraráq peheráh kure Sítibéni táhtoqme

⁵⁸ panantáwera ahnansahrapeq móatera sene káhq ambántámári mitaq marówe. Mitaq marówana wehukení wenawíq Soraga mi ambántámárítáq wahnahnúwara ebahnasa tuparuqme subiq súówe.

⁵⁹ Segá ebahnasa tuparuqme subiq súótaq Sítibéniga púrerue mahraréna, Sísao, are néne Wahnah mone. Néniwa meyo éna

⁶⁰ arehunseraráq ména anotah ehwéhnue púreréna, Néne Wahnahno, sene ahbabáqsabe íre ayahqmaro ue púreréna putiowe.

8

¹ Putiowana Soraga iwíáheña, We pukime aiq kawerire úwe.

Sorarehga Sísá tagaríáh ké síwíoqnówara pokue abae agu ehwéhne.

Mi wehekáh mó kegá Sarúsarama su wahpeq Sísá tagaríáh ké anotahtaq síwíoqnowe. Síwíoqnowara sega pokue Súría marákórápéqkákáq Sámária marákórápéqkákáq abae aguwe. Ómi Sísá tagaríáh kegá abae aguwara peh morá Manikánka eqmaro kega Sarúsarama su wahpeq mitaq míowe.

² Táhmaro kaweq kegá Sítibéni mómaisarera wensabé sirutaboirera anotahtaq ibisowe.

³ Ibisowana Soraga Sísa tagariáh ké anotahtaq síwíoqnéna mó nahtápéq mó nahtápérue kienaweh ahre táhtoqme panantáwena karábúsiipéq móritowe.

Píripiga ótaq sansánú ehwehne.

⁴ Abae agu kegá poku pokuurabeq Sísane ehweh teri teriuwe.

⁵ Píripiga Sámária ke su wahapeq mó anotah matábúrápéq tunse, Sísawe Manikánka omaq ato aní míre éna Sísa Karáhéne ehweh teriuwe.

⁶ Áhnte kegá wene ehweh irera ótaq sansámári tagéra wene ehweh kawerue írówe.

⁷ Mi otáq sánsámé Píripiga owainawamarí áhnte wehukéné sirupipeqté kaqsuwara íre kaweq karéaruera poké aguwe. Wega sinonka mareqmareragú kereq soriqnah kereq kaweraritowe. Minayabe ómiga tagéra wene ehweh kawerue írówe.

⁸ Minayabe Sámária kené sirupipeq eyoyóúwe.

Ahgora anínká miraú ehwehne.

⁹ Peh morá áhgórá ání wenawíq Sáimóni mitaq míowara ómi Sámária kegá anotahtaq áhtenuwe. Sáimóninga menahmé págege sansánéna, Íné anotah aní múge íwíáhúwara

¹⁰ ómi anotah kereq íre síwíqkakaq kereqka wene ehweh kawerue irera wensabé, Maniká págege anínéna wega mi aní págege atéhnsabé we anotah pagégé áníne atówe.

¹¹ Mi ahgórá ánínká íre wahto tanáhráq ótaq sansá mira aruqaruru púara moke áhtenéra wene ehweh kawerue irera we kérówe.

¹² We kérówana Píripiga Sísa Karáhé áwíqsabe teriena mó kawéq éhwéh Manikánka wahnah wahnahni ehwéh teriuwara weh ahrega mi

ehwéhnsábé aiq pútare atówe. Aiq pútare atówana wání meriuwana

¹³ mi ahgórá ání Sáimóniga moq aiq pútare atowana wání meawuwe. Píripiga ótaq sansámári miraútaq Sáimóniga anotahtaq áhtenéna kérōwe.

Manikáne Awanka Sámária kebá tu ehwehne.

¹⁴ Sámária su wahpeqte kégá Manikáne ehwehnsabé aiq pútare atáhwe teríuwara Sarúsarama su wahpeq eqmaro kega írówe. Írótaq sega Pítareq Sónireq Sámária marákórápéq eqmaq súówe.

¹⁵ Eqmaq súowara mitaq séra Manikáne Awanka mi kené sirupipeq tumíankeheéra siyahnkaratátē táhtoqme púreruye.

¹⁶ Pítararégá íre suyataq mó kegá itene Wahnah Sísá áwírue wání meriútaq Manikáne Awanka sene sirupipeq íre tumíowe.

¹⁷ Minayabe Pítararégá siyahnkaratátē táhtorera púreruyana Manikáne Awanka Sámária kené sirupipeq tumíowana

¹⁸ Sáimóniga mina tagówe. Tagéna móne mewe séna Pítararéyábé,

¹⁹ Niyahnkaratátē mó ke táhtoráhnaraqmé Manikáne Awanka sene sirupipeq tumíankehboq págege aintáhtao úwe.

²⁰ Úwana Pítaga wensabé, Arene móneakáq arenkakáq toráh aginiewóne. Manikánka pehipí awina naneq íre paiqmarahráhóne. Arega mira íwíahóna puah iraipéq toráh aginiewóne.

²¹ Itega miraúya arámbéhrí arereq wehgaqpo? Manikánka arene arupipeq tagaríéhre. Arene

arupipeq íre kaweq iwíáhóna puah arega itene arambehri íre miraorahóne.

²² Arene ahbabáq iwiáh sue mahraue púreré, Nirupipeqté áhbábáq iwiáh kawerainto úno.

²³ Arene arupipeq tagome ahbabáqka kíragírá atiéhre úwe.

²⁴ Úwana Sáimóniga Pítansabé, Arega iraréna ehwéh aiq pútaragínehboq púrerainto úwe.

²⁵ Pítareq Sónireqka mi ke su wahpeq méra, Sísaga ite anotahtaq séhréh aitáráire éra Sísane ehwéh teriuye. Teriera mitaq suera Sámárlia marákórápéq mó mapéq mó mapérue kaweq ehwéh teriera Sarúsarama su wahpeq kouwekuye.

Píripiga Ítíópía marákórápéqté ánínsábé teawu ehwehne.

²⁶ Manikáne íopeqté áninká Píripinsabé, Sokah sokahue Sarúsarama su wahpeqte Kásá su wahpeq kuriéh áh abatapíté áhtápéq pokúno úwe.

²⁷ Pokúno úwana sokah sokahuena pokúwe. Pokéna mi ahtápéq kútaq Ítíópía aní tagówe. Naho mó kegá sene íre kaweq sansá miraéra mi Ítíópía áníné awahnata pirúówe. Mi anímé Ítíópía marákórápéqté wáhnáh íní wenawíq Kántásine móneraq wahnah wahnahnú aníne. We Sarúsarama su wahpeq Manikánsabe iwiáh iwiáh atórabeq kéna kouwekúwe.

²⁸ Kouwekéna we óserarégá sabirue nogí káhréipéq tútuue ména Manikáne ehwéh irarú ani Áísáíaga sehiranaro ehwéh sáhnsahuwe.

²⁹ Sáhnsahuwana Manikáne Awanka Píripinsabé, Mi aníné káhreraq wahtotaq kowíahno úwe.

30 Úwana Píripiga pehbeheráh weba kútaq Áísáíaga sehiranú ehwéh sáhnsahuwana irowe. Irena wega kasenéna, Arega sáhnsahona ehwéh aiq ahtebahno úwe.

31 Úwana, Mó anínká íre níwáhnorinsabé árahue ahtebaninkono? Arega mah kahréípéq ínéba mah-beq kieague kirútuúno úwe.

32 Ítíópia anínká sáhnsahu ehweh, Manikáne ehwehnka mahraréna,

Sipisípiq suboneheéra meráhtáq sipisípiqka ehiya míéhre. Mina inserah wega ehiya míéhre. Sipisípiq áyó kiraqsúéhtáq sipisípiqka íre kureq kurerire. Mina inserah wega íre ehwehnire.

33 Segá we ehweh atáhtáq íre aiq pútaq ehwéh irarewe. Subiq súáhnsábé we mah marákóípéq íre míéhre. Segá wene oga mé tanahráq parabarúáhwe. Wene animári íre míáh púara wehukega se éhweh íre terieráhowe ire. *(Aisaia 53.7-8)*

Ítíópia marákórápéqté ání wání meawu ehwehne.

34 Ítíópia anínká Píripinsabé, Iraníboq tenio. Manikáne ehweh irarú aninká insensabé irarúwo? Wewensabé irarúwo? Mó anínsabé irarúwo kasenúwe.

35 Kasenúwana Píripiga mi ehwéhtárue Sísane kaweq ehwéh teawuwe.

36 Segá wání aroipéq suyataq mi anínká Píripinsabé, Tagáhno. Wání mahtaq kéhre. Arega wání meniníbo kasenúwe.

37 Kasenúwana, Arene arupipeq Sísansabé aiq pútare atéhnaraq wání meawiníe úwe. Úwana mi

anínká, Sísa Karahé Manikáne ahninkáwáe. Minayabe aiq pútare atóge úwe. Aiq pútare atóge éna ³⁸ óseraréyábé, Túbáh agotao aritowe. Segá wání aroipéq tuyana Píripiga wání meawuwe.

³⁹ Wání aroipéq suera kíyataq Manikáne Awanka Píripí meawuwana Ítíópía anínká we mónekakáq íre tagéna ahtapeq pokútaq wene arupipeq anotah eyoyóúwe.

⁴⁰ Eyoyóúwana Píripiga Ásáróta suwahpeq ábóraq kéné mó natáq mó natárue wega Sísane ehweh teri terinúwe. Teri terinéna Sésaría suwahpeq kúwe.

9

Soraga Sísa kéro ehwehne.
(Eqmaro 22.4-16, 26.9-18)

¹ Soraga Sísa tagariáh kékabé anotah ehweh aritená, Mi ke síwloqnéna subiq suaníe íwíahéna Manikáne ehweh mibeq mahbeq arítah kéné wahnahpa pokúwe.

² Pokéna wensabé, Sísa tagariáh kék weh ahre tagéna táhtoqme koweriqmena Sarúsarama suwahpeq méritaníboq páhsíwarí nánio. Támákása suwahpeqte Asiu kené momiwí nahmáritápéqté kék sokigi ariniboq páhsíwarí nánio úwe.

³ Úwana mi anínká páhsíwarí sehiranue awuwana Soraga mewena Támákása suwahpeq pokue wahtotaq kútaq apubúue íopeqté Manikáne téhrehnka anotahtaq téhrówe.

⁴ Téhrówana wega marakóipeq mûrunsurahúwana íopeqté éhwéhnká iraréna, Sorao, Sorao, aneqsabé níwloqnahno úwe.

5 Úwana Soraga iraréna, Anotah aníno, are insebo úwana, Íné Sísa uge. Íné arega níwíoqnáhna aní múge.

6 Irigue mi ke suwahpeq pokúno. Mitaq arega mirainieóna arámbéhrí éhwéh peh morá áninká teawinkéhe úwe.

7 Úwara Sorareq nogú kega mi ehwéh irera wehuke íre tago puara peh ehiyansá síwéh panantágúwara míowe.

8 Soraga irigue aura pankeqme ebiena tagótaq íre tagahraháhuwe. Íre tagahrahúnsabe wereq nogú kega wene ayahtaq panantáwera Támákása suwahpeq móatówe.

9 Móátówana apahtáróráq wene aura íre tagahrahéna wáninkakaq táchutahuqkakáq awehriúwe.

10 Awehriúwana Támákása suwahpeqte ání Sísa tagariéh ánínéna wenawíq Ánáníásie. Ánáníásine awanka tagówana Manikánka áhrabéna, Ánáníásio úwe. Ánáníásio úwana, Mahna míoge úwana

11 Manikánka wensabé, Wehukení wenawíq Súrásae. Irigue wene nahtápéqté áh áwíq Obarisa áhtápéq pokúno. Wene nahtapeq Tahsa suwahpeqte ání wenawíq Sora ména amahnága púrerire.

12 Métáq wenawanka tagéwéhtáq wene aura ebieyabe arega weba sure táhtorahnana wene aurranka tagehre. Weba koragáhno úwe.

13 Úwana Ánáníásiga mahraréna, Áhnte kegá arega iraréna aníné ahbabáqsabe teníátowe. Sarúsarama suwahpeqte Sísa tagariáh ké wega íre kawerarítáráire.

14 Moke arenáwírue áhrabo ke karábúsiipéq móritanieéna sire. Manikáne ehweh mibeq mahbeq arítáh kéné wahnahmarínká páhsí awera pokue komiraúno átárówe úwe.

15 Úwana Manikánka wensabé, Pokurio. Néne arambehri mirainkeheéna omaq atáráuge. Wega Ísara kereq wáhnaupéqté kéréq sene wahnahmarínseq néne ehweh korerinkéhe.

16 Néne arambehri miraínayabé mó kegá we anotahtaq áwíoqnagehe. Minayabe sokigi awinauge úwe.

17 Úwana Ánáníásiga pokue Sora mío nahupéq kibekéna wene ayahtate táhtorena wensabé, Sorao, are náníbáq móne. Arega ahtapeq séwaronaraq itene Wahnah areba séwíarai ani wenawíq Sísaga eqmaq núwéhre. Arega mó tagehnana Manikáne Awanka arene arupipeq sewíankeheéna eqmaq núwéhre úwe.

18 Úwana Sorane aura ahra tahnsá akariatio naneq apubúue megúwana tagéna irigúwana wání meawuwe.

19 Wání meawuwana táhutahuq nówana wene anonka págege agúwe.

Soraga Sísá éhweh pahsuo ehwehne.

Táhmaro wehekáh Soraga Sísá tagariáh kébá Támákása suwahpeq ména

20 apubúue Asiu kené momiwí nahtápéq kiwéna Sísá éhweh teriena, Sísawe Manikáne ahninkáwáe úwe.

21 Úwara wene ehweh író kega moke áhtenéra mahraréra, Irari anínká Sarúsarama suwahpeq ména Sísá áhrabo ke síwíoqnéna karábúsiipéq sitárái mino. Mahtaqkákáq mirainieéna surai mino.

Wega Sísa áhrabo ke táhtoqme táchruue Manikáne ehweh mibeq mahbeq arítáh kéné wahnahpa móritanieéna surai mino uwe.

²² Uwana Soraga págege ehwéh irarú ani úkue kaweq tábúsoqme ehweh teriena, Mah marákó márákóípéq sína aní, Manikánka omaq ato anímé Sísa wire ue tábúsoqme síwáhnorúwe. Tábúsoqme síwáhnorú púara Támákása su wahpeqte Asiu kegá mó íre irarerahowe.

Áhnte Asiu kegá Sora subiq suonehera unsabe pokú ehwehne.

²³ Áhnte wehekáh sótaikúwara Asiu kegá momiwíue sío síoéra, Sora subiq suanéhe íwíáhuwe.

²⁴ Subiq suanéhe íwíáhéra moráénuwana mó anínká sene ehweh irena Sora koreawuwe. Koreawuvara sega suboneheeéra Támákása su wahpeqte áhnásáhrápéqté áhtápéq wéhékáhnkakaq inokáhpeqkakáq wahnah wahnahnuwe.

²⁵ Wahnahnuwara inokáhpeq Soraga anotah pa hsíkétíípéq tútuue míowara we kéró kega méatera náhníáqtate páhsíkétiraq iwe panantáwe tunse ebah kuri pera máhpeq márúnátówe.

Soraga Sarúsarama su wahpeq síwáhnorú ehwehne.

²⁶ Soraga Sarúsarama su wahpeq pokéna, Sísa tagariáh kéká kowíanauge íwíáhuwara sega wensabé áhreeéra, We íre aiq pútaq Sísa tagariéh ání míre íwíáhuwe.

²⁷ Iwíáhuwana Páhnábásaga Sora meqmena eqmaro keba móatowe. Móatena sensabé, Mah anínká ahtapeq itene Wahnah tagairana wega ehweh

teawátáire. Teawátáirana wega Támákása suwahpeq Sísa éhweh págegeue síwáhnoruraire úwe.

28 Úwana Soraga Sísa tagariáh kéká mía míáéna Sarúsarama suwahpeq íre áhreia peh mó minatáq mó mahnatárue Sísa éhweh págegeue síwáhnorúwe.

29 Síwáhnorúnsabe wereq Káríki ehwéh iraru Asíú kerekka ehwehuwe. Mi kegá, Sora subiq suaneheqmúne íwíáhuwara

30 Sísa tagariáh kégá mina irera Sora meqmera Sésária suwahpeq márunatera mibeqté Tahsa suwahpeq eqmarówe.

31 Eqmarówara mi tanáhráq mó kegá Súría marákóákáq Kehrari marákóákáq Sámária marákóákáq Sísa tagariáh ké íre síwíoqnia peh míówe. Peh míowara sirupipeq Sísame sánsá ahtebéra kawerue mirauwe. Manikáne Awanka págege aritena sirupipeq kaweq iwiáh aritowara íregáritaq mó wehekéqká Sísansabé aiq pútare atera kawerue kérówe.

Pítaga Áínía kawerato ehwehne.

32 Pítaga Sísa tagariáh ké míó nahmárítápéq poku pokuúwe. Pokéna Áríra suwahpeqte Sísa tagariáh kerekpa tuwe.

33 Mi ke suwahpeq mío aní wenawíq Áíníae. Wega abapete apahtáró ópéq wene máhriqtaq ména ah íre nogoráhúwe.

34 Ah íre nogoráhúwana Pítaga we tagéna wensabé, Áíníao, Sísa Karáhéga amahnága kaweratéhre. Irigue arene máhriq sabaráwe sokah sokahúno úwana wega apubúue irigúwe.

35 We kaweragúnsabe moke Áríra suwahpeqte kéréq Sáróna suwahpeqte kéréqka tagéra Sísansabé aiq pútare atera, Wene sánsá sehigionéhe íwíáhuwe.

Tókási pukú ehwehne.

36 Sópa suwahpeq mío iní wenáwíq Tábítæ. We Sísá tagariéh ání míowara Káríki ehwéh iraru kegá Tókásie ue áwíratowe. We kaweq arámbéhrí iní ména íre arambehrioraho ke séhréh aruqarurúwe.

37 Píta Áríra suwahpeq míotaq mi iní anotahtaq awahreue pukúwe. Pukúwara wene anonka pabeq paberue abobórähpeqte náhtápéq átówe.

38 Sópa suwahpeq Áríra suwahpeq wahtotaq kowara Sísá tagariáh kégá Pítawe Áríra suwahpeq míéhre u írówe. Irera téhraníté Pítaba eqmaq suera, Pehbeheráh súno koreawétao éra eqmaq súówe.

Tókási oga úkú ehwehne.

39 Eqmaq súówara pokue koreawúye. Koreawúyana Pítaga se kériowe. Eqmaq súó keba suwara sega meqmera abobórähpeqte nahtapéq móátowara mibeqté kewéínínsónká Pítaba íriwe méra ibisowe. Ibiséra Tókási oga míotaq miraro korósí Pítá sokigiue teawúwe.

40 Pítaga se moke máhpeq kaqsuena arehunseraráq ména púrerúwe. Púreréna pabeqme putio anínsabé, Tábítao, irigúno úwe. Irigúno úwana wene auranka tagéna Pítá tagótaq máhriqtaq kirútuue míowe.

41 Míowana Pítaga wene ayahnkara táhtoqme pankeq auwowe. Pankeq auwena keweinínsónseq mó Sísá tagariáh kereqsabé síáhrabéna sensabé, Seragahro. Oga úki aní tagahro éna sokigi ariuwe.

42 Moke Sópa suwahpeqte kégá oga úkú ehweh irera áhnte kégá Sísansabé aiq pútare atówe.

43 Pítaga áhnte wehekáh Sópa suwahpeq ména ménkámehnkáne áú kaweraqari aní wenáwíq Sáimónine nahtapeq kaegaeúwe.

10

Íópeqté áninká Kóníria teawu ehwehne.

1 Sésaría suwahpeq mío weh wenáwíq Kóníriae. We áhnte Aroma sontiá ké 100 Ítári marákórápéqté sontiá kéné kiápéténí míowe.

2 We Maniká awahbeh sansa sehgiu aníne. Mi karírónáninká Manikánsabe iwiáh íwíahéra wene sánsá sehgiúwe. We íre arambehrioraho ke nári nárinena Manikánsabe púreq aruqarurúwe.

3 Ío tunsorerutaq wenawanka tagówana Manikáne íópeqté áninká weba súwana kawerue togówana wensabé, Kóníriao úwe.

4 Úwana we ebitáwéna áhreéna wensabé, Árahono úwe.

Árahono úwana íópeqté áninká wensabé, Arega púreq aruqarurónawe Manikánka irena arega tabonah ke nári nárinónawe wega tagéna arensabé kaweróne atéhre.

5 Wehukení wenáwíq Sáimóni we mó awíq Pítæ. We Sópa suwahpeqte koweragéhboq wehuke eqmaq suo.

6 Pítaga ménkámehnkáne áú kaweraqari aníné nah sóreq waní áhkórapeq kék náhpípéq kaegaeire.

7 We koweragéhboq wehuke amahnága eqmaq suo éna pokúwe. Pokúwana Kóníriaga wene arambehriuya anítéreq peh morá sóntiá ánínseq

síáhrabúwe. Mi sontiá ání Maniká awahbeh sansa sehgi ání ména Kóníría séhréhú ani míowe.

8 Síáhrabéna su ke íópeqté áníné ehwéh moke teriena Sópa su wahpeq eqmaq suowe.

Pítane awanka tagó ehwehne.

9 Mó wehekáh se ahtapeq Sópa su wahpeq áhníbórá kutaq Pítaga nah abogéhrapeq wehekáhnabubu púrerinieéna kiuwe.

10 Púreréna arupibiúwana, Tópahnsabé níre úwe. Mó kegá táhutahuq tíátótaq wenawanka tagówe.

11 Tagówana íópeq sawekúwana mipeqté anotah paráhnkéq tahnsa náneq tuwe. Ébeq ayéhráq ébeq ayéhrárue pagume we míorabeq mewerúwe.

12 Mi paráhnkéqpípqué áhnte menkáméhnkánkákáq karahrabahnkakáq kabarankakáq míowe.

13 Míowana íópeqté éhwéhnká mahraréna, Pítao, irigue mi kamári subiqme tíwe náhno úwe.

14 Subiqme tíwe náhno úwana Pítaga anotah ahqáho éna, Anotah Wahnáh ánino, ite Asiu kegá íre nona naneq kamári púana órirane. Naho íre narauge. Amahnága moq íre nanauge úwe.

15 Úwana íópeqté éhwéhnká mó mahraréna, Manikánka kaweraréh náneqsabé órirane atéhneho úwe.

16 Apahtáróráq ménkámehnká parahnkeqpípqué sáhue mewena márumarena tuekéna úwana íópeqté éhwéhnká mó apahtáróráq irarúwana íópipeq tumeyowe.

17 Wenawanka tagónsabe Pítaga áhtenéna, Néniwanka aneq tagehramo íwíáhúwe. Mira íwíáhútaq Kóníríaga eqmaq suo kega Sáiémónine

nah kabarue ábóraq marera ogesáh ogesáhrapeq
iriwe míowe.

¹⁸ Iriwe méra anotahtaq kasenéra, Sáimóni mó
awíq Pítá mahtaq kaegaeiro kasenuwe.

¹⁹ Wenawanka tagónsabe Pítaga iwíahútaq
Manikáne Awanka wensabé, Sáimónio, Írátíahno.
Apahránítogá arensabé anebahrowe.

²⁰ Iriwe tutagáhno. Ínéga se eqmaró púah iwíah
kikirinehboq pehipi kérilo úwe.

²¹ Úwana Pítaga seba tutagéna sensabé, Itega
kabaro anímé íné úge. Aneqsabé seo úwara

²² sega wensabé, Sántia kené kiápéténi wenawíq
Kóníríaga eqmaq íuwátáire. We kaweqtaq mía míai
aní ména Manikánsabe áhtenuwe. Moke Asiu kegá
iwíahéra, Kóníráwe peh kaweqtaq tabasíwe míeh
áníne íwíáhuwe. Maniká míehrabeqte íopeqté áninká
wensabé, Pítaga ehweh teinkéhboq siqmarehnara
arene nahtapeq koweráhro uraire uwe.

²³ Uwana Pítaga sensabé, Nahupeq kíoro éna
inokáhpeq kirabo aritowe. Ahbiahipeq Pítareq
we seweró kereqka pokuwara mó mibeqté Sísá
tagaríah kégá kérówe.

Pítaga Kóníríane nahtapeq kú ehwehne.

²⁴ Mó wehekáh Pítarehga Sésária suwahpeq
kuwe. Kóníríaga wenawahrahreq wene iyahnabo
anímárínseq siáhrabúwara sega wene nahtapeq
sure momiwíue Pítá áwénunuwe.

²⁵ Pítaga nahupeq kinautaq Kóníríaga weba séna
wene aigárátáq arehunseraráq ména wensabé
iwíah íwíah atowe.

²⁶ Iwíah íwíah atowana Pítaga wensabé, Irigúno.
Íné moq peh wehukení múge úwe.

27 Pítareq wereq ehwehnéra nahupeq kíúyara áhnte wehuké mitaq sáhuriówe.

28 Mitaq sáhuriówana Pítaga sensabé, Asiu kené sánsámé nahnso ke momiwíotaqmé Asiu kegá mibeq pokéyabe órira míre éq íre pokorahúne. Minayabe tagariáhwe. Manikánka sokigiue teniená, Mó ke peh abehq ké wóe íwíáhineho uraire.

29 Minayabe itega níáhraburowana pehipi surauge. Aneqsabé níáhraburoo? Teniéro úwe.

Kóníríaga Pítá teawu ehwéhne.

30 Kóníríaga Pítansabé, Mó mahsenahri amahnága tahná tanáhráq tunsoreráitaq nahtapeq púrerurauge. Púreruraugana patahga inserah téreh ambántánkákáq áninká íné míarautaq ábóraruraire.

31 Ábóraréna ínénasabe, Kóníríao, Manikánka arega púreróna ehwéh íréhre. Arege nári nárinóna sansá tagariéhre.

32 Minayabe wehukení wenáwíq Sáímóni we mó awíq Pítá kowero. We Sópa su wahpeqte kiweragéhboq wehuke eqmaq suo. Mó aní wenáwíq Sáímóni ménkámehnkáne áú kaweraqari aníne nah sóreq waní áhkórapeq kék náh Pítaga kaegaeire uraire.

33 Urainsabé are kiverageheéna apubúue wehuke eqmaq súátáuge. Eqmaq súátáugah arega suronawe kaweróne. Ite ómiga Manikáne aurátaq sewíone. Minayabe Manikánka korerio urai ehwéh amahnága moke teio úwe.

Pítaga Sísa éhwéh Kóníríareh teriu ehwéhne.

34 Kóníríaga, Moke teio úwana Pítaga sensabé mahraréna, Íné amahnága tagariómé Manikánka aiq pútaq moke mah kehiná kéhínánsábé monseráhnue arutaboirire.

35 Wensabé áhtenéra kaweqtaq mía míao keyábé arutaboirire. Íre peh morá Asiu keyábé moke mah kehiná kéhínánsábé arutaboirire.

36 Manikánka ite Ísara ke teiu ehwéhmé itega írátíahwe. Mi ehwéhmé Sísa Karáhewé mah kehiná kéhíná wahnahnarítéhre. Wene kaweq ehwéhnsábé aiq pútare atáh ké peh morá ké tahnsa úkowe.

37 Sóniga Kehrari marákórápéq kaweq arámbéhrí áhwáréna ehweh teriena wání meriuwe. Anehe ite moke Ísara kehiná suwahpeq mirauro sansá aiq tagaríahwe.

38 Manikánka Sísa Néhsara suwahpeqte ánípá Wenawa eqmatairana Wenawanka Sísa séhréh atena págege atáráire. Sísaga mó ke suwahpeq mó ke suwahperue pokue kaweq arámbéhrí arítáráire. Manikánka Sísaba mía míai puana owainawanka síwíoqneh ke kawerarítáráire. Ínéga teiú éhwéhmé aiq íráhwe úwe.

39 Pítaga mó mahraréna, Asiu kené marakórápéqkákáq Sarúsarama suwahpeqkakáq Sísaga moke mirarurai arámbéhrí ínéreq mó we kéró kereqka tagaraune. Ísara kegá Sísa awankátaq táhparera subiq sutowe.

40 Subiq sutowana pukúwana apahtáró wéhékáhtáq Manikánka Sísa iriwe organúq atáráirana wega iteba suraire.

41 Íre ómi kehinápá peh iteba surairaç taga-

raune. We organúq kuraitaq tagéq itereq wereq moraráq táchutahururaune.

42 Manikánka itensabé, Mah kehiná kékhná korériero. Sísa ínéga omaq ató áninká mókake moke oga míah kéreq pusa kéreq ehweh aritankéhe. Mi ehwéh tábúsoqme koreríero uraire.

43 Moke Manikáne ehweh iraru kegá mahraréra,
Mi aní áwíq áhrabéra wensabé aiq pútare atáh kewé
Manikánka sene ahbabáq kaweraritankéhe
uwe teriuwe. *(Aisaia 33.24,
53.5,6; Jeremaia 31.34; Maika 7.18; Sekaraia
13.1; Aroma 10.11; Kárétia 3.22)*

Manikáne Awanka nahnsó kebá tumío ehwéhne.

44 Pítaga mi ehwéh teriutaq Manikáne Awanka író kene sirupipeq tumíowara

45-46 sega kambare ehwéh iraréra Manikánsabe iwiáh iwiáh atówe. Iwiáh iwiáh atówara Sísansabé aiq pútare atáh Ásíú ké Pítareq su Asiu kegá irera áhtenuwe. Áhtenéra irarera, Manikáne Awanka íre peh morá iteba tumiéhre. Nahnsó keba moq tumiéhre uwe.

47 Uwana Pítaga mahraréna, Manikáne Awanka itene irupipeq tumíarainserah mah kené sirupipeq moq tumiéhre. Minayabe wání merieyabe insega ahqáho aitahráhiro úwe.

48 Insega ahqáho aitahráhiro éna Sísa Karáhé áwíqtaq wání meriéro úwara mi ke wání meriúwe. Wání meriúwara sega Pítansabé, Táhmaro wehekáh mahtaq míahno uwe.

11

Pítaga Sarúsarama suwahpeqte Asiu ke teriu ehwehne.

¹ Nahnso kegá Manikáne ehwehnsabé aiq pútare atárówe uwara Súria marákórápéqté eqmaro kereq mó Sísa tagariáh kéreqka írówe.

² Írówana Pítaga Sarúsarama suwahpeq kiutaq mibeqté síu amurúruó kegá ehweh atówe.

³ Ehweh atera, Íre Asiu kené nahtapeq árahinsabé pokue táhutahururono uwe.

⁴ Uwana Pítaga Kóníríane nahtapeq pokú ehweh mahraréna,

⁵ Íné Sópa suwahpeq púrerurautaq néniwanka tagaraire. Tagarairana íopeqté anotah paráhnkéq tahnsa náneq tutaire. Ébeq ayéhráq ébeq ayéhrárué íné míaraurabeq mewe tutaire.

⁶ Íné ebitawéna ménkámehnkánkakaq karahrabahnkakáq kabarankakáq mi paráhnkéqpípqué míaraire.

⁷ Míarairana íopeqté éhwéhnká iraréna, Pítao, irigue mi kamári subiqme tiwe náhno uraire.

⁸ Urairana ínéga anotah ahqáho éna, Íre nóna naneq kamári púana naho íre narauge. Amahnága moq íre nanauge urauge.

⁹ Uraugana íopeqté éhwéhnká mó mahraréna, Manikánka kaweraréh náneqme íre no naneq kane atéhneho uraire.

¹⁰ Mi ehwéh apahtáróráq irarurairana mi paráhnkéqkákáq íopeq tuekuraire.

¹¹ Tuekuraitaq Sésária suwahpeqte áninká, Íné koweniro únsabe apahránítogá íné kowenirane-heéra kaeurau nahtápéq suwe.

12 Suwana Manikáne Awanka ínénabe, Iwíáh kikirinehboq pehipi kériro urairaq ínéreq abapete morá mó Sísa tagariáh kéreqka se kérítáúne. Kérireq itega mi wehné nahtapeq kure kiraune.

13 Kiraunana wene nahtapeq íópeqté tutai aníné ehweh teiátáire. Teiena, Íópeqté tutai anínká ínénabe mahraréna, Wehukení wenawíq Sáimóni we mó awíq Pítá Sópa suwahpeq míéhre. We kiwérágéhboq wehuke eqmaq suo.

14 We sínaraq arereq arenawahrahreqsabé oga úké ehweh teinkéhe ire uraire.

15 Kóníriaga mi ehwéh teniátáirana ínéga Sísa éhweh áwaheue teriátáuge. Sísa éhweh áwaheue teriátáutaaq Manikáne Awanka sene sirupipeq tumíaraire. Téhwe itene irupipeq tumíarinserahnue tumíaraire.

16 We marakóipeq míaraitaaq Sísaga mahraréna, Sóniga wání meri merinínana Manikáne Awanka itene irupipeq tumíánkehé uraire.

17 Manikáne Awanka sene sirupipeq tumíarairana mi ehwéh niahrreraq káráire. Itega Sísa Karáhénsabe aiq pútare atárówana Manikáne Awanka itene irupipeq tumíaraire. Itene irupipeq tumíarinserah sene sirupipeq moq tumíaraire. Manikánka wewega miraruraire. Íné peh wehukení míó púana Manikánsabe árahue ahqáho ataníkono úwe.

18 Úwara sega Pítane ehweh irera túbáh aguwe. Túbáh agéra Manikánsabe iwiáh íwíáh atera, Nahnso keakáq sene ahbabáq súáhnsábé Manikánka organúq sítéhre uwe.

Sísa Karáhé tagaríáh kewé Ántíóka suwahpeq téhwe Kárísítíni kee ue síwírarító ehwehne.

19 Sítibéni subiq súó tanahráq sega Sísa tagaríáh ké síwíoqnowe. Síwíoqno puara sega Sarúsarama suwahpeq suera abae aguwe. Abae ague mó kegá Pónisia marákórápéq pokuwara mó kegá Sáipára marákórápéq pokuwara mó kegá Ántíóka suwahpeq pokuwe. Poké agurabetaq peh morá Asiu ke Sísa éhweh teríúwe.

20 Táhmaro Sísa tagaríáh kewé Sáipára marákórápéqté kereq Sáíríni marákórápéqté kereqka Ántíóka suwahpeq pokue Káríki ke Sísa itene Wahnah éhweh teríúwe.

21 Wene ehweh teríú ke Manikánka séhréh arito púara áhnte kegá Sísansabé aiq pútare atera, Wene sánsá sehgiónehe íwiáhuwe.

22 Sarúsarama suwahpeqte Sísa tagaríáh kégá irera Páhnábása Ántíóka suwahpeq eqmarówe.

23 Eqmarówana Ántíóka suwahpeq séna Manikánka wehuke séhréh arito tagéna wene arupipeq eyoyóúwe. Eyoyóéna sensabé túbah agiyehboq Sísane sánsá kawerue sehgióro úwe.

24 Páhnábása kaweqlaq mía míau aní ména Sísansabé kawerue aiq pútare atowana Manikáne Awanka séhréh atowe. Séhréh atowara áhnte kegá Sísansabé aiq pútare atera, Sísane sánsá sehgióneheqmúne íwiáhuwe.

25 Páhnábásaga Sora anebahrinieéna Tahsa suwahpeq pokúwe.

26 Pokéna Sora tagéna koweqmena Ántíóka suwahpeq kouwekúwe. Segá peh morá ópéq mitaq méra Sísa tagaríáh kérerue momiwíue áhnte

ke síwáhnoruye. Mitaq mó kegá Sísa tagariáh kékabé Kárísítíni kee ue téh síwírarítówe.*

Morábí soruparó monéyábé éhwéhne.

²⁷ Mi tanáhráq Manikáne ehweh iraru kegá Sarúsarama suwahpeq suera Ántíoka suwahpeq túwe.

²⁸ Peh morá sú ani wenawíq Ágábúsaga iriwe míowana Manikáne Awanka iwíáh atowana irarúwe. Iraréna, Anotah ehwéhráhna tanáhráq mah marákó mårákó sinæ úwe. Wehukení wenawíqtare Káróríusa Sísähri anotah wahnáh ání míotaq mi ehwéh aiq pútaragúwe.

²⁹ Aiq pútaragúwara Ántíoka suwahpeqte Sísa tagariáh kégá iwíáhéra, Súria marákórápéqté Sísa tagariáh ké tátutahuq paiqmarageheéq móne nárienéhe. Náriníe ú aninká wewega iwíáhue náriewe.

³⁰ Mina tahnsa sene móne morábí soruparówara Páhnábásareq Sorareqka mi moné mewera Súria marákórápéq pokuye. Mitaq Sísa tagariáh ábóawáh wéhgá nárighehéra móriúye.

12

Píta karábúsiipéq móátó ehwehne.

¹ Mi tanáhráq Asiu kené anotah wahnáh ání wenawíq Érótiga Sísa tagariáh ké síwíoqnówe.

² Síwíoqnéna, Sónine awahwá wenawíq Sémísi subóro aritowara pokatate kiraqme subiq súówe.

³ Subiq súónsabe Asiu kegá Érótinsabé kaweróne atówe. Kaweróne atówana Érótiga Píta karábúsiipéq

* **11:26:** Mi awíq áwahewé Karáhéne animárlíne áwíre.

móátáhro úwara táhtoqme móátówe. Sótaikú siahrreraq ko tánáhráq karábúsiipéq móátówe.

⁴ Móátowana Érótiga áhnte sontiá kékabé wah-nahnatiáhro aritowe. Mó sontiá ké itaréitaré ké mihi sorupawé mía mó sontiá ké itaréitaré ké mihi sorupawé míaue 16 sontiá ké míowe. Érótiga iwíahéna, Sótaikú siahrreraq kék tánáhráq parabagínaraq wehuke míahpí kotiinie iwíahúwe.

⁵ Iwíahúwara Pítá karábúsiipéq míotaq Sísa tagariáh kégá Pítá pugeq auwageheéra púrerata atauwe.

Íopeqté áninká Pítá séhréh ato ehwehne.

⁶ Érótiga Pítá Asiu kebá móatanaútaq Pítaga inokáhpeq karábúsiipéq sugowe. Pítá taqnobagineho éra téhtaré séniráté tährarerá sontiá anítárégá ébeq ayéhráq ébeq ayéhrárué wahnahnuyara mó sontiá anítárégá méhpehtapéq wahnahnatióyana sugowe.

⁷ Sugowana Maniká míéhrabeqte áninká ábóraragútaq karábúsiipéq téhragúwe. Téhragúwana íopeqté áninká Pítane ahwíraq subiq subirue iriatena wensabé, Apubúue irigúno úwe. Úwana wene ayahpíte séniráré megúwe.

⁸ Megúwana íopeqté áninká wensabé, Arene ambanta sábirue úbíqme arene súu sukio úwana Pítaga wene ehweh irena miraúwana, Arene korósi aneranerue íné séniro úwe.

⁹ Íné séniro úwana Pítaga we kérrena iwíahéna, Íopeqté áninká tumeniréhnsábé aiq pútaqpomo peh néniwanka tagehrapómo iwíahúwe.

¹⁰ Sontiá aninká wahnahnúrabeq sótaikéra mó sontiá aninká wahnahnúrabeq sótaikéra wahba

áhtápéq séagoyeheéra anotah kahpáh ónsá korabeq suye. Mi onsá pehipi sigúwara sega máhpeq séaguye. Séagéra ahnanahq sótaikuyataq íópeqté áninká Pítá auwena taqnobagúwe.

11 Taqnobagúwana Pítaga iwíáhéra, Íre néniwanka tagehrana amahnága aiq niahteboge. Érótireq Asiu kereqka nubíyehoéna Manikánka íópeqté ání eqmaréhre. Íné tumenirankeheéna eqmaréhre íwíáhéra

12 Mákane anowa Máhríane nahtapeq pokúwe. Mákawe mó awíq Sónie. Mi nahtápéq áhnte Sísá tagariáh kégá momiwíue méra púreruwana

13 Pítaga máhpeqte ónsaráq pakobakoúwana ahrari wenawíq Áróraga onsarapéq tuirowe.

14 Tuirena, Ehweh irari aní Pítae íwíáhéra wene arupipeq eyoyóúwe. Eyoyóúnsabe wega onsa íre siatasa peh nahupeq pehbeheráh kibekue, Pítá méhpehtapéq iriwe míéhre teriuwe.

15 Teriuwara sega wensabé, Are uwoyansa ani úkóne uwana mi ahrárígá, We míéhre. Peh aiq pútariahnsanuge úwara sega wensabé, Peh íópeqté ání Pítá wahnhahnatéh ánípómo uwe.

16 Uwana Pítaga mó pakobakoúwara sega onsa siatera Pítá tagéra áhtenuwe.

17 Áhtenuwana se túbah agigeheéna Pítaga ayahnka saiqnéna Manikánka karábúsiipéqté tumero ehwéh teriuwe. Teriena sensabé, Sémísireq mó Sísá tagariáh kéréq koreríero éna mitaq suena móbeq pokúwe.

18 Ahbiahipeq Pítá karábúsiipéqté taqnobagúnsabe sóntía kegá, Eheragiro éra sirupipeq iwíáh kikiruwe.

19 Érótiga sóntía keyábé, Pítá koanebahroro úwara koanebahruwe. Anebahruwana Pítá íre ábóraq míonsabe Érótiga Pítá wahnahnuro sontiá ké ehweh aritena mó sontiá kékabé, Mi ke subiq súáhro aritowe. Subiq súáhro aritena Érótiga Súria marákórápéq suena Sésária su wahpeq kowíowe.

Érótí pukú ehwehne.

20 Érótiga Táíya su wahpeqte kéreq Sáírona su wahpeqte kéreqsabé abiahnsanúwe. Abiansanúwara Érótiga wahnahnú marákórápéqté táchútahúq paiqmaq paiqmaru puara sega weba suwe. Érótine arambehri kené wahnahnú ani wenawíq Párásátae. Moraráq su kegá wensabé, Érótiga itensabé ahqáho aitehnehboq are itene ehweh mibeq mahbeq aní míahno uwe. Insahwé oneheéra Érótiba suwe.

21 Érótiga iwíáhú wehekáh wene wahnah awáhríq náneqmarí sukiwena wahnah siáhráq tútuue ména ehweh teriuwe.

22 Teriuwara író kega anotah ehwéhnabaéra, Teí ání íre wehukení míre. We Maniká míre uwana

23 Érótiga, Ahqáho. Íné íre Maniká múge. Peh wehukení múge íre iraria peh ehiya míowe. Minayabe íopeqté ání Maniká míéhrabeqte áninká apubúue, Awahreúno atowana wene arupipeq awiria sóagúwana putiowe.

24 Putiowara mó ke su wahpeq mó ke su wahpe-
rue áhnte kegá Manikáne ehweh írera Sísansabé aiq
pútare átowe.

25 Páhnábásareq Sorareqka sene mibeqqté
árámbéhrí parabaruera Mákha mó awíq Sóni

meqmera Sarúsarama suwahpeq suera Ántíoka suwahpeq kouwekuye. (*Eqmaro 11.29,30, 12.1*)

13

Porareq Páhnábásareq eqmaq súó ehwehne.

¹ Ántíoka suwahpeq Sísá tagariáh ké míórabeq Manikáne ehweh iraru kereq síwáhnoru kereq míowe. Mi anímári sívíqmé Páhnábása, Símíóni we mó awíq Naisa, Sáíríni marákórápéqté ání Árúsía, Sora, Mánái miraue míowe. Mánáireq anotah wahnáh ání Érótireq animairare míoyataq motakakiah áníté míoye.

² Segá kawerue púreroneheéra táhutahuq awehri-uwe. Mi tanáhráq segá Manikánsabe iwíáh íwíáh atótaq Manikáne Awanka sensabé, Páhnábásareq Sorareqka teriena arámbéhrí miraigehboq eqmaq súáhro úwe.

³ Úwara segá táhutahuq awehriéra púreréra mi aniténé sinonka táhtoqme púreraritera eqmaq súówe.

Ahgora aníné aura pigú ehwehne.

⁴ Manikáne Awanka siqmarowara Sorareq Páhnábásareqka pokue Sérúsía suwahpeq túye. Mitaq suera sípi kewewera kure Sáípára marákórápéq pokuye.

⁵ Pokéra Sárámísi suwahpeq sutaq segá Asiu kené momiwí nahmárítápéq Manikáne ehweh teri terinuyana Máhkaga seba ména séhréh aritowe. Máhkawe mó awíq Sónie.

⁶ Segá moke Sáípára marákórápéq nogera Pápósa suwahpeq suwe. Mitaqté ání wenawíq Páhsísae. We Asiu ání ména ahgora ání míowe.

Wega, Íné Manikáne ehweh iraru aní múge úmé péhepehenúwe.

⁷ Wega Pápósa suwahpeqte wáhnáh ánibá míowe. Mi wahnáhné áwíqtare Ségia Pórásae. We áhnte ahtébiá aní ména Manikáne ehweh irankeheéna Sorararéyábé mahbeq sewéta Manikáne ehweh teniétao úwe.

⁸ Mi ahgórá aní áwíq mó awíqmé Erimae. Erimaga Sorararéné ehwehme abehq éhwéhne aritowe. Mitaqté wáhnáh áninká Sísane ehwehnsabé aiq pútare inehoéna wega Sorararéné ehwehnsabé abehq éhwéhne aritowe.

⁹ Sorawe we mó awíq Porae. Manikáne Awanka we págege atena séhréh atowana wega Erima págegeue ebitawéna wensabé,

¹⁰ Are owainawane ani móne. Are kaweqtaq méyabe awahrieh aní móne. Are péhe ánímé ahbabáqsabe áwí aní móne. Arega Manikáne ehweh íre tábúsoqme teriasa aeqme síwáhnoróne.

¹¹ Irátiahno. Manikánka amahnága kamah awinah are aura pira aní míankehe. Áhnte wehekáh térehre íre tagahrahóně úwana wene aura apubúue pigúwana we íre tagahrahúwe. Íre tagahrahúnsabe mó aninká wene ayahnkaratáq ahmboqme ah sokigi aninkeheéna kabaq kabarúwe.

¹² Wahnah aninká mina tagéna Sísane ehwehnsabé áhtenu puana aiq pútare atowe.

Porareq Páhnábásareqka Ántíóka suwahpeq teríuya ehwehne.

¹³ Porarehga Pápósa suwahpeq suera sípi kewewera kure Péríga suwahpeq Pámbíría marákórápéq kuwe. Mitaq Máhkaga Porareh

suena wenawahpeq Sarúsarama suwahpeq seuwekúwe.

¹⁴ Seuwekúwara Porarehga Péríga suwahpeq suera Ántíóka suwahpeq Písíria marákórápéq kuwe. Mitaq kéra ahrena ahrena wehekáh Asiu kené momiwí nahtápéq kire tútuue míowe.

¹⁵ Tútuue míowara mibeqté wáhnáh kégá Mósísiga sehgióro ú sehirankákáq Manikáne ehwéh iraru kené sehirankakaq sáhnsahera sega Porarehyabe, Itene irupipeq séhréhorahi ehwéh kahnaraqmé teiéro uwe.

¹⁶ Uwana Poraga irigéna se túbah agigeheéna ayahnka saiqnéna mahraréna, Ísara kereq Manikánsabe áhteno kerero, írátíáhro.

¹⁷ Maniká Iteribo ite Ísara kené Manikáne. Wega itene igaqnaréh omaq sitena séhréhúnsabe sega Ísípi marákórápéq íregárítat aguwe. Manikánka págegeue séhréh aritena Ísípi marákórápéqté meriqmena móbeq móritowe.

¹⁸ Segá 40 opéq abataq marákórápéq míowe. Míowana mi tanáhráq Manikánka se peh áwérágówe.

¹⁹ We abapete téhtaré Kénáni marákóráq mío kehiná kaqsuwé. Kaqsuo kene marakó itene igaqnaréh eqsitowe.

²⁰ Mi arámbéhrí miraúmí peh íregárítat opéq 450 opéq sótaikúwe. Sotaikúwana wega ehwéh kaweraritengehéna wahnah ke omaq sitowe. Anehe Sáhmúéri wene ehwéh irari aní omaq atowe úwe.

²¹ Poraga mó mahraréna, Itene igaqnaréhga Manikánsabe, Íregárítat wahnáh kékabé iuwahriehre. Peh morá anotah págege wahnáh

ánínká ite wahnahnaitankeheé omaq ato uwe. Uwana Manikánka Pénsámíni kahnáh ání Kisine ahninkáwá wenáwiq Sora omaq atena itene igaqnaréh wahnahnarito atowe. Soraga 40 opéq wahnahnúwe.

²² Wahnahnúwana Manikánka Soransabé, Arega wahnahnurona tanáhráq aiq parabagire éna Tébítí sene anotah wahnáh ání míankeheéna omaq atowe. Omaq atena mahraréna, Sésine ahninkáwá tagarióge. We niruni ání míre. Wega moke nu wahbeh sásá mirainkehe úwe.

²³ Manikánka irarúnserah Tébítine anahwagá ite Ísara ke kaweraitankeheéna Manikánka omaq atowana aiq tutaire. Tutai ani wenáwiq Sísae.

²⁴ Sísaga tuina uraitaq Sóniga Ísara keyábé mahraréna, Itene ahbabáq sansa sueq kaweqtaq míéhrataqmé wání meinie uraire.

²⁵ Sóniga wene arambehri parabaruana uraitaq wega mó mahraréna, Íné inse wíre íwíáhoo? Íné ite áwénunúna anímé íre we úge. Írátíáhro. Íné inehe si aníné súu nahniáq pugereyabe íre awehrari aní múde uraire úwe.*

²⁶ Poraga mó mahraréna, Nánuwahraho, Ébáráhma kahnáhné animárínseq Manikánsabe áhteno kerero, írátíáhro. Itega ogá mía míaonayabé mi ehwéh Manikánka aiq teíre.

²⁷ Sarúsarama su wahpeqte kéreq sene wahnah anímárínseqka Sísa tunsabe we íre siahtabarowe. Segá ahrena ahrena wehekáh Manikáne ehweh iraru kené sehira sáhnsahwe taga tagaéra mi ehwéhnsábé íre kawerue iwiáhurowe. Íre

* ^{13:25:} Mákha 1.7 aigarápéqté ehwéh tagáhno.

kawerue iwíáhéra Manikáne ehweh iraru kegá sehiranunserah sega Sísa ehweh atera subiq suanéhe atówe.

²⁸ Segá, Sísa áhnte ahbabáruraire íre irarerahéra sega pehipi Páhírátinsabé, Subiq suo ato ue teawátówe.

²⁹ Manikáne sehiranka irarúnserah sega subiq sutowe. Subiq sutowara awanká soriwe táhparó ani sehgiwera maisé onápípéq mómaisarówe.

³⁰ Mómaisarówana Manikánka iriatena organúq atáráire.

³¹ Organúq atáráirana Kehrari marákórápéqté Sarúsarama su wahpeq we kétó keba suraire. Surairara sega áhnte wehekáh we taga tagauronsabé sega amahnága mó ke teri terinowe úwe.

³² Poraga mó mahraréna, Anotah kawéq éhwéh mahrarue teiune. Manikánka itene igaqnáréhyabe, Kaweraitahna aní iteba eqmaraníe aiq irarúwe.

³³ Eqmaraníe aiq iraréna Sísa iriatena organúq atáráinsabé wega irarú ehweh aiq pútaraguraire. Itene igaqnáréhne animárínká aiq tagariaraune. Wega iriatena organúq atáráinsabé Buk Songipeqté éhwéhnká mahraréna,

Are nénahni móne.

Íné Arenabo uge ire. *(Buk Song 2.7)*

³⁴ Manikánka iriatena organúq ato puana wene anonka mókake marakóipeq íre karekorahire. Minayabe Manikáne ehwehnka mahraréna,

Ínéga Tébítí omasa éhwéh teawúnserah mókake ite kawerarena áhnte kaweq naneq iníe ire.

(Aisaia 55.3)

³⁵ Manikáne ehweh mó mahraréna,

Arega miraónayabé arene arambehri miraéyabe omaq ato aníné anonka íre karekinawire ire. *(Buk Song 16.10)*

³⁶ Tébítiga oga mío tanáhráq Manikáne arambehri kawerue miraéna wene arambehri parabaruotaq putiowara itene igaqnaréh maisarórabeq maisarówe. Maisarówana Tébítine anonka kárékúwana
³⁷ Manikánka iriatena organúq atárái aníné anonka íre kárékuraire.

³⁸ Minayabe teiníboq írátíáhro. Sísaga miraurainsabé itene ahbabáq kaqiuwahráhire.

³⁹ Mósísiga sehgóro ú ehwehnká itene ahbabáq íre kaqiuwahráhire. Sísansabé aiq pútare atonayabé itene ahbabáq moke kaqiuwahráhire úwe.

⁴⁰ Poraga mó mahraréna, Naho sáiyó ké tahnsa míyehboq néne ehweh kawerue írátíáhro. Mi keyábé Manikáne ehweh irarú aninká naho sehiranue mahraréna,

⁴¹ Íre aiq pútare ainteq peh niwirého keo, tagariáhro. Ite áhtenéq pukoneheqmóe. Ite miéhra tanáhráq anotah pagégé árámbéhrí mirainauge. Wehukega mi arámbéhrí teiétáq tahirímé itega sensabé íre aiq pútare arítáh irino úwe teriuwe.

⁴² Porane ehweh parabagútaq wereq Páhnábásareqka Asiu kené momiwí nahtápéqté tueyokuye. Tueyokuyara mibeqté kégá sensabé, Mó ahrena ahrena wehekáh arega teiena ehwéh mahtaq mónkakáq sereiyo uwe.

⁴³ Momiwí nahtápéqté kégá abae agutaq áhnte Asiu kereq Asiu kené sánsá mirau kereqka Porareq Páhnábásareq kérírówe. Kérírówara

Porararégá ehweh teriera, Manikánka ite séhréh aitankeheeéq wene sánsá kawerue sehgíóro uye.

Asiu ke suera nahnso ke koreríúya ehwehne.

⁴⁴ Mó ahrena ahrena wehekáh mi ke suwahpeqte ké peh íregáritaq kegá Manikáne ehweh iraneheéra momiwíuriówe.

⁴⁵ Sísansabé íre aiq pútare atáh Ásíú kégá áhnte wehekéq momiwíuriówara tagotaq sene sirupipeq págegeéra abiahnsanuwe. Minayabe sega Poransabé awiréh atera, Arega iraréna ehwéh íre aiq pútaq ehwéhne atówe.

⁴⁶ Atówara Porareq Páhnábásareqka íre áhreia peh pahsuqme teríuye. Teriera, Itega Asiu ke míah púata téh itega teiuye. Itega, Manikáne ehwehnsabé iuwahriehre éq oga mérapeqsábé íre iuwahbehnsabé ite iwueta mó ke nahnso ke korerieyéhe.

⁴⁷ Manikáne ehwehnka irarinserahnue mahraráena,

Nahnso ke sunkíkírirabeq kawerue nogigéhboq kánéq keráhnserahnue itega kaweq ehwéh koreriéro. Mah kehiná kékíná irageheéna eqmaróge ire uye.

⁴⁸ Uyara nahnso kegá mi ehwéh írótaq iwíáh íwíáhéra, Manikáne ehweh aiq kaweq ehwéhne íwíáhuwe. Oga mía míageheéna Manikánka omaq sito kega Sísansabé aiq pútare atówe.

⁴⁹ Sísansabé aiq pútare ató kega mitaq teri mahaqtáq terinuwara áhnte mibeqté kégá írówe.

⁵⁰ Mibeqté Asiu kegá Porararéyábé abiahnsanéra kaweq abóáwáh ínínseq mi ke suwahpeqte abóáwáh wéhreq eqmaq súówe. Eqmaq súówara

sega Porareq Páhnábásareq síwíoqnéra sensuwah-peqte káqsúówara

⁵¹ Porararégá sene sigárátáté tánáhúq aiyápóranirue poruaruóye. Itega aiq teriuyansabé amahnága mirao sansá seyene ahbabáre íwíáhéra sene sigárátáté tánáhúq poruaruera Áíkónía suwahpeq pokuye.

⁵² Pokuyana Manikáne Awanka mitaq Sís tagaríáh kéné sirupipeq ména séhréh aritowara sega iwíáh íwíáhuwe.

14

Áíkónía suwahpeq ótaq sansámári mirauya ehwéhne.

¹ Porareq Páhnábásareqka Áíkónía suwahpeq pokuyataq sene sánsánéra Asiu kené momiwí nahtápéq kibekuye. Kibékéra Sísane ehwéh tábúsoqme síwáhnoruyansabé áhnte Asiu kereq Káríki kereqka Sísansabé aiq pútare atówe.

² Íre aiq pútare ató Asíú kégá nahnsó keyábé, Porararéné ehwéhme peh abehq éhwéhne uwara mi nahnsó kégá aiq pútare arító keyabé abiahnsanarítówe.

³ Porararégá íre wahto tanáhráq mitaq méra íre áhreia Manikáne ehwéh síwáhnoruye. Mi ehwéh págegeue síwáhnoruyataq Manikánka sirupipeq págege aritowara sega ótaq sansámári mirauye.

⁴ Mi ke suwahpeqte kégá íre morá íwíáhuwe. Mó kegá Porararéné ehwéh aiq pútaq ehwéhne íwíáhuwara mó kegá, Írakaumo. Peh Asiu kené sánsá aiq pútaq sansáne uwe.

5 Asiu kereq nahnsó kereq sene wahnhahnseqka momiwíéra, Porararé síwíoqnéra ebahnsatate tuperuqme subonéhe íwíáhuwe.

6 Iwíáhuwara Porararégá mi ehwéh íróyataq apubúue mitaq suera Áríkiónía marákórápéq Árísáta suwahpeq Tébi suwahpeq pokuye. Mitaqkákáq mó ayéhrápéqté ké suwahpeqkakáq teriáqme nogúye.

7 Mi marákórápéqté ké Sísane kaweq ehwéh teriáqme nogúye.

Soriqnah ani kaweragú ehwehne.

8 Peh morá soriqnah ani Árísáta suwahpeq tútuue míowana wenanoga soriqnah ani maq-maronsabe íre nogoráhúwe.

9 Poraga síwáhnorútaq mi anínká kawerue irowe. Irena, Sísaga íné kaweraintahráhire íwíáhúwana Poraga we ebitáwéna wene iwíáh tagéna anotah-taqa teawena,

10 Irigue nogo úwana wega apubúue iriwe noguwé.

11 Noguwara mibeqté kégá Poraga miraú tagéra anotah ehwéhnabaéra Áríkiónía marákórápéqté kéné ehweh mahraréra, Manikátaregá wehukeníté úkéra iteba tumiéhye uwe.

12 Tumiéhye éra Páhnábásansabé sene maniká áwíq Súsie ue áwíratówe. Poransabé sene maniká áwíq Érémisie ue áwíratówe. Poraga áhnte ehwéhnúnsabe, We Érémisi tahnsá áníne éra Érémisie ue áwíratówe.

13 Sene maniká Súsinsabé iwíáh ató nah sensuwahpeq ahnansahrapeq kowe. Súsine ehweh mibeq mahbeq aritéh áninká káhoakáq

awanká aramarínkákáq ogesáh ogesáh rapeq mewena súwe. Sega, Porareq Páhnábásareqsabé manikátare wóye íwíáhéra titironeherauwe.

¹⁴ Titironehera uwara íre mirao sansá miraonehera unsabé mi kegá túbáh agigeheéra Porararégá sene ambanta subansúoye. Subansuera wehuke míórabeq pehbeheráh pokue anotahtaq ehwehnéra,

¹⁵ Aneqsabé miraoo? Peh ite tahnsá wéhuké míoye. Íre miraoro. Itega kaweq ehwéh teieye-heéta súye. Írátiáhro. Maniká we oga mía míai aní míre. Wega íopeqkákáq mah marákó mårákóákáq sóreq wanínkákáq moke kék náneqmarínkákáq mirarowe. Péhepehe maníkánsábé íwíáh íwíáho sansá sueq Manikánsabe áhraboro.

¹⁶ Naho wehukega seyene mirau sansánuwana Manikánka pehragaritowe.

¹⁷ Íopeqté ibonsúno atéhrana ibonsirana ménsámehsá kawerue kíréhre. Kawerue kíréhrana iyahbankirehraq itene irupipeq eyoyóire. Minayabe wega ite kaweraitena aiq pútaq míóge éna aiq sokigi aíre uye.

¹⁸ Mi ehwéh iraruyara titironehe íwíáhu ke ebeq sene ehweh íre írówe. Íre írówara Porararégá anotahtaq págegeue ahqáho aritoyara mi kegá, Aiq mire. Itene titironehe íwíáh suanehe éra súowe.

Ebahnsatate Pora subú ehwehne.

¹⁹ Ántíóka su wahpeqte Asiu kereq Áíkónía su wahpeqte Asiu kereqka mitaq séra mó ehwéh teríúnsabe mitaqté kégá sene ehweh meyówe. Mewera ebahnsatate tuparuqme Pora subuwana we marakóipeq aunúnkaq surahúwara sega,

Aiq putiéhre íwíáhéra abariue ahnansahrapeq márówe.

²⁰ Márówara Sísa tagaríáh kégá weba sáhuriótäq Poraga irigéna mi ke suwahpeq kouwekúwe. Ahbiah tahnsá Porareq Páhnábásareqka mitaq suera Tébi suwahpeq pokuye.

Sísa tagaríáh ké págegeue míageheéra síwáhnoréra aboawah weh omaq sitóya ehwéhne.

²¹ Segá Sísane kaweq ehwéh Tébi suwahpeqte ké teríúyara áhnte kegá Sísansabé aiq pútare atówe. Aiq pútare atówara Porararégá mitaq suera Árísáta suwahpeqkakáq Álkónia suwahpeqkakáq Ántíóka suwahpeqkakáq kouwekuye.

²² Kouwekéra Sísa tagaríáh ké págegeue míageheéra síwáhnoruye. Síwáhnoréra, Túbáh agiehboq Sísa kawerue kéráhro éra Sísane ah íre mareqmareq ahne. Ebeq mó kegá íwíoqnehraq anehe Manikánka wahnah wahnahnirabeq pokoneheqmúne uye.

²³ Sísa tagaríáh kéráq wahnahnigeheéra Porararégá mó mapéq mó mapérue aboawah weh omaq sitóye. Omaq sitera táhutahuq awehriue mahraue púreréra, Maniká Iteriboo, síósirapéq wahnahnira kegá arensabé aiq pútare atáhwe. Arega se págege arite wahnahnarito ue púreruye.

Písíría marákó Ántíóka suwahpeq seuwekuya ehwéhne.

²⁴ Porararégá mitaq suera Písíría marákórápéq kotaikue Pámbíría marákórápéq pokuye.

²⁵ Mitaq Péríga suwahpeq Sísane ehweh teriera suera Átárla suwahpeq pokuye.

26 Mitaq suera sípi kewewera kure Ántíóka suwahpeq kouwekuye. Mitaqté Sísa tagaríah kégá eqmaq suanehe íwíáhéra púreruwe. Manikánka Porararé séhréh aritankeheéra púreréra eqmaq súówe. Eqmaq súowara sega Sísame ehwéh kawerue teriera sene arambehri parabarúóyansabé Ántíóka suwahpeq seuwekuye.

27 Seuwekuyataq sega Sísa tagaríah ké momiwí arítóye. Momiwí aritera Manikánka séhréh arito ehwehnkákáq áhnte nahnsónká Sísansabé aiq pútare ató ehwehnkákáq teríúye.

28 Teriera sega íre wahto tanáhráq mi ke suwahpeq Sísa tagaríah kéká mía myauye.

15

Tábúsoq marageheéra eqmaq súó ehwehne.

1 Táhmaro Súria marákórápéqté kégá Ántíóka suwahpeq tuera Sísa tagaríah ké síwáhnuwe. Síwáhnuéra, Peh morá Mósísine sánsá sehgó ké sene síu amurúráh kégá oga mérapeq awaq miahrahewe uwe.

2 Uwara Porareq Páhnábásareqka mi ehwéhnsábé anotah ahqáho arítóye. Minayabe sereq tú kerekka anotah ehwéhuwe. Anotah ehwéhuwara Ántíóka suwahpeqte Sísa tagaríah kégá Porareq Páhnábásareq táhmaro mó kerek omaq sitera Sarúsarama suwahpeq pokoro arítówe. Sarúsarama suwahpeq Manikánka eqmaro kerek Sísa tagaríah ábóawáh wéhreqsabé mi ehwéh tábúsoq marageheéra Porareh pokewáhro arítówe.

3 Sísa tagaríah kégá pokewáhro arítówara sega Pónisia marákóákáq Sámária marákóákáq

kótaikuwe. Kótaikutaq mitaqté Sísa tagariáh ké teriera, Nahnso ke Sísansabé aiq pútare atówe ue teríúwe. Teríuwara moke sirupipeq iwíáh íwíáhéra eyoyówe.

⁴ Porarehga Sarúsarama suwahpeq sutaq mibeqté eqmaro kereq Sísa tagariáh ábóáwáh wéhreq moke Sísa tagariáh kerekka mehwéh arítówe. Mehwéh arítowara Porarehga Manikánka séhréh aritena moke miraú naneqkakaq teríúwe.

⁵ Teríuwara táhmaro Sísansabé aiq pútare ató ke Péhrasi kené sánsá mirao kegá irigéra mahraruwe. Mahraréra, Nahnso kegá oga mérapeq awaq miagéhboq Mósísine áú amurúruto sansá miraoro terio. Mósísiga sehgóro ú ehwéh anterúéhboq kawerue sehgóro terio uwe.

⁶ Eqmaro kereq Sísa tagariáh ábóáwáh wéhreqka mi ehwéhnsábé iwíáhoneheéra momiwíéra sólouwana

⁷ Pítaga irigéna sensabé, Nanuwahraho, ite tagariarome naho nahnso kegá kaweq ehwéh irera aiq pútare atageheéna Manikánka ite míaraunarabeq omaq intaráire. Omaq intena, Korerio aintaráire.

⁸ Manikánka wehukene sirupipeq tagariéhre. Wenawa iteba eqmaq áuwátainserah nahnso keba moq eqmaq áuwátáire.

⁹ Wega íre peh morá ite Asiu keyábé arutaboirire. Wega nahnso keyábé moq arutaboirire. Segá Sísansabé aiq pútare atáro puara sene sirupipeq kawerarítaráire.

¹⁰ Aneqsabé Maniká áwíognaho? Mósísiga sehgóro ú ehwéh sehgie sansa anotah pagégé sánsáne. Itene igaqnaréhreq itereqka mi sansá íre

tábúsoqme sehgiórähúne. Minayabe itega aneqs-abé nahnsó ke mi pagégé sánsá sehgóro terieo?

¹¹ Íre mi sansá sehgiunaga oga mérapeq awaq mi-aahrähúne. Peh morá itereq nahnsó kereq Sísansabé aiq pútare atonaga oga mérapeq awaq miahrähúne úwe.

¹² Pítaga mi ehwéh irarue parabaruowara Porareq Páhnábásareqka momiwíurió ke ehweh teríúyara ehiya míowe. Porararégá nahnsó ke míópi Manikánka séhréh aritena ótaq sansámári miraurai ehwéh teríúye.

¹³ Teríúyana sene ehweh parabagútaq Sémísiga mahraréna, Nánuwahraho, néne ehweh íráhro.

¹⁴ Manikánka nahnsó ke we kahnáh míageheéna omaq sitáráire. Wega téh miraurainsabé Sáimóniga aiq teíre.*

¹⁵ Manikáne ehweh iraru kegá minayabe aiq monseráh éhwéh teiúwana Manikáne ehwehnka aiq mahraréna,

¹⁶ Itene anotah Wahnáhnká mahraréna, Nah sokogi inserah Tébíti kahnáhmé ahbabárowe. Íné kouwekutaq sokogi nah pankeráhnserah íné Tébíti kahnáh kaweraritaníe. Sokogi nah pankeráhwana o nah tahnṣa kéhserah íné we kahnáh kaweraritaníe.

¹⁷ Mó kegá íné sene Wahnahnsabé ninebahrige-heéna kaweraritaníe. Ómi ínéga omaq sitó náhnsó kegá ínénsabe ninebahréra iwiáh íwiáh aintagéhe ire.

¹⁸ Naho itene anotah Wahnáhnká áwahewé sína naneq aiq teiuwe úwe.

* ^{15:14:} Árúkaga Pítane mó awíqmé Sáimónie áwíratowe.

Awehrio naneqsabé éhwéhne.

19 Sémísiga mó mahraréna, Íné iwíáhumé Manikánsabe áhrabo nahnsó kégá Maniká kéráh sánsá sene sirupipeq umeh agínehboq ahqáho ariteho.

20 Peh mahrarue páhsí sehiranue terienéhe. Terieq,

Péhepehe maníkánsabe iwíáh iwíáhoneheéra titirirataq náíra naneq íre nahro. Mó kené ahrewe ahrariwe wehwe mahbiwe íre abarioro. Wehukenínká awio páríkí náneq ka íre nahro. Korahq íre nahro.

Mahraue páhsíipéq sehiranue terienéhe.

21 Mósísine ehweh ahrena ahrena wehekáh Asiu kené momiwí nahmárítápéq ahriahri sáhnsáhówe. Wene ehweh moke mi kehiná suwahpeq síwáhnorowe. Minayabe wene ehweh író kega abiahnsaniyeho éra peh morá teiú náneqmarínsábé awehrioro ue páhsíipéq sehiranue terienéhe úwe.

Páhsíipéqté éhwéhnsábé éhwéhne.

22 Eqmaro kereq Sísa tagaríáh ábóáwáh wéhreq moke mó Sísa tagaríáh kéreqka Ántíóka suwahpeqte ké korerigeheéra kaweq ke omaq sitanéhe iwíáhuwe. Segá itebaté téhtaré áníté Sáírásareq Súrása we mó awíq Pásábareq omaq sitowe.

23 Omaq sitera mi anítéreq Porareq Páhnábásareq mi pahsí siera eqmaq súówe. Páhsíipéqté éhwéhnsáká mahraréna,

Síría marákórápéqté kereq Sírisía marákórápéqté kereq Ántíóka suwahpeqte kérero, ite nahnsó ke owanawé Sísa tagaríáh púaq iteruwahrah

úkowe. Ite eqmaro kereq aboawah wehreqka mah pahsí sehiranue teiune.

²⁴ Ite írátáúnawe menah táhmaro mahtaqté kégá iteba kure íwáhnoruowe. Mi ke íre eqmaq súátáunara peh seyega iwíáhue iteba pokue íwáhnoruowe. Itega sene ehwéh aiq pútaq ehwéhpómo éq iwíáh kikiruowe.

²⁵ Minayabe itega só síoéq iteba Porararé moráráq iteba eqmaq súáhna aníté omaq sitone. Porareq Páhnábásareq itene kaweq iyáhnábó áníté méq sensabé irutaboírúne.

²⁶ Sereq itene Wahnah Sísa Karáhé éhweh terieyeheéra wehuke suboráho ke suwahpeq poku pokuóye.

²⁷ Mó aníté síwíq Súrásareq Sáírásareq míehye. Segá sehiranu ehwéh moq teigéhe.

²⁸ Manikáne Awanka iwíáh aitéhraq itega págege sansámári íre teieq peh mahraue miraoro teiune.

²⁹ Péhepehe maníkámárínsábé iwíáh íwíáhoneheéra titiré náriu naneq íre nahro. Korahq íre nahro. Wehukenínká awio párikí naneq ka íre nahro. Mó kené ahreve ahrariwe wehwe mahbiwe íre abarioro.

Itega mahna irarúna ehwéh íréhrataqmé kaweq-taq míagehe. Pehénáe. Mah pahsí aiq parabagire. Iroro uwe.

³⁰ Eqmaq suowara sega pokue Ántíóka suwahpeq tuera sega Sísa tagariáh ké momiwí aritera páhsí náriúwe.

³¹ Náriúwara sáhnsahera mi pahsíípéqté éhwéhnká sirupipeq eyoyó aritowe.

³² Súrásareq Sáírásareq Manikáne ehweh iraruya

aníté méra Sísa tagariáh ké págegeue míageheéra sega áhnte ehwéhnue síwáhnoruye.

33 Síwáhnoréra táhmaro wehekáh mitaq méra seuwekoyehe íwíáhuyara pehwehrue pokewáhtao éra eqmaq súówe. [

34 Sáírásaga mó iwíáhéné íre pokia peh mitaq míowe.]

35 Porareq Páhnábásareqka Ántióka suwahpeq kauye. Sereq áhnte mó kereqka Sísane ehweh teriera síwáhnoruwe.

Porararégá Máhkansabé ehwehuya ehwéhne.

36 Táhmaro wehekáh sótaikútaq Poraga Páhnábásansabé, Sísane ehweh síwáhnoruraya ke suwahpeqtaq seuwekoyehe. Sísa tagariáh ké kaweqtaq míahwapómo moke sensuwahpeq koragayehé úwe.

37 Úwana Páhnábásaga, Sóni we mó awíq Máhkaga sénirahnata pokoyehe úwe.

38 Úwana Poraga ahqáho atena, Itega Pámbíría marákórápéq pokurauyataq Máhkaga mitaq ite iuwena tabanaguraire. Mi tanáhráq wene arambéhri íre parabarusa pehipi taqnobagurainsabé wega mó íre séirankéhé úwe.

39 Mira íwíáhuyansabé sega ehwehuye. Minayabe Páhnábásaga Pora auwena Máhká meqmena sípi kewewena Sáípára marákórápéq pokúwe.

40 Pokúwana Poraga Sáírása omaq atowara Sísa tagariáh kégá monseráh íwíáhéra, Pokewáhtao éra mahrarue púreruwe. Púreréra, Maniká Iteriboo, arega mah anitéyábé arutaboiróna puah kawerue págege arite séhréh arito uwe.

41 Uwara Porareq Sáírásareqka pokue Síria marákóákáq Sírisía marákóákáq Sísa tagariáh ké momiwíurabeq págege aritayeheéra síwáhnoruye.

16

Tímótiga Porarehreq poku ehwéhne.

1 Porararégá Tébi suwahpeq kótaikéra Árísáta suwahpeq suyana mibeqté Sísa tagariéh ání wenawíq Tímoti míowe. Wenano Sísa tagariéh Asiu iní míowana wenabo Káríki ání míowe.

2 Árísáta suwahpeqte Sísa tagariáh kégá Tímoti kaweç aníne uwara Áikónía suwahpeqte Sísa tagariáh kéreqka moq monseráh íwíáhuwe.

3 Poraga iwíáheña, Tímoti ite séirankéhe íwíáhúwe. Ómi mibeqté Asiu kegá tagariómé Tímótine abowá peh Káríki ání míowe. Káríki ání mio púana Poraga iwíáheña, Tímoti ite séireyabe Asiu kegá abiahnsa aitého éna Tímoti meqmena wene áú amurú auwowe.

4 Porareq Sáírásareq Tímótireqka mó ke suwahpeq mó ke suwahperue pokue Sísa tagariáh ké síwáhnoruwe. Síwáhnoréra Sarúsarama suwahpeqte eqmaro kereq Sísa tagariáh ábóáwáh wéhreqne páhsí teri terinuwe. Teriera, Mah ehwéh kawerue iwíáhéq sehgióro uwe.

5 Minayabe Sísa tagariáh kégá Sísane sánsá kawerue ahtebéra sehgiówe. Mó wehekáh mó wehekáhnue mó kegá Sísansabé aiq pútare atera Sísane sánsá sehgiówe.

Porane awanka Másérónía marakórápéqté ání tagó ehwehne.

6 Porarehga, Itega Esia marákórápéq Sísa éhwēh korerienéhe íwíáhuwana Manikáne Awanka ahqáho aritowe. Ahqáho aritowara sega Párígía marákóákáq Kárétia marákóákáq kótaikuwe.

7 Kótaikéra Mísia marákórápéq wahtotaq kéra, Pítínía marákórápéq Sísa éhwēh korerienéhe íwíáhuwe. Iwíáhuwana Sísane Awanka mó ahqáho aritowara

8 Mísia marákórápéq kótaikuwe. Kótaikéra Tóása suwahpeq sóreq waní ayehrápéq túwe.

9 Mitaq inokáhpeq Porane awanka tagówana Másérónia marákórápéqté áninká ábóraragúwe. Ábóraragéna iriwe ména Poransabé, Másérónia marákórápéq séhréh aitagéhboq máhoro éna pahibahirúwe.

10 Porane awanka tagónsabe itega iwíáhowame* Manikánka mitaq Sísa éhwēh koreriéro aitéhre. Aiq teiátáinsabé ireq ite Másérónia marákórápéq pokoneheqmúne íwíáhéq apubúue sokah soka-howane.

Áríriaga Sísa kéro ehwehne.

11 Itega Tóása suwahpeq sueq sípi keweweq Sámótési marákórápéq pokowane. Mitaq séq mó wehekáh sueq sípi keweweq Néápórísi suwahpeq kowane.

12 Mitaq sípi sueq Píripái suwahpeq kiowáne. Aroma kegá Píripái suwahpeq téh nah aborisowe. Mitaq anotah matábú kéna moke Másérónia marákórápéqté mátábú kiotaiqme matabu kowe. Itega táchmaro wehekáh mitaq kowíahwane.

* **16:10:** Mó kegá iwiáhéra, Áruká mah pukú sehiranú aninká táchmaro tanáhráq Porareh kériowe íwíáhowe.

13 Ahrena ahrena wehekáh itega ah-nansahrapeq wání aroipéq pokowane. Ite iwíáhowanawe, Mahtaq ibora wehukega púrerowe íwíáhéq tunse áhnopeq tútuue míahwane. Mibeqté momiwíurió ininsó Sísá éhweh teriewáne.

14 Peh morá íní wenawíq Árííaga itene ehweh irena we Táiyátáira suwahpeqte íní ména wene arambehriwe tautáúq ámbántámári paiqmaq paiqmarúwe. We Manikánsabe iwíáh íwíáh ato iníne. Poraga ehweh irarútaq we kawerue irankeheeéna Manikánka mi iní séhréh atowe.

15 Séhréh atowana irowaq itega wereq wene nahtapeq kaegaeu kereq wání meriewáne. Meriewánana mi inínká itensabé, Íné Sísansabé aiq pútare atóge íwíáhirataq néne nahtapeq segaegaeoro úwe. Segaegeoro únsabe itega wene nahtapeq kogaegaeowane.

Poraga owainawa kaqauwo ehwehne.

16 Itega wehuke púrerorabeq pokowanaraq mó kené arambehri ahráríreq ahtapeq piehgiowáne. Wene arupipeq mío owáínawánká mókake aiq pútaragína ehwéh iwíáh atowana mi ahrárígá irarúwe. Irarúnsabe mó kegá móne náwa náwanuwana wene wahnah anímári nári nárinúwe.

17 Wega Porareq itereq séirena sawai sawaiéna, Mah kewé Manikáne arambehri ke wóe. Manikámé anotah págege aní míre. Segae Manikáne oga mía mía ehwéh teri terinowe úwe.

18 Áhnte wehekáh mi ahrárígá ite séirena mi ehwéh irare irareúwe. Minayabe Poraga iwíáh kikiréna wega pabeqme owainawansabé, Sísá Karahé áhrabu puah mi ahrárí auwe pokúno atoge

úwe. Úwana mi tanáhráq owainawanka mi ahrári apubúue auwena pokúwe.

Píripái su wahpeq Porararé karábúsiipéq móritó ehwehne.

19 Mi ahráríné wahnahmarínká iwíáhéra, Owainawa kaqauwéhrana poki puaq ite mókake mó moné íre meyahráhune éra abiahnsanuwe. Abiahnsanéra sega Porareq Sáírásareq táhtoqme abariuera mi ke su wahpeqte wáhnáhmáripá máhkétirapéq móritówe.

20 Móritera wahnah keyábé, Mi aníté Asiu aníté méra iteruwahpeq ahbabáq sansanóye. Seyene sánsá miraoro éyame íre kaweróye.

21 Ite Aroma ke míona puaq sene sánsá íre miraúna sansáne uwe.

22 Uwara mitaq momiwíu kereqka ehweh arítowara wahnah kegá Porararéné korósi keqsúówe. Keqsuera, Morahri sahtáté subóro arítowara subúwe.

23 Anotahtaq subera karábúsiipéq móritera mibeqté wáhnáhnsábé, Kauerue wahnahnúno atówe.

24 Kauerue wahnahnúno atówana wega se meriqmena karábúsi nahtápéq ákáhpite máhrípípquéq móritowe. Móritera sene sigarátáré awanká abahrabahriapipéq sukiwe táhparówe.

25 Táhparówara inokáhnabubu Porareq Sáírásareqka púreréra igonkónéra Manikánsabe iwíáh íwíáh atóyara mó karábúsiipéq mío kega tótuméra írówe.

26 Írówana anotah mariúwana karábúsi nah míu míuúwana moke onsawári apubúue pehipi siraragúwe. Siraragúwana ómi karábúsi kené séniwarí wewega pugetara agúwe.

27 Karábúsi wahnáhnká sugorabeqte irigéna on-sawári siraragú tagówe. Tagéna, Karábúsi ke moke taqnobagowe íwiahúwe. Mira íwiahú púana wene poka mewena apubúue pukinieéna néne ninonka sehsabianíe íwiahúwe.

28 Sehsabianaútaq Poraga anotahtaq áhrabéna, Arene anonka sehsabíehnehboq túbáh agúno. Íte moke míone úwe.

29 Úwana karábúsi wahnáhnká wene arambehri anínsábé, Kánéq keqme súno éna pehbeheráh karábúsiipéq kibekúwe. Kibekéna áhreú púana Porararéné paqnahipeq pokue iransánéna arehunseraráq míowe.

30 Wega Porararé máhpeq máruntitena sensabé, Árahonaga oga míaininkono ue kasenúwe.

31 Kasenúwara sega wensabé, Sísansabé aiq pútare atéhnaraqmé oga mía míainkehe. Arenawahrahreq moq oga mía míagehe uye.

32 Porararégá wereq wene nahtapeq kaegaeu kereqsabé itene Wahnah Sísá éhwéh teríuye.

33 Teríuya mi tanáhráq karábúsiipéqté wáhnáh Porararé meriqmena puramburanagú pabeq paberaritowe. Pabeq paberaritowara Porararégá wereq wene kárironanínseq wání náriúye.

34 Wání náriúyana mi wahnáhnká Porararé wene nahupeq meriqmena táhutahuq náriuwe. Wereq wene kárironanínseqka Sísansabé aiq pútare atónsabe sene sirupipeq eyoyóúwe.

35 Ahbiahipeq mi ke suwahpeqte wáhnáhmárínká párísireh síáhrabéra sensabé, Karábúsiipéq móritáró anité pugeq suo koreawéro uwe.

36 Koreawéro uwara karábúsiipéqté wáhnáh koreawúwana Pora mi ehwéh teawuwé. Teawena wensabé, Wahnah kegá siqmaráh párísíwárínká, Ite pageqsuo aiq teniéwe. Minayabe tueyokue pehwehrue pokewáhtao úwe.

37 Úwana Poraga párísiwarínsábé, Ite íre peh Asiu anité úye. Ite moq Aroma marákórápéqté ánité úye. Sega íre tábuosoqme ehwéh aitasa pehipi iubiq marera karábúsiipéq móítárówe. Sega amahnága kopípéq kaqiuwagéhbo? Ahqáho. Seyega séra ite pugeqme máhpeq iuwagéhe uye.

38 Uyara párísiwarínká wahnah keba kouwekue mi ehwéh teríúwe. Teríúwara wahnah kegá ite Aroma marákórápéqté ánité úya ehwéh írónsabe áhreewe.

39 Áhreéra Porararébá sure sensabé, Ite Aroma marákórápéqté ánité míehyame íre írátíaraune. Minayabe íre kaweruraune éra máhpeq márunsitera sensabé, Mahtaq sueta pokotao uwe.

40 Uwara Porararégá karábúsiipéq suera Áríriane nahtapeq pokuye. Pokéra mitaq Sísa tagaríah kékabé kaweq ehwéh iraréra sensabé, Sísane sánsá kawerue sehgóro aritera pokuye.

¹ Porarehga pokue Ámbípóri suwahpeq sótaikéra Ápórónia suwahpeq sótaikéra Tésárónáíka suwahpeq kéra mitaq Asiu kené momiwí nahtápéq kuwe.

² Ahrena ahrena wehekáh Poraga wene sánsánéna mi nahpípéq kibekue síwáhnorúwe. Asiu kené ahrené wehekáh apahtáró áhréná áhréná wéhékáh kibekue Manikáne púkuipéqté séhírá síwáhnorúwe.

³ Síwáhnoréna, Mó kegá Manikánka omaq ato aní áwíoqnéra subiq sutowana pukéna mó oga úkuraire. Manikáne ehwehnka minayabe aiq irarire. Manikánka omaq ato anímé íné teiú ání wenawíq Sísa wire úwe.

⁴ Úwara táhmaro Asiu kegá mi ehwéhnsábé aiq pútare atera Porareq Sáírasareq kobaritawe míowe. Manikánsabe áhteno Káríkí kéreq áhnte aboawah inínsónseqka moq kobaritawe míowe.

⁵ Minayabe íre aiq pútare ató Asiu kegá abiahnsanuwe. Abiahnsanéra ahbabáq ke pehipi máhkétirapéq nogó ké meriqmera momiwíue anotahtaq ehwehuwe. Porararé wehuke momiwíurabeq móritankeheéra wehukení wenawíq Sésónine nahtapeq pehbeheráhnue pokuwe. Pokue wene nahtapeqté ónsá subiqme sueruera Porararéyábé sinebahruwara íre míoye.

⁶ Íre míoyansabé sega Sésónireq mó Sísa tagaríah kéreq abariuera mi ke suwahpeqte wáhnáh kébá móritówe. Móriterá ehwehéra, Moke mah nahnsó ke ahbabárarítóya anítégá suroyataq

⁷ Sésóniga wene nahtapeq mehwéh aritowe. Mi anítégá itene anotah wáhnáh ání Sísáhrine sánsá íre mirauroye. Íre miraia peh iraréra, Mó Wahnáh ání

Sísae iraruye uwe.

8 Uwara mi ke suwahpeqte kéreq sene wah-nah kereqka mi ehwéh írótaq kurináhnéra abiahn-sanuwe.

9 Segá Sésónirehyabe, Kotiyabé ite móne paíqmáráhro éra sene móne mewera kaqsiúwe.

Porareq Sáírásareqka Péría suwahpeq arambehri-uya ehwéhne.

10 Ío penkúwara mibeqté Sísa tagariáh kégá Porareq Sáírásareq Péría suwahpeq eqmaq súówe. Eqmaq súówara Péría suwahpeq suyataq Asiu kené momiwí nahtápéq kibekéra síwáhnoruye.

11 Síwáhnoruyara mibeqté Asiu kegá irera Manikáne ehwehnsabé kawerue iwíáhue tagowe. Sene iwíáhgá Tésárónáíka suwahpeqte kéné iwíáh kiotaikúwe. Segá Porane ehweh írótaq sirupipeq eyoyóue Manikáne sehira mó wehekáh mó wehekáhnue sáhnsahwe iwíáhue tagéra, Porane ehweh aiq pútaqpomo éra iwíáhue tagowe.

12 Minayabe áhnte Asiu kegá aiq pútare atówe. Sereq mó áhnte ke, Káríki anotah weh áhrégá moq aiq pútare atówe.

13 Poraga Manikáne ehweh Péría suwahpeqkakáq teríre uwara Tésárónáíka suwahpeqte Asiu kegá írówe. Irera Péría suwahpeq séra mibeqté kékabé, Porane ehwehnsabé aiq pútare atehboq íre íráhro ue pagu pagunuwe.

14 Pagu pagunuwaru mibeqté Sísa tagariáh kégá Pora apubúue sóreq waní ayehrápéq eqmaq áuwówe. Eqmaq áuwówara Sáírásareq Tímótireqka peh mitaq míoye.

15 Míoyara ah tagaríáh kégá Pora meqmera Áténi suwahpeq máruntatówe. Máruntówana wega sensabé, Sáírasareq Tímótireqsabé, Peheráh setao teriéro úwara pokuwe.

Poraga Áténi suwahpeqte ké teriu ehwehne.

16 Poraga Áténi suwahpeq síwénunútaq mibeqté kégá áhnte péhepehe maníkáne atah naneq kowana tagéna wene arupipeq págege agúwe.

17 Minayabe Poraga Asiu kené momiwí nahtápéqté kéreq Manikánsabe iwíáh íwíáh ató kereqsabé ehwehnuwe. Máhkétirapéq mó wehekáh mó wehekáhnue su kereq moq ehwehnuwe.

18 Táhmaro mibeqté síwáhnoru kegá Porareq piehgiera áhnte ehwéh kíkírue ehwehnuwe. Mibeqté su kegá táhmaro Épíkúriane sásá ahtebowara mó tahmáró kégá Sítóíkine sásá ahtebowe. Táhmaro kegá seye náhenéra, Áhnte ehwéhkákáq ání aneq ehwéhkákáq ánipo uwe. Poraga Sísa oga úkú ehwéh teriunsabe mó kegá, We wáhnaupéqté máníkámári éhwéh tei teinire uwe.

19 Segá Pora meqmera Áréopágúsa sawéhráq ahtebia kégá momiwíurabeq móátówe. Móatera wensabé, Arega síwáhnóróna ehwéh peh o ehwéh míre. Mi ehwéh teio.

20 Arega iraréna ehwéh áwánáh éhwéh míre. Mi ehwéhmé áwahe ahtebanehboq kawerue teio uwe.

21 Áténi suwahpeqte kéreq mibeq wáhnaupéqté sewió kereqka ahriahri o ehwéh irera mi ehwéhnsábé irare irareuwe. Seyene sásáne.

22 Poraga Áréópágúsa sawéhráq ahreibia kégá momiwíurabeq iriwe ména mahraréna, Áténi suwahpeqte wého, ínéga iwíáhumé itene manikámarinsabé áhnite iwíáh iwíáho ke wóe.

23 Iteruwahpeq nogewótáq itega iwíáh íwíáhorabeq tagéwómé peh morá táhbérápéq kék séhírámá sáhnsahwe tagéwóge. Mi sehiránká mahraréna, Mah tahbé íre tagariona manikáné tahbe wire ire. Itega íre tagarawéq pehipi iwíáh íwíáh atáhnsabé minawé teiúge.

24 Teiúge éna mó mahraréna, Manikánka moke mah marákó márakóípéq kék náneqkakáq mah marákó márakóákáq mirarowe. We mah marákó márakóákáq íópeqkákáq wahnahnatiéh ání míre. Minayabe wega wehukega pearáh náhúpéq íre kaegaei ání míre.

25 We íre akahrákáhri ání míre. Wewega moke wehukene irupipeqté éúqkákáq moke kék náneqkakáq nái náinire. Minayabe wehukega we íre séhréh atáhráhowe.

26 Mah kehiná kékhnáné igaqna peh morá áníne. Manikánka mi aní téh mirarena itene ogamé tanahráq iwíáh aitéhre. Mah marákó márakórápéq mó kehiná mó kehinánsabé, Míáhro aitéhre.

27 Itega Manikánsabe kabarigeheéna mira íwíáh aitéhre. We tagarianeheéq kabarúne. Ite ómi kehiná miónarabeq we wahtotaq míéhre.

28 Maniká ména mira aruqaruri puaq itega oga míáhrahúne. Iteba sehira tagariéh áninká aiq mahraréna, Ite moke wene animáríne ire.

29 Ite Manikáne animárí míona puaq we peh wehukega iwíáhue mirao naneq mire íwíáhiyeho.

We íre ebahtaté miraia aníne. We íre móneraté miraia áníne.

³⁰ Naho wehukega Maniká íre tagariówe. We íre tagariarera, We peh wehukega iwíáhue mirao naneq mire íwíáhuwe. Mi tanáhráq Manikánka mi kewé peh áwé tagówe. Amahnága wega mah kehiná kéhínánsábé, Itene ahbabáq sansa súáhro ire.

³¹ Manikánka peh morá ání omaq atena wega iwíáhína tanáhráq mi anínká mah kehiná kéhíná tábúsoqme ehweh aritankéhe. Minayabe mah kehiná kéhínánká tagariageheéna Manikánka mi aní iriatena organúq atáráire úwe.

³² Míó kega organúq atárái ehwéh írówe. Táhmaro kegá awiréh atówara mó kegá Poransabé, Arene ehweh mókake móñkakáq iranéhe uwe.

³³ Uwana Poraga mitaq suena pokúwe.

³⁴ Pokúwara táhmaro wehwárínká we kerera wene ehwehnsabé aiq pútare atówe. Peh morá ání aiq pútare ato aní wenawíq Tíónísíae. Wereq mó ahtebia kéreq Áréópágúsa sawéhráq momiwíue aruqaruruwe. Peh morá íní wenawíq Támárisae. Wereq mó kereqka Pora kerera wene ehwehnsabé aiq pútare atówe.

18

Poraga Kórína suwahpeqte ké teriu ehwehne.

¹ Poraga Áténi suwahpeq suena Kórína suwahpeq pokúwe.

² Póntúsa marákórápéqté ání wenawíq Ákúíra míowana wene ahre awíq Párisírae. Se Asiu akéq menah Ítári marákórápéq míoyana mibeqjté

wáhnáh áníné áwíqtare Káróríúsa Sísáhrie. Mi wahnáhnká moke Aroma suwahpeq míó Asiu keyábé, Pokoro aritena kaqsuowara Ákúira akéqká Aroma suwahpeq suera Kórína suwahpeq kowióye.

Poraga mitaq se tagéna sene iyahnabo aní úkúwe.

³ Werek sereq peh morá árámbéhríuwe. Sene arambehriwe wéhuwehu nahmári piageheéra sériwarí kogahnue kawerarówe. Werek sereqne arambehri peh monseráh púana seba kobartawé míowe. Werek sereqka moraráq arambehriuwe.

⁴ Moke ahrena ahrena wehekáh Poraga Asiu kené momiwí nahtápéq Asiu kereq Káríki kereqs-abé Sísa éhwel terinieéna poku pokuúwe.

⁵ Sáírásareq Tímótireqka Másérónía marákórápéq suera Pora míorabeq suye. Segá suyataq Poraga Manikáne ehwéh Asiu ke teri terinéna, Manikánka omaq ato anímé Sísaé úwe.

⁶ Úwara író kega mi ehwéhnsábé ahqáho at- era íre kaweq ehwéh atówana wega sensabé, Aiq mire. Ínéga aiq teiúge éna wene ambanta suruparuena teriuwe. Itega iraipéq pokirame iteitene irupipeqté íwíáhgáe. Íné aiq pútaq ehwéh aiq teiúge. Itega ahqáho aintáhnsábé nahnsó ke korerinauge úwe.

⁷ Manikánsabe iwiáh íwíáh ato aní wenáwíqtare Títia Sásátae. Wene nah Asiu kené momiwí nahtápéq wahtotaruwana Poraga momiwí nahtápéq suena mi aníné nahtapeq kowíowe.

⁸ Asiu kené momiwí nahtápéqté wáhnáh aní wenáwíq Kárísápae. Werek mi karírónánínseqka

Sísansabé aiq pútare atówe. Áhnte mó Kórína suwahpeqte kégá Porane ehweh irera aiq pútare atera wání meyówe.

Porane awanka tagó ehwehne.

⁹ Inokáhpeq Porane awanka tagówana Sísaga wensabé, Íre áhreúno. Túbáh aginehboq néne ehweh pahsuo.

¹⁰ Ínéga areba míó púara mó kegá are íre subigéhe. Kórína suwahpeqte kewé áhnte kegá ínénabe aiq pútare aintagéhe úwe.

¹¹ Minayabe Poraga Kórína suwahpeq peh morá ópéq mó opéq ákáhtaq ména Manikáne ehweh síwáhnorúwe.

¹² Wehukení wenáwíq Kárioe. We Ákáia marákórápéqté wáhnáh míotaq Asiu kegá momiwíéra Pora táhtoqme ehwehurabeq móátowe.

¹³ Sega Káriónsabe, Mah anínká itega Manikánsabe iwíáh iwíáh atona sansá sueq mó sansánoro tei teinire úwe. Wega o teí sánsámé Mósísiga íre miraoro ú sansáne uwe.

¹⁴ Uwana Poraga ehweh irarinaútaq Kárioga Asiu keyábé mahraréna, Asiu keo, mi anínká ahkaragáraéna anotah ahbábárítatq tahirímé ínégá itene ehweh kawerue író irino.

¹⁵ Peh iteitene ehwehnkakáq wehukene síwíqkakaqsabé iteitene sánsánkákáqsábé iteitega iwíáhue miraoro. Íre néne arambehri puana túbáh aginauge éna

¹⁶ se moke ehwehurabeqte kaqsúáhro aritowe.

¹⁷ Kaqsúáhro aritowara Asiu kené momiwíurabeqte náhtápéqté wáhnáh wenáwíq

Sósáténi táhtoqme máhpeq subúwe. Subútaq Káríoga se peh áwé tagowe.

Poraga Ántíóka su wahpeq kouwekú ehwehne.

¹⁸ Poraga Kórína su wahpeq áhnte mó wehekáh ména Sénkáría su wahpeq pokúwana wene ayahra káúqauwowe. Pehipi íre káúqauwowana Asiu kené sánsánéna Poraga Manikánsabe ehweh teawunsabe káúqauwowe. Káúqauwowana Sísá tagariáh ké mitaq suena Párísírareq wenawehq Ákúírareq meriqmena sípi kewewena Síria marákórápéq pokúwe.

¹⁹ Segá sípi kewewera Épésa su wahpeq kuwe. Mitaq Poraga Párísírareq Ákúírareq suena Asiu kené momiwí nahtápéq kibekéna wereq Asiu kereqka ehwehnuwe.

²⁰ Mi kegá Poransabé, Mahtaq míahno uwana ahqáho éna

²¹ Épésa sensuwahpeq suanieútaq sensabé, Manikánka kouwekúno íwíah aintahnaraq kouwekinie úwe. Kouwekinie éna Épésa su wahpeq suena sípi kewewena pokúwe.

²² Sípiga Sésárla su wahpeq sútaq Poraga sípi suena kire Sísá tagariáh ké mehwéh aritanieéna Sarúsarama su wahpeq kiuwe. Mehweh aritena Sarúsarama suena Ántíóka su wahpeq tuwe.

²³ Táhmaro ió Ántíóka su wahpeq ména mitaq suena pokúwe. Wega Sísá tagariáh kéné sirupipeq kaweéq íwíah aritanieéna Kárétia marákóákáq Párígia marákóákáq mó mapéq mó mapérue nogena pokue teriáqme noguwe.

Ápóroga Épésä suwahpeqte ké ehweh teriú ehwehne.

²⁴ Peh morá ání, Árékásántaría suwahpeqte áninká Épésä suwahpeq séna wenawíq Ápóroe. We Manikáne sehira ahtebia ání ména kawerue teri terinú ani míowe.

²⁵ Mó kegá we Manikáne sansá áwáhnoruwana wega mó ke págegeue síwáhnorúwe. Peh morá Sísá éhweh ákáhtaq ahtebéna tábúsoqme teri terinéna Sóniga wání meriu ehweh moke ahtebówe.

²⁶ Épésä suwahpeq Asiu kené momiwí nahtápéq págegeue síwáhnorúwe. Wega síwáhnorútaq Párísírareq Ákúírareqka wene ehweh irera móbeq meqmera we íre ahtebó ehweh, Manikáne sansá tábúsoqme áwáhnoruye.

²⁷ Ápóroga, Íné Ákáía marákórápéqté ké kosíwáhnorinie íwíáhúwara Épésä suwahpeq Sísá tagariáh kégá wensabé, Kaweróne. Kosíwáhnorúno éra mibeqté Sísá tagariáh kégá we mehwéh atageheéra páhsí sehiranue áwúwe. Manikánka áhnte Ákáía marákórápéqté ké séhréh aritowara Sísansabé aiq pútare atówe. Anehe Ápóroga mitaq séna mi ke anotahtaq séhréh aritowe.

²⁸ Wega Manikáne sehira sáhnsahena, Manikánka omaq ato anímé Sísae teriuwe. Wehuke míópi págegeue teri terinúnsabe wene ehweh Asiu kené ehweh kiotaikúwe. Minayabe wega Sísansabé aiq pútare atáh ké anotahtaq séhréh aritowe.

19

Poraga Manikáne Awansabé Épésä ke teriu ehwehne.

¹ Ápоро Kórína marákórápéq míotaq Poraga sáwéhrapeq kótaikéna Épésa suwahpeq tuwara táhmaro Sísa tagariáh ké míowe.

² Míowana Poraga sensabé, Itega Sísansabé aiq pútare atárótaq Manikáne Awanka itene irupipeq aiq tutairo ue kasenúwe. Kasenúwara sega wensabé, Ahqáho. Manikáne Awa éhwel íre írátáúne uwana

³ Poraga sensabé, Aneq waní meroo ue kasenúwe. Kasenúwara sega wensabé, Sóniga wání meriátainserah mó kegá mina tahnsa wání meraune uwe.

⁴ Uwana Poraga sensabé, Sene ahbabáq sansa sutonsabé Sóniga wání meriátáire. Meriena mahraréna, Inehe sína anínsabé aiq pútare atáhro. Wenawíq Sísa uraire úwe. Sóniga irarú ehwel Poraga teriuwe.

⁵ Teriuwara írówana itene Wahnah Sísa áwírue wání náriuwe.

⁶ Poraga sensinetaba wene ayahnkaratáté táhtorotaq Manikáne Awanka sene sirupipeq tuwara sega kambare ehwéh iraréra Manikáne Awanka iwíáh arito ehwel iraruwe.

⁷ Mirau kewé airápété téhranítée.

⁸ Poraga Asiu kené momiwí nahtápéq kibekéna Manikánka wahnah wahnahnirabeqe éhwéh págegeue teriuwe. Teriuwara Asiu kegá wene ehwehnsabé áhntetaq kasenéra iwíáhuwe. Iwíáhuwana apahtáró iótáq miraúwara

⁹ táhmaro író kega wene ehwehnsabé íre aiq pútare atera saiyouwe.

Saiyoéra momiwíurabeq Sísane sánsánsabé íre kaweq ehwéh atówana Poraga se suena Sísansabé

aiq pútare atáh ké meriqmena pokúwe. Sigaru-rapéqté wáhnáh ání wenáwíq Tíránsasae. Poraga Sísansabé aiq pútare atáh ké meriqmena Tíránsasane sigaru nahpípéq mó wehekáh mó wehekáhnue síwáhnoréna ehwehnúwe.

¹⁰ Poraga téhtaré ópéq mi sigárúráq síwáhnorúwara moke Esia marákórápéqté Asiu kereq Káriki kereqka Manikáne ehweh írówe.

Owainawa íre kaqsuahráhu ehwéhne.

¹¹ Manikánka págegeue séhréh atowana Poraga anotah otáq sánsámári miraúwe.

¹² Minayabe mó kegá Poraga táhtoro ambántámári meyówe. Mi ambántámári awahre kebá móríúwara sene suwahre kaweragúwara owainawamarínká se suera pokuwe.

¹³ Táhmaro Asiu ahgórá kewé nahnsó suwahpeqtaq kégaeqaq tuegaeyaréu anímári méra owainawa kaqsuq kaqsurowe. Mi kegá itene Wahnah Sísa áwírue owainawamarí kaqsuanéhe íwíáhéra Poraga kaqsuonserah itega moq kaqsuanéhe íwíáhuwe. Minayabe sega mahraréra, Owainawano, Poraga teri terini ání, Sísa áwírue wehukení auwe pokúno teawune uwe.

¹⁴ Abapete téhtaré Asiu anímárinká owainawa-marínsabé mina tahnsa éhwéhnuwe.

Manikáne ehweh mibeq mahbeq arítéh ání wenáwíq Síkéba sibowá míowe. Wene anah-waréhga mó wehékáh mi ehwéhnuwana

¹⁵ owainawanka sensabé, Sísa aiq tagarióge. Pora moq aiq tagarióge. Itewe inseréhbo úwe.

¹⁶ Úwana owainawa wene arupipeq mío anínká seba ahkuagéna sene korósi moke subansuena

subiqmaq subiqmarúwara korahq tabagu tabaguúwara se pehrákora méra nahupeq suera máhpeq pehbeheráhnue pokuwe.

¹⁷ Asiu kereq Káríki kereq peh moke Épésa su wahpeqte kéréqka mi ehwéh irera áhtenuwe. Minayabe mi kegá itene Wahnah Sísá áwíq pankerera íwiáh íwiáh atowe.

¹⁸ Mi tanáhráq áhnte Sísá tagaríáh kégá sure sene ahbabáq sansa pahsuqme teríúwe.

¹⁹ Ahgora tagaríó kega sene ahbabáq pukúwári mewera ómi wehu kega tagaríotaq ira paríowe. Sega mi irá paríó pukúwári árahue kehramo éra sáhnsáhúwe. Sáhnsahera, Peh íregáritaq 50 táhúséni (50,000) moné tahnsa pukúwári ira parione íwiáhuwe.

²⁰ Púku ira parearónsabe Manikáne ehwehnka áhnte kene sirupipeq pówara sega págege anímári úkéra wene ehweh mitaq teri mahtaq terinuwana mi ehwéhnká abae agúwe.

Épésa kegá Pora ehweho ehwéhne.

²¹ Anehe Poraga iwiáhéna, Másérónia marákórápéqkákáq Ákáía marákórápéqkákáq pokinie. Mibeq Sísá tagaríáh ké koragéna sótaikue Sarúsarama su wahpeq pokinie. Mibeq Sísá tagaríáh ké koragéna sótaikue Aroma su wahpeq pokinie íwiáhuwe.

²² We kéróya aníté Tímótireq Érásátireq míoye. Poraga mi aníté Másérónia marákórápéq eqmaq suena we Esia marákórápéq pehgáriq tanáhráq míowe.

²³ Mi tanáhráq áhnte kegá Sísansabé aiq pútare atónsabe mó kegá áhnte abíáhnsánéra ehwehuwe.

24 Wehukení wenáwíq Témítíúsie. Wene arambehriwe káhpah tahnsa náneqtaté pehgáriq píksah tahnsá náneq mira aruqarurúwe. Mi ke su wahpeqte kéné péhepehe maniká wenáwíq Átémísie. Témítíúsireq mó kereqka Átémísine píksah tahnsá náneq miraera paiqme áhnte moné meyówe.

25 Témítíúsiga moke mi arámbéhrí mirau ke momiwí aritowe. Wega sensabé, Itega maniká tahnsa náneq miraonsabé áhnte moné meweúne.

26 Itega Porane sansá aiq tagarawéq wene ehweh aiq írátiáhwe. Wehukega mirao naneq íre aiq pútaq Manikáne tei teinire. Minayabe áhnte kegá itega mirao naneqsabé anetaníbo íwíáhowe. Íre peh morá Épésa su wahpeqte kégá áhnte Esia marákórápéqté kéréqka moq mira íwíáhuwe.

27 Minayabe anotah íre kawerire. Itene arambehri íre kaweragíneho. Mó kegá itene maniká Átémísine nahnsabe, Peh abehq náneq nahne íwíáhiyeho. Esia marákórápéqté kéréq mah kehiná kékínánseqka amahnága Átémísinsabé, Ano iní míahne éra iwiáh íwíáh atáhwe. Poraga wene ehweh síwáhnorinsabé mó kegá Átémísinsabé íre iwiáh íwíáh atera peh anetaníbo íwíáhiyeho úwe.

28 Úwara moke arambehriu kega mi ehwéh írótaq anotah abíáhnsánéra ehwehnabauwe. Ehwehnabaéra, Átémísiwe Épésa su wahpeqte kéné maniká anotah iníne uwe.

29 Minayabe mi kegá anotahtaq ehwehnéra kékéyéuwe. Téhranité Másérónía marákórápéqté áníté sensíwíq Káiúüsireq Árisátákirere. Poraga ahpeq nogutaq sega we kéróye. Kékéyéu kegá mi áníté

táhtoqme koti matábúrápéq abariuera móritówe.

30 Poraga, Íné wehuke momiwíorabeq pokinie úwara Sísa tagaríah kégá ahqáho atówe.

31 Táhmaro Esia marákórápéqté wáhnáh kégá Pó-rane iyahnabo anímári míowe. Sega mó anínsábé, Pora ehweh koreawo. Mahraue koreawe, We-huke momiwíorabeq pokínrehboq mitaq míahno ato éra eqmarówana koreawuwe.

32 Momiwíurabeqte kégá áhnte ehwéhnéra íre peh morá íwíáhuwe. Mó kegá mó ehwéhnuwara mó kegá mó ehwéhnuwe. Áhnte kegá iwiáhéra, Aneqsabé momiwíuno uwe.

33 Wehukení wenawíq Árékásántae. Asiu kegá we pagunera, Irigue ehweh terio uwana wega ehwéh terinieéna ayahnka saiqnówe.

34 Saiqnówara sega we tagéra, We Asiu aní míre éra ehwehnabauwe. Sega íre wahto tanáhráq téhtaré áhwáh moraráq ehwehnue mahraréra, Átémisi ite Épésa su wahpeqte kéné maniká anotah iní míre uwe.

35 Mibeqté kúsíkúsíqká momiwíurabeqte kékabé ehweh saiqnaruwe. Saiqnaritená sensabé, Épésa su wahpeqte wého, áraho? Írátíáhro. Itene anotah maniká Átémísie. Itewe Épésa su wahpeqte kégá wensabé iwiáh íwíáh atona nahtápéq wahnah wahnahnúne. Wene íopeqté ébáh tahnáa píkisáh wahnah wahnahnúne. Minayabe ómi kehinánká aiq tagaríah mino.

36 Mó kegá péhenóne íre irarerahowé. Minayabe ahbabáriyehboq tabasíwe míáhro.

37 Itega abariue móritáh ánítégá Átémísiwe íre ahbabáratehye. Segá wensabé íre abehq éhwéh atehye.

38 Témítíúsireq wene arambehrio kereqka ehweh kahnaraq sega koti orabeq koreriuwara mitaq kamahni kegá ehweh aritagéhe.

39 Itega mó ehweh kahnaraq wahba kégá koti orabeq koreríero. Segá iwíáhue teigéhe.

40 Anotah wahnáh kégá itensabé, Ibora aneqsabé tobego kasenirataq itega aneq ehweh terianéhnkono? Írakaumo. Ite ehweh íre kéhre.

41 Minayabe pehwehrue pokewáhro éna kúsíkúsiqka se kaqsuowe.

20

Poraga Másérónia marákórápéq pokú ehwehne.

1 Momiwíurabeqte éhwéh parabagútaq Poraga Sísa tagaríáh ké síáhrabéna, Ínéba sero úwara suwe. Suwana sirupipeq kaweq iwíáh aritanieéna Poraga ehweh teriuwe. Teriena mehweh aritena mitaq suena Másérónia marákórápéq pokúwe.

2 Poraga Másérónia marákórápéq pokue mó mapéq mó mapérue Sísa tagaríáh kégá págegeue kéránéhe íwíáhigeheéna ehweh teriuwe. Teriena Másérónia marákórápéq suena Káríki marákórápéq pokúwe.

3 Káríki marákórápéq kienä apahtáró ío mitaq ména sípi kewewena Síria marákórápéq pokinaútaq Asiu kegá, Pora suboneheqmúne uwe. Uwana Poraga mó iwíáhéra, Másérónia marákórápéq kouwekinie úwe.

4 Másérónia marákórápéq kouwekinie úwara mó kegá, Are kéranéhe íwíáhuwe. Pírusine ahninkawá Péría su wahpeqte ánínéna wenáwíq Sópátae. Tésárónáika su wahpeqte ánité sensíwíq Árisátákireq Sékúntareq míoye. Tébi su wahpeqte ání wenáwíq Káiúsi míéhre. Esia marákórápéqté ánité sensíwíq Tíkíkúsireq Tárópímareq míoye. Moke mi kereq Tímótireqka

5 Tóasa su wahpeq pokue mitaq itensabé íwénunuwe.

6 Íre muoráhi parétí né tanahráq parabagútaq íné Árükareq Porareqka Píripái su wahpeq sueta sípi keweweta pokowaye. Itaréitaréráq sípiipéq méta moberíáhtáq Tóasa su wahpeq íwénunu kebá sewaye. Seba séta abapete téhtaréráq mitaq míahwaye.

Pukú mahbí oga úkú ehwehne.

7 Mó wikí ebeqte wéhékáh itega táhutahuq keqme moráráq naneheeéq momiwíue míahwane. Mi tanáhráq Poraga ehweh teriuwe. Ahbiah pokinie íwíáhéna inokáhnabubu wene ehweh íre parabarusa peh irarúwe.

8 Abobórähpeqte náhúpéq momiwíue míahwanana áhnte aráhmúgá mitaq téhrówe.

9 Peh morá máhbí wenáwíq Íyútíkae. Wega abobórähpeqte náh áwáhnkúráq tútuue míowe. Poraga íre wahto ehwéh teriu púana mi mahbí sug-ekúwe. Sugekú púana máhpeq inahnsubuwara tueyokue tagowe. Tagéra tuiriatómé putiowe.

10 Putiowana Poraga moq tueyokue tagéna tutaebewe mi mahbí saiqnawe káhkoue míoye. Por-

aga míó keyabé, Íre ibisahro. We amahnága oga míéhre úwe.

¹¹ Poraga tuekue kiutaq itega táhutahuq keqme moráráq nahwane. Poraga áhnte mó ehwéh teriena tuekutaq ahbiahipeq mitaq suena pokúwe.

¹² Oga úkú mahbíné awahrahga we meqmera awaho ani mío púara sirupipeq eyoyóéra sene näh-tapeq pokuwe.

Poraga Tóása suwahpeq suena Mírétíusi suwahpeq pokú ehwehne.

¹³ Poraga pokinaútaq itensabé, Ásósa suwahpeq íwénuninauge éna iuwena ahtapeq pokúwe. Pokúwaq itega sípi kewewe Ásósa suwahpeq Pora sípiipéq koweraneheéq pokowane.

¹⁴ Itega Ásósa suwahpeq Porareq piehgiowánaraq sípi kewewe Mítíríni suwahpeq pokowane.

¹⁵ Itega mitaq sueq sípi kewewe mó wehekáh Kíósa suwahpeq marakó kowaq kótaikowane. Mó wehekáh Sámósa suwahpeq sewane. Mitaq sueq mó wehekáh Mírétíusi suwahpeq sewane.

¹⁶ Asiu kené siahrreraq ko tanahráq áwíq Péntíkósie. Poraga iwíáhéné, Péntíkósi tanahráq íné Sarúsarama suwahpeq méyabe nuwahbehre. Minayabe amahnága Esia marákórápéq suena sípi kewewena apubúue Sarúsarama suwahpeq pokinieéna Épésa suwahpeq íre kowíanauge. Peh kótaikinie íwíáhúwe.

Épésa suwahpeqte kékabé iroro arito ehwehne.

17 Poraga Mírétsí suwahpeq míotaq Épésa suwahpeq Sísa tagaríáh ábóawáh wéh kiwerirankeheéna eqmarowe.

18 Épésa suwahpeqte Sísa tagaríáh ábóawáh wéhwé Poraba sutaq wega sensabé mahraréna, Íné Esia marákórápéq téh surautaqkákáq amahnágaákáq itereq mía míaugaq néne sánsá tagaríáhwe.

19 Anotah aní méyabe nuwahriarairana peh Manikáne arambehriéyabe nuwahbarairana mira aruqaruruge. Ite tagaríáhmé Asiu kegá áhntetaq moraénue níwíoqnarutowana áhnte tanáhráq ibisarauge.

20 Wehuke momiwíurotaqkákáq mó natáq mó natárue ite séhréhorahi ehwéh pahsuqme tei teinurauge.

21 Asiu kereq Káríki kereqsabé, Itene ahbabáq sansa sueq Manikánsabe áhraboro. Itene Wahnah Sísa Karáhénsabe aiq pútare atáhro tei teinuraugaq tagaríáhwe úwe.

22 Poraga mó mahraréna, Manikáne Awanka pokúno aintaráinsabé íné amahnága Sarúsarama suwahpeq pokinie. Mitaq sega nubiq suaneherabowamo. Árahoneherabowapómo. Íné íre tagarióge.

23 Peh morá íné niahtebome Sarúsarama suwahpeqte kégá níwíoqnéra karábúsiipéq móintagéhe. Mó mapéq mó mapérue séyéurautaq Manikáne Awanka mó ke iwiáh aritowara mira éhwéh teni teninowe.

24 Sega nubiq súéhransabé íre áhreuge. Minayabe anetaníbo. Itene Wahnah Sísa Karáhéga teniátái arámbéhrí parabarueyabe nuwahbehre.

Manikánka ite séhréh aitená kaweraitéh éhwéh teri terinéyabe nuwahbehre úwe.

25 Poraga mó mahraréna, Manikánka wahnahni ehwéh ite míáhrabeq tei teinurauge. Íné tagariómé amahnága pokonaraq mókake íné mó íre tagagehe.

26 Ibora pahsuqme teiníboq írátíáhro. Iraipéq pokira kegá ínénabe íre abiahnsa aintahráhowe.

27 Íné íre túbáh agia Manikáne sansá moke pahsuqme íwáhnorurau puara íre abiahnsa aintahráhowe.

28 Manikáne Awanka ite omaq itena, Wah-nahnúno aitáráire. Wahnahnúno aitárái puaq sipisípiq wahnáhnká wene kamarí wahnahninserah itega moke Sísá tagariáh ké moq kawerue wahnahnarítáhro. Kawerue wahnahnariteq Sísaga mi kené ahbabáqsabe wene korahqtaté paiqmataire íwíáhoro.

29 Sísane sánsá íre tábúsoqme miraéra peh mó sansá miraigeheéra íné pokona tanáhráq mó kegá séra péhe éhwéh íwáhnorigehe. Úrinsi iánká sipisípiq subínserah sega ite morábí méra íre kaweraitagéhe.

30 Sísá tagariáh kégá wehukene sánsá miraigeheéra ite míáhrabeqte kégá moq péhe éhwéh íwáhnorigehe.

31 Minayabe íwéh panatágínaq uqmatiáhro. Apahtáró ópéq wéhékáhnkakaq inokáhpeqkakáq itensabé nirutaboiréna kawerue íwáhno aruqaruruge. Minayabe iahreraq matiáhro úwe.

32 Poraga mó mahraréna, Manikánka séhréh aitéh éhwéh anotah pagégé éhwéhne. Mi ehwéh íréhrataq itega kaweqtaq míáhrahewe. Mi ehwéh íréhrataq itega kaweqtaq méq oga míáira kereq

moráráq míagehe. Minayabe Manikáne ehweh kawerue ireq wene sánsá miraoro.

³³ Iteba míarau tanáhráq mó aníné korósiakáq móneakáqsábé íre nirutaboirurauge.

³⁴ Ínéreq séhréh aintáh kéreq táhutahuroneheéna ínénéga arambehriurauge. Minayabe tagariáhwe.

³⁵ Itega mareqmarero ke séhréh aritaneheéq kawerue arambehrioro. Ínéga aiq mira aruqarunserah arambehrioro. Itene Wahnah Sísaga mahrraréna,

Mó anínká are náwi tánáhráq are iwíáh íwíáhóne.

Arega mó aní náwena tanáhráq anotah iwíáh íwíáhóne uraire. Mi ehwéhnsábé iahreraq matíáhro úwe.

³⁶ Poraga mi ehwéh aiq teriutaq wereq aboawah wehreqka sirehunseraráq méra púreruwe.

³⁷ Púreq ehwéh parabagútaq sega Pora káhkoue mehwehéra ibisowe.

³⁸ Poraga, Mókake íné mó íre tagagehe únsabe sirutaboiréra ibiséra we sípiipéq meqmera móauwera kowekuwe.

21

Porareh Sarúsarama su wahpeq poku ehwéhne.

¹ Itega Épésa su wahpeqte ábóáwáh wéh sueq sípi kewewe q'obariqme kure Kósa marákórápéq pokowane. Mó wehekáh itega Árórésa marákórápéq kék mitaq sueq Pátára su wahpeq pokowane.

² Mitaq séq Pónisia marákórápéq pokína sipí kabarue tagéq mi sipí kewewe q'obariqme pokowane.

3 Sáípára marákórápéq ábóraq kowanaraq tagéq marakó ayehrápéq kótaikowane. Kótaikéq Síría marákórápéq tagéq Táíya suwahpeq korahowane. Mó kegá sípiipéqté ménsáméhnsá mewe marakóipeq sáharótaq

4 itega Táíya suwahpeqte Sísa tagaríah kóbá kowíahwane. Kowéq abapete téhtaré wéhékáh seba kowíahwane. Seba míahwanaraq Manikáne Awanka se iwíáh aritowara sega Pora teawera, Wehukega are subiq súéhboq Sarúsarama suwahpeq pokineho uwe.

5 Mi tanáhráq parabagútaq itega pokonehe íwíáhéq kaegaeowanarabeq suahwáne. Suahwánaraq moke mibeqté kéréq sene kárironanínseqka meiqmera ahnansahrapeq méíuwówe.

6 Itega arahwéraq irehunseraráq méq púreréq iriwe mehwehowane. Mehweh ariteq sípiipéq ki-asagowanara tagéra sene nahtapeq seuwekuwe.

Ágábúsaga Sésária suwahpeq Pora ehweh teawuwe.

7 Itega Táíya suwahpeq sueq sípi keweweque pokue Tórémési suwahpeq pokowane. Mibeqté Sísa tagaríah kéréq mehwehqué peh morá wéhékáh seba kowíahwane.

8 Mó wehekáh itega mitaq sueq Sésária suwahpeq pokowane. Mitaq Pírípíne nahtapeq kaegaeowanane. Eqmaro kega abapete téhtaré wéhuké omaq sitótaq Pírípi omaq atówe.* Pírípi Sísa éhwéh teri terinu aní míowe.

* **21:8:** Pírípinsabé éhwéhmé Eqmaro 6.1-5, 8.5-6, 26, 40 tagáhno.

9 Wene ayahunkawaréh itaréitaré ítaq ahrárígáú míowe. Manikáne Awanka iwíáh aritowara se wene ehweh iraru ahrárígáú míowe.

10 Itega Sésária suwahpeq kaegaeowanaraq táhmaro wehekáh parabagútaq wehukení wenawíq Ágábúsaga Súría marákórápéqté tuwe. Manikáne Awanka iwíáh atowana wega wene ehweh irarerahúwe.

11 Wega iteba séna Porane áréti pugeqme mewena minarate wewene aigará ayahnkara táchru táchruúwe. Táchru táchruéna mahraréna, Ínéga táchru táchruunserah Sarúsarama suwahpeqte Asiu kegá mah arétí abo moq táchru táchruigehe. Táchru táchruera nahnsó kebá móatagéhe. Mah ehwéhmé Manikáne Awanka aiq irarire úwe.

12 Mi ehwéh irahwánaraq itereq mitaq mío kerekka Poransabé, Sarúsarama suwahpeq íre pokúno éq saiqnahwane.

13 Saiqnahwanana Poraga itensabé, Nirupipeq umehínehboq aneqsabé saiqnéq ibisaho? Karábúsiyabé íre áhreuge. Itene Wahnhah Sísane arambehri miraunsabé Sarúsarama suwahpeq nubiq suaneherabowapómo. Anetaníbo úwe.

14 Anetaníbo úwaq wega itene ehweh íre ironsabe túbah agéq, Maniká awabeh sansá mirainkehe ewane.

Poraga Sarúsarama suwahpeq pokú ehwehne.

15 Mi tanáhráq parabagúwaq ménsámehnsá sokahueq Sarúsarama suwahpeq pokowane.

16 Sésária suwahpeqte Sísa tagariáh ké táhmaro kegá ite kie irówe. Wehukení wenawíq Násónie. We Sáípára marákórápéqté ánínéna íre wahto tanáhráq

Sísa tagariowe. Kie iró kega Násónine nahtapeq kaigeheéra móítówe.

¹⁷ Itega Sarúsarama suwahpeq kowanaraq mibeqté Sísa tagariáh kégá sirupipeq eyoyóéra mehwéh aítówe.

¹⁸ Mó wehekáh Porareq itereqka Sémísiba pokowanara ómi Sísa tagariáh ábóáwáh wéh míówe.

¹⁹ Poraga sereq mehwéhéná Sísa éhwéh nahnsó ke moke teriunsabe Manikánka miraú arámbéhrí sáhnsahwe teriuwe.

Aboawah wehwárínká Poransabé, Manikánsabe iwíáh íwíáho nahtápéq pokúno ato ehwehne.

²⁰ Poraga miraú arámbéhrí sáhnsahwe teriuwara aboawah wehgá írótaq Manikánsabe iwíáh íwíáh atera we anotah aní míre íwíáhuwe. Segá Poransabé, Iteribáq móne. Áhnte, peh íregáritaq Asiu kegá Sísansabé aiq pútare atáhwe. Segá Mósísga sehgióro ú ehwehnsábé íwíáh íwíáh atáhwe.

²¹ Wene ehweh íwíáh íwíáh atáhwara arega miraurona sansámé mó kegá se péhepehe ehwéh teríátowara aiq írátówe.

Mi pehe éhwéh mahraréra, Arege nahnsó ke míáhrabeqte Asiu keyábé, Mósísga sehgióro ú ehwehnsábé anetaníbo. Itene aniné áú amurúráhro ú sansánkákáq mó Asiu kené sánsánkákáq íre miraoro teri terinire ewe.

²² Itega tagarionawe arega aiq sire u ehwéh Asiu kegá iraneherawoe. Minayabe amahnága aneronehnkono?

²³ Aneronehnkono éra sega mó mahraréra, Asiu kegá túbáh agigehboq itega teawéna ehwéh miraúno. Mahbeqté itaréitaré

wéhükégá Manikánsabe, Itene omasa éhwéh miraoneheqmúne teawéwe.

24 Arereq mósoisuagéhboq mi anímári meriqme Manikánsabe iwíáh íwíáh atáh náhtápéq mórito. Titironeherau ka paiqmaro. Anehe sene siyahra káúqsuagéhe. Mirairataq ómi kegá tagarianeheéra Mósísiga sehgóiro ú ehwéh anteruhnayabé íre aiq pútare atagéhe. Peh Mósísine ehweh kawerue sehgione íwíáhigehe uwe.

25 Sísa tagariáh ábóawáh wéhgá mó mahraréra, Sísansabé aiq pútare atáh náhnsó ké páhsí iwíáhue sehiranue síátóne. Mi pahsígá mahraréna,

Péhepehe maníkánsábé iwíáh íwíáhoneheéra titirataq náira naneq íre nahro. Korahq íre nahro. Wehukenínká awio párikí náneq ka íre nahro. Mó kené ahrewe ahrariwe wehwe mahbiwe íre abarioro ire.

Peh miraue iwíáhue sehiranue teríátáune uwe.

26 Uwana Poraga kowe éna omasa éhwéh miraoneheqmúne u animári móritowe. Mó wehekáh wereq sereqka sosúó sansa áhwáréra Manikánsabe iwíáh íwíáh atáh náhúpéq kibekuwe. Sosúó sansa parabagína tanáhráq mibeq mahbeq arítáh ké terieneheéra kibekuwe. Teriera, Mi tanáhráq parabagínaraq itega Manikánsabe iwíáh íwíáh ateq titironehe uwe.

Asiu kegá Pora saiqnaruó ehwehne.

27 Sosúó sansamé abapete téhtaré wéhékáh parabaginaútaq Esia marákórápéqté Asiu kegá Pora tagowe. We Manikánsabe iwíáh íwíáh atáh náhúpéq míowara tagéra abiahnsanuwe. Sega Pora táhtoqme

28 nahtapeq míó kega ehwehnabaéra mahraréra, Ísara keo, séhréh aitáhro. Mah anínká ómi mah kehiná kékínánsábé íte Asiu ke íre kaweq ke wóe síwáhnoréna Mósísiga sehgóro ú ehweh anterúáhro ue síwáhnorire. Mah nahnsábé anetaníbo ue síwáhnorire. Wega mó ahbabáritéhmé Káríki ke Manikánsabe iwíáh iwíáh atáh náhúpéq móárítéhre. Móárítéh púana wega mah kawéq nahnsábé íre kaweratéhre uwe.

29 Épesa su wahpeqte ání wenáwíq Tárópímae. Menah Asiu kegá wereq Porareq Sarúsarama su wahpeqte áhtápéq nogúyataq tagowe. Mitaq tagonsabe sega péhe iwíáhéra, Poraga Manikánsabe iwíáh iwíáh atáh náhúpéq nahnsó aní meqme surainsabe órira mire uwe. Meqme móátaráire ume péhe éhwéhne.

30 Minayabe ehwehnabaéra ómiga abiahnsanéra pehbeheráh seyeue sorupera Pora Manikánsabe iwíáh iwíáh atáh náhúpéqté táhtoqme abariuera máhpeq márunatera onsawári paiqsúowe.

Aroma sontiá kégá Pora tátoró ehwehne.

31 Segá Pora suboneherautaq Aroma sontiá kéné anotah wahnáhnká ómi Sarúsarama su wahpeqte kégá aiq tobewhowe u irowe.

32 Irena wega apubúue sóntiá keákáq sene wah-nah animáráinkákáq meriqmena pehbeheráh túwe. Túwara Pora subu kegá mi ke tagéra túbáh aguwe.

33 Sóntiá kené wahnahnka Poraba tuena táhtoqme téhtaré séníraté táhraráhro úwe. Táhraráhro éna, We insebo? Aneq ahbábáriro kasenúwe.

34 Kasenúwara áhnte kegá míó púara ehwehnabaéra mó kegá mó ehwéhnuwara mó kegá mó

ehwéhnuwe. Áhnte ehwéhnu puara wega íre kawerue irahráhúnsabe sóntia keyábé, Ite kaegaeo nahupéq móátáhro úwe.

35-36 Kaegaeo nahupéq kibekoneherautaq se kéró kega paentáwe kéra ehwehnabaéra, Subiq súáhro. Subiq súáhro uwe. Subiq súáhro unsabe Pora subiyehoéra sóntia kegá we sawiwera nogúwe.

Poraga Asiu ke we éhweh teriu ehwehne.

37 Segá we nahupeq móataneherautaq Poraga Káríki ehwéhtáq sóntia kené wahnahnsabé, Ehweh teawinínkono kasenúwe. Kasenúwana mi áninká éhnehéna, Are Káríki ehwéhmé aiq írátíahne éna,

38 Menah peh morá Ísípi marákórápéqté áninká kámáhni ke ebehinkeheéna áhnte ke 400 subiq suahráho ke meriqmena uworapeq pokuraire. Íné iwíáhume, Arewe we wone iwíáhume úwe.

39 Úwana Poraga, Íné Asiu aní múge. Íné Sírisía marákórápéq Tahsa su wahpeqte aní múge. Tahsa su wahpeq áhnte nahnsó ké míáhwe. Íné mahtaq míáh ké ehweh terinie úwe.

40 Úwana, Terio únsabe Poraga awahsahniataq méwotate irigéna míó kega ehiyansá agigeheéna ayahnkaratáté saiqnówe. Saiqnówara túbáh aguwana Poraga Asiu kené ehwehtaq mahraréna,

22

1 Nánibáqmari móe. Nániboreh wóe. Nánuwahraho, néne ehweh íráhro. Íné íre ahbabáq anine ue iahtebagehboq néne ehweh íráhro úwe.

2 Wega Asiu kené ehweh irarúwara irera ehiyansá aguwe.

Ehiyansá aguwana Poraga mahraréna,

³ Íné Asiu aní múge. Nánoga Sírisía marákórápéq Tahsa suwahpeq maqinténa Sarúsarama suwahpeq méintowana mahtaq anonúkowae. Anotah síwáhnori aní Kámáriaga iteriborehne sansá irankeheéna kawerue níwáhnoruraire. Ibora itega Manikáne arambehri mira onserah ínéga moq mira aruqarururauge.

⁴ Menah ínéga Sísansabé aiq pútare atáh ké pukigeheéna síwíognarauge. Wéh ahre táhtoqme táhru táhruena karábúsipéq móritáráuge.

⁵ Manikáne ehweh mibeq mahbeq arítáh kéné wahnahnseq aboawah wehreqka minayabe tagéra teieráhowe. Sega Támákása suwahpeqte Asiu ke páhsí sinkeheéra sehiranue níátówe. Íné Támákása suwahpeq pokurauge. Mibeqté Sísa tagariáh ké táhru táhruue Sarúsarama suwahpeq móritanieéna pokurauge. Se kamah ariníe íwíáhurauge úwe.

Poraga íopeqté téhreh naneq tagónsabe teriu ehwehne.

(Eqmaro 9.3-19, 26.12-18)

⁶ Poraga mó mahraréna, Íné ahtapeq pokue Támákása suwahpeq kinaurauge. Kinauraugana wéhékáhnabubu íné kuraurabeq apubúue íopeqté anotahtaq téhraguraire.

⁷ Téhragurairana marakóipeq márunsurahéna ehweh írátáuge. Mi ehwéhnká mahraréna, Sorao, Sorao, aneqsabé níwíognahno uraire.

⁸ Urairana ínéga, Anotah aníno, are insebo urauge. Uraugana wega ínénabe, Íné Sísa Néhsara

suwahpeqte ání arega níwíoqnáhna aní múge uraire.

⁹ Íné sénító kegá téhragurai tagéra peh teniátái ewhéh íre írátowe.

¹⁰ Ínéga, Néne Wahnaho, anerininkono kasenurauge. Kasenuraugana wega ínénabe, Irigue Támákása suwahpeq pokúno. Mitaq arega moke miraina arámbéhri teawiníe uraire.

¹¹ Anotah téhrarainsabé íné íre tagahrahurauge. Íre tagahrahrau puara íné sénító kegá niyahtaq ahmboqméra Támákása suwahpeq móíntárówe úwe.

¹² Poraga mó mahraréna, Mibeqté ání wenawíq Ánáníásie. We Mósísiga sehgóro ú ehweh kawerue írátái aníne. Moke wenawahrah Asiu kegá, We aiq kaweq aníne íwíáhuwe.

¹³ Ánáníásiga ínéba séna iriwe ména ínénabe, Soraio, nánibáq móne. Arega tagahrahóne urairana niura apubúue kaweragurairana we tagarauge.

¹⁴ We tagaraugana wega ínénabe, Itene igaqnaréhne Manikánka wene sásá ahtebankeheéna are omaq atéhre. Wene kaweq ahnínkáwá tagé wene ehweh irankeheéna are omaq atéhre.

¹⁵ Arega wene ehweh ómi kehinánsábé terinkéhe. Arega tagé írátóna ehweh terinkéhe.

¹⁶ Amahnága túbáh aginehboq iriwe mé wání meyo. Arene ahbabáq kaqauwankéhboq Sísansabé áhrabúno uraire úwe.

Manikánka Poransabé, Nahnsó ke néne ehweh kororio ú ehwehne.

¹⁷ Poraga mó mahraréna, Íné Sarúsarama suwahpeq seuwekurauge. Mibeqté Manikánsabe iwíáh íwíáh atáh náhúpéq púrerurautaq néniwanka

18 Sísa tagarauge. Tagaraugana wega ínénabe, Mahtaqté kégá arene ehweh íre aiq pútare atéhra puah Sarúsarama suwahpeq apubúue sue móbeq pokúno uraire.

19 Urairana ínéga wensabé, Néne Wahnahno, Asiu kené momiwí nahmárítápéq arensabé aiq pútare atáró ke subiqme karábúsiipéq sítaráuge. Minayabe mahtaqté kégá tagaríáhwe.

20 Sítibéni arene ehweh teríátái anímé Asiu kegá ebahnsataste subítotaq ínéga wahtotaq iriwe ména we pukime aiq kawerire éna subitó kené káhq ambántámárítáq wahnahnurauge teawátáuge.

21 Teawátáugana wega ínénabe, Nahnso suwahpeq íre wahto marákórápéq eqmaraníe. Arega nahnso ke néne ehweh korerinkéhboq pokúno teníátáire úwe.

Aroma wahnáh áninká Poransabé kasenú ehwehne.

22 Poraga teriu ehwéh sega kawerue írówe. Írówana Poraga nahnso keyábé irarútaq sega ehwehnabaéra mahraréra, We oga míehmé anotah íre kawerire. Subiq súáhro uwe.

23 Porane ehweh íre suwahbó púara sega ehwehnabaéra sene ambantamarí ugurue tuperúpeéra tanahuqkakaq mewe tuperúpeuwe.

24 Segá mirauwana sóntia kené wahnahnka, Mi aní nahupeq móátáhro úwe. Móátáhro éna, Asiu kegá aneqsabé abiahnsanéra áhnte ehwéhnoo íwíáhúwe. Iwíáhéna, Teninkéhboq mah aní áréti sahtáté subóro aritowe.

25 Segá we subiqmaraneheéra wene aiayah táhru táhruuwana Poraga weba wahtotaq iriwe mío

wahnáh ánínsábé, Íné Aroma aní múge. Aneqsabé ehweh íre aintasa pehipi nuboneheo? Mi sansá aiq mirao sansánoo úwe.

26 Úwana kiápéténiga irotaq anotah wahnáh ánípá pokue wensabé, Itega suboneheú aní Aroma aní míéhnsábé anerinibo úwe.

27 Úwana wega Poraba séna wensabé, Are Aroma anípo? Tenio úwana, Kowe úwe.

28 Kowe úwana anotah wahnáh ánínká wensabé, Íné áhnte moné paiqmataunsabé Aroma aní úkurauge úwe. Úwana Poraga wensabé, Náinoga maqintotaq Aroma aní maqintowe úwe.

29 Úwara Pora suboneherau kegá irera apubúue auwera peh tagowe. Anotah wahnáh ánínká iwíáheña, Mah aní Aroma aní míehrana táhru táhruéwómé íre kaweruge. Íre kaweruge éna wega moq áhreúwe.

Poraga momiwíuríó ke teriu ehwehne.

30 Áhreéna arupipeq iwíáheña, Asiu kegá aneqsabébópoq we ehweh atáhwe. Iranié iwíáheña mó wehekáh wega, Pora táhraró nahgáq pugeq áuwáhro aritena, Manikáne ehweh mibeq mahbeq arítáh kéreq mó kaunsíri kéreqsabé, Momiwíoro aritowe. Momiwíoro aritena, Pora meqme momiwíurabeq móátáhro aritowe.

23

1 Poraga kaunsíri ke ebitáwéna mahraréna, Nánuwahraho, Manikánka nirupipeq tagariéhre. Menahnkákáq amahnágaákáq kaweqlaq mía míauge úwe.

2 Peh morá wáhnáh ání Ánáníásiga Manikáne ehweh mibeq mahbeq arítáh ké wahnahnúwe. Wega Poraba iriwe míó keyabé, Wene áwéh suranóro aritowe.

3 Aritowana Poraga wensabé, Awisúttagi wirá áwánká taberábe pentí abaq máráhwara awisúttagi awánká íre tagahrahewe. Mina inserah are kaweq ambántá úbíq miahnawe arene arupipeq peh awisúttagi wirá áwánká tahnsane. Arega íné áwéh suranóro aritahnaga Manikánka are mina tahn-saninkehe. Arega mitaq tútuue Mósísiga sehgóro ú ehweh iwíáhé ehweh aintahne. Minayabe aneqsabé níwéh suranóro aritahno? Miraónaga Mósísine ehweh aiq anteruahne úwe.

4 Úwara Poraba iriwe míó kega wensabé, Manikáne ehweh mibeq mahbeq aitáh kéné wahnahnsabé aneqsabé ehweh atahno uwe.

5 Uwana Poraga sensabé, Manikáne ehwehnka mahraréna,

Itene wahnahnsabé abehq éhwéh atéhneho ire.
(Kisim Bek 22.28)

We Manikáne ehweh mibeq mahbeq aitáh kéné wahnah tagaríótáq tahirímé mi éhwéh íre iraru irino úwe.

6 Kaunsíri kewé mó akáhtáq Sáyúsi ke míowara mó akáhtáq Péhrasi ke míowe. Minayabe Poraga se tagéna iwíáhue momiwíuriórabeqte kényábé anotahtaq mahraréna, Nánuwahraho, íné Péhrasi aní múge. Nániboreh Péhrasi kené sánsá mirau ke míowe. Manikáne omasa éhwéhnsabé aiq pútare atena wega mókake pusa ké organúq sitankéhe iraruraunsabé ehweh aintáhwe úwe.

7 Péhrasi kegá mó iwíáhuwara Sáyúsi kegá mó iwíáhuwe. Íre morá íwíáhunsabé seye ehwehuwe.

8 Péhrasi kegá iwíáhéra, Mókake Manikánka pusa ké organúq sitankéhe. Sega íópeqté kéréq Maniká míéhrabeqte kérreqsabé aiq pútaq míáhwe íwíáhuwe. Sáyúsi kegá minayabe íre aiq pútare arítowe. Sega iwiáhéra, Manikánka pusa ké íre organúq sitanawire íwíáhuwe. Minayabe se mó iwíáh mó iwíáhu puara seye ehwehuwe.

9 Anotah ewhélhutaq táhmaro Péhrasi sansá síwáhnoro kegá iriwe méra mahraréra, Itega iwiáhúnawe mah anímé íre ahbabáq anine. Íópeqté ké, Maniká míéhrabeqte kégá ehweh teawátowapómo. Itewe íre tagariahrahúne uwe.

10 Unsabe seye áhnte ewhéhnaunsabe sóntia kené wahnahnka, Asiu kegá Pora abariwe subíyeho íwíáhéná, Sóntia keyábé, Mi aní tutáhtoqme sabiwe meqmeq itega kaegaeorabeq móátáhro aritowe.

11 Mó penórábéq Sísaga Poraba sebatawe ména wensabé, Íre áhreúno. Íné éhweh arega Sarúsarama suwahpeq teriátónanserah mókake Aroma suwahpeq moq terinkéhe úwe.

Asiu kegá, Pora subiq suaneheqmúne u ewhéhne.

12 Mó wehekáh Asiu kegá sío síoéra moráénéra, Manikánka tagaríéhre. Wánínkakaq táchutahuqkakáq pehipi íre naneheqmúne. Ebeq Pora subiq sueq anehe táchutahuq nanehe uwe.

13 Áhnte weh 40 wehgá miraue sío síoéra moráénue iwíáhuwe.

14 Sega Manikáne ehweh mibeq mahbeq arítáh kéréq Asiu kené aboawah wehreqpa

pokue sensabé teriera, Manikánka tagariéhre. Itega wánínkakaq táchutahuqkakáq pehipi íre naneheqmúne. Ebeq Pora subiq sueq anehe táchutahuq nanehe.

¹⁵ Minayabe itereq mó kaunsíri kérreqka sóntia kené wahnahnsabé péhe éhwéh mahrarero. Mahraréq, Itega Pora éhwéh tábúsoqme iranéhboq iteba meqme súno ero. Itega ahtapeq wahnhahnurawéq wega sinaraq suboneheqmúne uwé.

¹⁶ Uwana Porane anahnowáné ahninkáwágá mina mehwaró ehweh irowe. Irena sóntia kegá kaegaeurabeq kibekue Pora teawuwe.

¹⁷ Teawuwana Poraga kiápéténinsabé áhrabéna mahraréna, Mah mahbígá arene wahnah aní ehweh teawinkéhboq meqme móato úwe.

¹⁸ Úwana wega meqmena anotah wahnáhpá móatena wensabé mahraréna, Mah mahbígá ehweh teawinkeheéna meqmena suge. Karábúsiipéqté ání wenáwíq Poraga níáhrabue we meqme areba móato teníre úwe.

¹⁹ Úwana anotah wahnáh ánínká mahbíne ayathaq panantáwe meqmena kopípéq mógasenúwe. Kasenéna, Aneq éhwéh teniníbo úwana

²⁰ mahbiga wensabé, Asiu kegá moráénéwáhwe. Segá arensabé, Ahbiah Porawe kaunsíri kebá meqme súno teawigéhe. Pora éhwéh tábúsoqme iranéhboq iteba meqme súno teawigéhe.

²¹ Minayabe aiq pútare arítéhnehboq 40 kegá mehwatíáhwe. Segá aiq mahraréra, Manikánka tagariéhre. Itega wánínkakaq táchutahuqkakáq pehipi íre naneheqmúne. Ebeq Pora subiq sueq anehe táchutahuq nanehe ewe. Segá amahnága

sokah sokahue míáhwe. Peh arene ehwehnsabé áwénunowe úwe.

22 Úwana anotah wahnáhnká mi mahbíyábé, Arega tenienawe mó ke teríneho. Pehwehrue pokéwahno éna eqmaq auwowe.

Pora kámáhni wahnáh ání wenáwíq Péríkiba móato u ehwehne.

23 Eqmaq auwena téhtaré kiápéténi síáhrabúwe. Síáhrabéna sensabé, Inokáhpeq wehuke sugé tanahráq Pora Sésárla suwahpeq meqmeta móátáhtao. Áhnte sontiá ké 200 sontiá kéreq 70 oségá káhkóawíah sóntiá kéreq mó áhnte 200 sehsabekara matiáh sóntiá kéreq sokah sokah arítáhtao.

24 Pora moq óseraq tútuue míahnaraq anotah wahnáh ání Péríkiba kawerue meqmeta móátáhtao úwe.

25 Móátáhtao éna Péríkine páhsi sehiranue mahraréna,

26 Péríkio, are anotah kawéq wáhnáh ání móne.

Íné Káróríúsa uge. Mó niwíqmé Árísíása uge.

Néne páhsi sáhnsahwe tagáhno.

27 Asiu kegá mah aní táhtoqme subítótaq we Aroma aníne urairana írátáuge. Írátáútaq ínéreq sóntiá kereqka pehbeheráh tueq tumetáune.*

28 Wega aneq ahbabárirapómo éna iranieéna sene kaunsíri kebá móátáráuge.

29 Segá seyene sánsánsabé ehweh atówana wega íre anotah ahbabárire. Mi ahbabáqmé íre suboráhi ahbabáq míre. Íre karábúsiipéq móatahráhi ahbabáq míre.

* **23:27:** Eqmaro 21.30-33, 22.25-27, 24.7 tagáhno.

30 Asiu kegá mah aní suboneheqmúne uro irena apubúue areba eqmaq áuwóge. Wensabé ehweh atáh kékabé areba pokue mi ehwéh koreawéro atóge úwe.

Páhsipéqté éhwéhnká aiq irarúwe.

31 Sene wahnahnka teriunserah sóntía kegá Pora meqmera inokáhpeq Ántípáti suwahpeq móátowé.

32 Mó wehekáh óseakáq kégá Pora meqmera Sésária suwahpeq pokuwe. Pokuwara mó sontiá kégá sene nahtapeq tuekuwe.

33 Tuekuwara óseakáq sóntiá kégá pokue Sésária suwahpeq kéra anotah wahnáh aní Péríkiba Pora móatera páhsikáq móátowé.

34 Móátowana wega páhsí sáhnsahena Poransabé, Are eheqte ánipo kasenúwana, Íné Sírisía marákórápéqté aní muge úwe.

35 Úwana, Arensabé ehweh atéhra ke túírataq arene ehweh iraníe úwe. Wega sóntía keyábé, Érotine anotah nahtápéq ateq mitaq wahnahnoro aritowe.

24

Asiu kegá Pora ehweh ató ehwehne.

1 Manikáne ehweh mibeq mahbeq arítáh kéné wahnah wenawíq Ánáníásie. Moberiáh wéhékáh parabagútaq wereq táhmaro Asiu kené aboawah wehreqka peh morá págegeue ehweh aritahráhi aní wenawíq Tétúra meqmera túwe. Segá Aroma kené anotah kamáhní aní Péríki Pora éhweh teawanehe úwe.

2 Péríkiga, Pora meqmeq sero úwara meqmera móátówe. Móátowana Tétúraga mahraréna, Péríkio, are anotah kawéq wáhnáh ání móne. Arega wahnahnónayabé ite Asiu ke pehwehrue mía míaorahúne. Arega kawerue iwíahónawe séhréh aitaníe é itene marakó kaweraitahne.

3 Minayabe itega iwíah íwíah ateq kaweróne atone úwe.

4 Tétúraga mó mahraréna, Áhnte ehwéh íre irarinie. Pehgáriq ehwéh teawiníboq iro.

5 Ite iwíahúnawe mah anímé ahbabáq aruqaruri aníne. Wega mah marákó mårákóípéq mó ke suwahpeq mó ke suwahperue Asiu keyábé pagu pagunurairara áhnte kegá tobehéra ebehowe. Wega itene sánsá suena Néhsara suwahpeqte áníné sánsá meyáh ké wahnahnire.

6 Wahnhahnéna wega Manikánsabe iwíah íwíah atáh náhtápéq íre kawerina uraitaq itega táhtotiaraune. Itene sánsá anterutainsabé ehweh ateq parabaruanehe íwíahuraune.

7 Iwíahuraunaraq itega Pora ehweh atanéhe urau-naraq sóntia kené wahnah wenáwíq Árísíásarehga tuera ite págegeue iubera Pora meqmera móbeq móátárówe. Árísíásaga itensabé, Pora ehweh atagéhboq anotah aní míehrabeq pokue mitaq ehweh atáhro uraire.

8 Moke ehweh atéhra ehwéhnsábé wewega teawinkéhboq kaseninanao úwe.

9 Úwara moke wereq su Asíú kégá wega irarú ehwéhnsábé kowe atera mi ehwéh aiq pútaq ehwéhne atówe.

Poraga Péríkinsabé we éhwéh teawu ehwehne.

10 Poraga ehwehninkeheéna anotah kamáhní áninká ayahnkaratáté saiqnówe. Saiqnówana Poraga wensabé, Itene marakórapeq arega áhnte opéq wahnahnurone. Mina tagaríónsábé pahsuqme teawiníe.

11 Ínéga Sarúsarama suwahpeq Manikánsabe iwíáh íwíáh atanieéna kowíaraugana peh airápétē téhtaré wéhékáh parabaguraire. Mó kegá mi ehwéh aiq pútaq ehwéhne teawigéhboq kaseninanao.

12 Mi ke suwahpeq íné íre ehwehéna mó ke íre pagu pagunurauge. Manikánsabe iwíáh íwíáh atáh náhúpéqkákáq Asiu kené momiwí nahtápéqkákáq mágpeqkakáq peh túbáh agurauge.

13 Segá ehweh aintáhnsábé íre sokigi aintahráhowe.

14 Pahsuqme teawiníboq írátiahno. Segá Sísane sánsámé íre suwahbeh puara áwáhnáh sánsáne ewe. Mi sansámé ínéga sehgiúge. Miraunsabé itereq itene igaqnaréhreqne Manikánsabe iwíáh íwíáh atóge. Mósísine ehwehnkakáq Manikáne ehweh iraru kené ehwehnkakáqsábé aiq pútare arítóge.

15 Mókake Manikánka moke pusa kewé kaweq kereq ahbabáq kereq iriritankéhe. Ehweh aintáh kereq ínereqka minayabe íwíáhue áwénunúne.

16 Íné kaweqtaq méyabe nuwahbehre. Manikánseq ómi wehukéreqsabé íné íre ahbabárarítónsábé nirupipeq eyoyóire úwe.

17 Poraga mó mahrrárena, Táhmaro opéq nahnsó kené marakórapeq ména nánuwrahraha seuwekurauge. Tabonah Asiu ke móne nárinieéna

seuwekéna Manikánsabe iwíáh iwíáhue nawinieéna
seuwekurauge.

18 Itega sosueq mirauraunaraq sega
Manikánsabe iwíáh iwíáh atáh náhtápéq ite
tagarowe. Íre áhnte ke ínéba míarowana
pehwehribeq míraugara

19 Esia marákórápéqté Asiu kegá tagarowe.
Tagarowana ínéga ahbabárurautaq tahirí sega
aneqsabé areba íre séra ehweh aintáh iripo?

20 Ínéga kaunsíri ke ehwéh teríátáugara areba
suro kegá írátíarowe. Ahbabárurautaq tahirí sega
teawé irino.

21 Se momiwíurorabeq peh morá éhwéh iraru-
raunsabé sega, Íné ahbabáruraire iwíáhurowamo.
Mi tanáhráq ínéga anotah ehwéhnue mahraréna,
Manikánka pusa ké iriritankéhe. Ínéga mira
iwíáhunsabé ibora itega ehweh aintáhwe urauge
úwe.

22 Úwana Péríkiga irena Sísansabé aiq pútare atáh
kéné sánsá ahtebonsabé, Pehitare aritowe. Pe-
hitare aritená sensabé, Anotah sontiá kéné wah-
nah aní Árísíásaga mahtaq tuinaraq itene koti
ehwéhnsabé iwíáhue teiníe úwe.

23 Teiníe éna wene kiápéténinsabé, Pora
kawerue wahnahnato. Pehwehrue wahnahnúno.
Wene iyahnabo animáráinká séhréh ataneheéra
ménsámeħnsánkakaq túírataq íre ahqáho arito úwe.

Pora téhtaré ópéq karábúsiipéq mío ehwéhne.

24 Táhmaro mó wehekáh parabagúwana Péríkiga
wene ahre wenáwíq Tárúsíra meqmena súwe.
Wene ahre Asiu iní míowe. Wega, Pora meqme

súno atowana móatowana Poraga Sísansabé aiq pútare ate ehwéh teriuwe.

²⁵ Poraga kaweqtaq méyabewé tabasíwe méyabewé Manikánka mókake ómi kehinánsábé ehwéh aritahnayabéwé irarúwe. Irarútaq Péríkiga áhre agéna mahraréna, Pehitare. Amahnága pokúno. Mókake ahwimi íre kahnaraq mó áhrabinie úwe.

²⁶ Péríkiga iwíáhéra, Pugeq auwahnana Poraga móne náninabomo íwíáhúwe. Mira íwíáhúnsabé wega mó wehekáh mó wehekáhnue Pora meqme súno atowana Pora weba súwe. Wereq Porareqka ehwehnaruqaruruye.

²⁷ Asiu kegá wensabé kaweróne atageheéna Péríkiga Pora íre pugeq auwowana peh téhtaré ópéq karábúsiipéq míowe. Mi tanáhráq parabagúwana mó anínká Péríkine wahnah árámbéhrí meyowe. Mi aní wenáwíqtare Pósíúsa Pésatae.

25

Poraga, Anotah wahnáh ání Sísáhriba pokinie ú ehwehne.

¹ Pésátaga Sésária su wahpeq wahnahné árámbéhrí awaq mianieéna mitaq súwe. Apahtáróráq mitaq ména suena Sarúsarama su wahpeq pokúwe.

² Mibeqté Manikáne ehwéh mibeq mahbeq arítah kéné wahnahnseq mó anotah Asiu kereqka Pésata Poraga ahbabarurai ehwéh teawúwe.

³ Segá moráénéwéra, Pora subonéhboq ahtapeq mehwaranéhe íwíáhuwe. Mira íwíáhunsabé sega

Pésátansabé, Pora mahtaq Sarúsarama suwahpeq ehweh atanéhboq meqmeq sero arito uwe.

⁴ Uwana Pésátaga sensabé, Pora Sésária suwahpeq karábúsiipéq míéhre. Mibeq áhníbórá pokinie.

⁵ Minayabe ite miónarabeqte anotah kegá séniragéhe. We ahbabáq kahnaraq mitaq ehweh atagéhe úwe.

⁶ Wega sensuwahpeq abapete apahtáró wéhékáhpópoq nayáhnkú wéhékáhpópoq mitaq ména suena Sésária suwahpeq pokúwe. Pokéra mó wehekáh wega wahnahnúrabeqte náhúpéq tútuue ména, Pora koweqme sero aritowe.

⁷ Poraga sútaq Sarúsarama suwahpeqte su Asiú kegá seabugéqnáhnue iriwe míowe. Iriwe méra, Wega mira ahbabárire éra áhnte ehwéh atówe. Sene ehwehme aiq pútaq ehwéh íre sokigi aweráhuwe.

⁸ Ehweh atówana Poraga mahraréna, Mósísiga sehgóro ú ehwehnkákáq Manikánsabe iwiáh iwiáh atáh náhtápéqkákáq íre ahbabárarítaráuge. Itene anotah wahnáh Sísáhri moq íre ahbabárataráuge úwe.

⁹ Úwana Pésátaga Poransabé, Asiu kegá ehweh aintagéhboq Sarúsarama suwahpeq ínéreq arereq pokéyabe awahbehro úwe. Pésátaga Asiu kené sirupipeq eyoyó aritanieéna mi ehwéh irarúwe.

¹⁰ Úwana Poraga wensabé, Ahqáho. Íné Asiu keyábé íre ahbabárarítaráume tagariahne. Minayabe ite Aroma kené anotah wahnáhné koti arítáh náhtápéq míóge. Mahtaq ehweh parabaru.

¹¹ Íné pukorahu sansá íre miraurauge. Miraurautaq tahirímé íné nubiq suo teawú irino. Segá ehweh aintáhmé íre aiq pútarowe. Minayabe arega

íné Asiu kebá íre móintahráhóne. Aroma wahnáh ání Sísáhri íné éhwēh teawenana wewega iwíáhue tagankehe úwe.

12 Úwara Pésátareq weba mía míau ahtébiá kéréqka sóo sóéra iwíáhuwe. Pésátaga Poransabé, Sísáhri íné éhwēh teawenana iwíáhue tagankehe énayabé weba pokinkehe úwe.

Ágárípaga Pora éhwēh iro ehwéhne.

13 Táhmaro mó wehekáh parabagútaq mó marákórápéqté wáhnáh ánínseq wenanahnoreqka Sésária suwahpeq suye. Wahnah aní wenawíq Ágárípae. Anahnowá áwíq Pénáísie. Sega Pésáta mehwēh atayeheéra suye.

14 Sega táhmaro wehekáh weba míoyana Pésátaga Pora éhwēh Ágárípa teawuwe. Teawena Ágárípansabe mahraréna, Péríkine arambehri merautaq wehukení karábúsiipéq míaraire.

15 Íné Sarúsarama suwahpeq míarautaq Manikáne ehwēh mibeq mahbeq arítáh kéné wahnahmarínseq Asiu abóawáh wéhreqka we éhwēh teniátówe. Teniera mahraréra, Itega we naho aiq ehwēh ataráúnayabé itene ehwēh iro. We subiq suo teniátówe.

16 Teniátówana ínéga ahqáho aritená sensabé, Ite Aroma kegá wehuke pehipi íre subiq suahráhúne. Ebeqme we ehwēh átah ké míáhrabeq wene ahbabáqsabe ehwehninkehe urauge.

17 Asiu kegá we ehwēh ataneheéra ínéba tutotaq íné íre túbáh agurauge. Mó wehekáhtáq mi ehwéh iranieéna wahnahnuraurbabeqte náhúpéq tútuue

ména, Pora koweqme sero arítáráugara koweqme surove.

¹⁸ Wega aneq ahkárágárá urairo íwíáhuraugara wensabé ehweh atáró kegá irigéra íre mi ehwéhnia peh mó ehwéh irare atárówe.

¹⁹ Peh seyene sánsánsábé ehwehurowe. Poraga, Putiarai aní wenawíq Sísa oga míéhre urainsabé wereq sereq ehwehuwe.

²⁰ Mi ehwéhmé íre niahteboge. Aneq ehwéhpómo? Árahue kaweraritaníkono íwíáhurauge. Iwíáhuraunsabé ínéga Pora kasenéna, Sarúsarama su wahapeq pokue mitaq mah ehwéh kobarabaruanéhkono urauge.

²¹ Uraugana Poraga, Ahqáho. Aroma wahnáh aní Sísáhri íné ehweh teawenana wega iwíáhue tagéna teinkéhe uraire. Urainsabé, Ínéga eqmaq auwahráhonaraq Sísáhriba pokinkehe. Amahnága karábúsiipéq míahno atáráuge úwe.

²² Úwana Ágárípaga Pésátansabé, Ínénéga mi aníné ehweh iraníe úwana, Ahbiah arega irankéhe úwe.

²³ Mó wehekáh Ágárípareq wenanahno Pénáísireqka wahnah anité táhnsá siwahriruera suye. Sereq sóntía kené wahnahnseq anotah wehwárínseqka momiwí nahtápéq kibekuwe. Kibekuwana Pésátaga, Pora koweqme sero úwana koweqme suwe.

²⁴ Pésátaga mahrraréna, Ágárípareq ómi itereq momiwíúna kerero, mah aní tagahro. Moke Asiu kegá Sarúsarama su wahapeqkakáq mahtaqkákáq mah anínsábé teni teninurowe. Sega ínénsabe, Mi aní anotah ahbábáq aní púaq subiq suo ato éra pagu pagunaintárówe.

25 Ínéga we kasenue tagéna pukorahi ahbabáq íre tagarauge. Wega, Aroma wahnáh ání Sísáhri íné éhwéh teawenana wewega iwiáhue tagankehe uraire. Urainsabé ínéga weba eqmaraníe iwiáhurauge.

26 Mah anínsábé kasenue tagéna wene ahbabáq íre tagaraunsabé Sísáhrinsabé aneq ehwéh páhsipéq sehiranue teawinínkono? Minayabe wene ehwéh irageheéna iteba móátóge. Ágárípao, wene ehwéh iro. Itene anotah wahnáh Sísáhri wene ahbabáqsabe páhsí sehiraniniboq itega mah ání kasenoro.

27 Karábúsiipéqté ání mó wahnáh ánípá pehipi eqmaq áuwéhnayabé íre kaweq sansáne. Minayabe wene ahbabáqmari sehiraninie úwe.

26

Poraga we éhwéh Ágárípa teawu ehwehne.

1 Ágárípaga Poransabé, Are éhwéh teio úwe. Úwana Poraga ayah pankeqme mahraréna,

2 Ágárípao, are anotah wahnáh ání móne. Íné éhwéh teawenayabé nirupipeq eyoyóire. Asiu kegá áhnte ehwéh aintárónsabé amahnága tábúsoqme teawiníe.

3 Arega moke Asiu kené sánsánkákáq sene ehwehnkakáq aiq ahtebáhne. Minayabe arega néne ehwéh irahnayabé nirupipeq eyoyóire. Kauerue iwiáhinkehboq pehwehrue mé iro úwe.

4 Poraga mó mahraréna, Ómi Asiu kegá Sarúsarama su wahpeq miraurau sansá tagaríahwe. Íné animai míáhwataq nánuwahrah míórabeq miraowa sansá tagaríahwe.

5 Péhrasi kegá mirau sansá anotah pagégé sánsáne. Íné Péhrasi aní ména mi sansá kawerue miraurauge. Minayabe Asiu kegá tagariáhwe. Mi ehwéh teaweyabe suwahbehtaq tahirímé sega aiq teawé irino.

6 Naho naho Manikánka itene igaqnaréhyabe áhnte kawéq éhwéh teriuwe. Ínéga mi ehwéhnsábé aiq pútare atóge. Aiq pútare atena áwénunuraunsábé mó kegá ehweh aintárówana amahnága mahtaq míóge.

7 Airápété téhtaré iteruwahrah kahnáhnká inokáhpeqkakáq wéhékáhnkakáq Manikánsabe iwíáh íwíáh atáhwe. Segá kawerue iwíáh íwíáh atera, Manikánka omasa éhwéh sehginawire éra áwénunuwe. Ínéga moq miraue áwénururauge. Minayabe Asiu kegá ehweh aintárówe.

8 Manikánka pusa ké iriritéhnsábé aneqsabé íre aiq pútare ataho úwe.

9 Poraga mó mahraréna, Ínéga menah Sísá, Néhsara suwahpeqte ánínsábé aiq pútare atáh ké síwíoqnanauge íwíáhurauge.

10 Iwíáhéné Sarúsarama suwahpeqte Sísá tagariáh ké síwíoqnarauge. Manikáne ehweh mibeq mahbeq arítáh kéné wahnah kegá, Miraúno aintárówana Sísá tagáriáh ké karábúsiipéq sitaráuge. Se subiq suanéhe íwíáhurowana miraoro arítáráuge.

11 Sísá tagariáh kégá sene sánsá suera Sísansabé íre kaweq ehwéh atageheéna ínéga moke Asiu kené momiwí nahmárítápéq anotahtaq kamah ariena síwíoqnarauge. Anotah abiáhnsá aritena wáhnaupéqté ké suwahpeqkakáq pokue síwíoqnarauge úwe.

*Poraga Sísa tagó ehweh Ágárípa teawu ehwéhne.
(Eqmaro 9.3-19, 22.6-16)*

12 Poraga mó mahraréna, Ínéga mirauraunsabé Támákása suwahpeq pokinie íwíáhurauge. Iwíáhuraugara Manikáne ehweh mibeq mahbeq arítáh kéné wahnah anímárínká, Kaweróne éra, Komiraúno aintárówe. Komiraúno aintárówana ah-tapeq pokurauge.

13 Pokuraugana wéhékáhnabubu íopeqté anotah-taq téhraguraire. Mi tehrehme pópoqnah kiotaqme téhrarairana tagarauge. Ínéreq ahtapeq sénító kerek míaraunarabeq téhraguraire.

14 Anotah téhraguraitaq moke itega marakóipeq márunsurahuraune. Íbaru ehwéh, Asiu kené ehwehnka iraréna, Sorao, Sorao, aneqsabé níwíoqnahno? Kirusa séhíkárátáq are peraq míáhnana érinserah amahnága arere érire uraire.

15 Urairana ínéga, Anotah aníno, are insebo uraugana wega, Íné Sísa arega níwíoqnáhna anímúge.

16 Iriwe míahno. Arega néne arambehri mirainkeheéna areba tuena omaq atóge. Amahnága tagáhna naneqkakáq mókake sokigi awéna naneqkakáq teri terininkehe.

17 Nahnso kebá eqmaraníe. Mókake ínéga are séhréh atáhnaraq sereq Asiu kereqka íre subiq suagéhe.

18 Nahnso kegá sirupipeqté síúrá ebiqme tagéra sunkíkírirabeqte sánsá suera téhrehrabeqte sánsá miraigehboq kosíwáhnorúno. Owainawane págege sansá suera Manikáne ahtapeq nogigéhboq kosíwáhnorúno. Segá arene ehweh íréhrataqmé

sene ahbabáq kaweraritaníe. Kaweraritená sensabé, Ite ínénasabe aiq pútare aintáh púana ínéga omaq itó ánímári míáhwé aitaníe urairana írátáuge úwe.

Poraga Ágáripa wene arambehriyabé teawu ehwéhne.

19 Poraga mó mahraréna, Ágáripao, are anotah wahnáh ání míahna puah néne ehwéh iro. Sísaga íópeqté teniátái ehwéh íre anterúóge. Írakaumo.

20 Téhwe Támákása suwahpeq síwáhnorurauge. Síwáhnoréna mitaqté kékabé, Itene ahbabáq sansa sueq Manikánsabe áhraboro. Áhrabirataq mó ahbabáq pehragéq peh kaweqtaq méq wene arambehri miraoro. Mirairataq mó kegá itene ahbabáq sansa aiq pútaq sutowe íwíáhigehe urauge. Anehémé Sarúsarama suwahpeqkakáq moke Súria marákórápéqkakáq naruo ke míarorabeqkakáq mah ehwéh síwáhnorurauge.

21 Mah ehwéh síwáhnoruraunsabé Asiu kegá Manikánsabe íwíáh íwíáh atáh náhtápéq íné tagéra táhtoqme, Subiq suanéhe íwíáhurowe.

22 Manikánka menahnkákáq amahnágaákáq aiq séhréh aintéhre. Séhréh aintéh púana iriwe ména anotah kereq íre síwíqkakaq kereqsabé ehwéh teiúge. Manikáne ehwéh iraru kereq Mósísireqka iraru ehwéhmé teiúge. Ínéga mó ehwéh íre teiasa peh mi ehwéh teiúge.

23 Segá mahraréra,
Mókakewe Manikánka omaq ato aní, ite meirena kaweraitéh ani anotah erínana pukinkehe. Pukéna pusa ké míáhrarabeqte ebeq iriginkehe. Wega irigena Asiu kereq

nahnso kereq téhrorahi ehwéh terinkéhe
uwe. *(Aisaia 42.6, 49.6)*

Mó ehwéh íre teiasa peh mi ehwéh teiúge úwe.

Poraga Ágárípansabé, Aiq pútare ato ú ehwehne.

24 Pésátaga Porane ehweh saiqnaruena anotah ehwéhnána, wensabé, Porao, are múguwahgu aní úkurone. Áhnte sehirania pükú sáhnsah sáhnsahuronaga múguwahgu aní úkurone úwe.

25 Úwana Poraga wensabé, Pésátao, are anotah wahnáh aní móne. Íné íre múguwahgu aní ména peh aiq pútariahnsanuge. Íre pehipi irarúge. Peh tábúsoqme iwíáhéra iraruge.

26 Ínéga teiú éhwéhmé Ágárípaga tagariéh púana wensabé pahsuqme teawúge. Sísaga mirauraime íre epéráhpéria peh wehuke míaropi miraurai puana Ágárípaga aiq moke írátiéhre.

27 Ágárípao, arega Manikáne ehweh iraru kené ehweh aiq pútare aritahno? Íné tagaríómé arega aiq pútare aritahne úwe.

28 Úwana Ágárípaga Poransabé, Arega tenienayabé ínéga mótaq Sísa kéranié íwíáhono úwe.

29 Úwana Poraga wensabé, Mótaqpópoq mókakebopoq íné íre tagarióge. Íre arebataq ómi amahnága néne ehweh íráh kékabé nirutaboirarítóge. Ite ómi íné tahnsa aní úkigeheéna púreraitóge. Íre íné tahnsa karábúsiipéq míageheéna peh Sísansabé aiq pútare atageheéna púreraitóge úwe.

30 Úwara Ágárípareh Pésátareh Pénáísireh sereq tútuue míó kereqka irigue

31 máhpeq tueyokuwe. Tueyokéra sebataq ehwehnéra, Mi anínká pukorahi ahbábáq íre mirauraire. Wega karábúsiipéq mía míaorahi ahbábáq íre mirauraire uwe.

32 Ágárípaga Pésátansabé, Mi anínká, Aroma wahnáh ání Sísáhriga íné éhwéh iranawire íre iraruraitaq tahirímé soraq auwo ató irino úwe.

27

Pora Aroma suwahpeq pokinkeheéra sípiipéq móató éhwéhne.

1 Pora Ítari marákórápéq eqmarankeheéra sega wereq mó karábúsiipéq míó kereq wehukení wenawíq Súriásaba mórítówe. Súriásawe we sóntia kené kiápéténi ména 100 sontiá ké wahnahnéna anotah wahnáh ání Sísáhrine arambehri aní míowé.

2 Áramítíámi suwahpeqte sípígá mó ke suwahpeq mó ke suwahperue Esia marákórápéq pokinaútaq Súriásaga Porareq mó karábúsiipéqté kereq sípiipéq mórítówe. Mó aní wenawíq Árísátáki sípiipéq míowe. We Tésárónáika suwahpeq Másérónía marákórápéqté áníne. Itega sípi kewewe pokowane.*

3 Pokéq mó wehekáh Sáírona suwahpeq sewane. Súriásaga Pora kaweratena wensabé, Arega mah-taq sewiéhnaraq arene iyahnaboga kirabo atagéhe úwe.

4 Mó wehekáh itega sípi kewewe pokowane. Iuranabiahtapeq anotah soirírúnsabe marakó áwíq Sáípára ogehpeqtáq sótaikowane.

* **27:2:** Árúka mah pahsí sehiranú aní moq mi sipíipéq kiwíowe.

5 Sótaikéq Sírisía marákórápéqkákáq Pámbíría marákórápéqkákáq anotah wanítábá sótaikéq Árísía marákórápéq Máíra suwahpeq kowane.

6 Sóntia kené kíápéténiga mitaq mó sipí Ítári marákórápéq pokína sipí kabaruwe. Kabaréna wega Árekásántaría suwahpeqte sípí Ítári marákórápéq pokína sipí ábóraq marena ite meiqmena sípiipéq móitowe.

7 Mitaq sípi kewewe q anotah soirírúnsabe táhmaro wehekáh pehwehrue pokowane. Pehwehrue kúwaq itega Níra suwahpeq kótaikowane. Mitaq anotah soirírúnsabe itega obariqme íre korahowane. Itega Sárámóni marákórápéq kótaikéq Kíriti marákórápéqté áyéhrápéq kótaikéq mi marákó ogehpeq kowanæ.

8 Sípiwarí segagairabeq áwíq Kaweqtapére. Mitaq Áráséa suwahpeq wahtotare. Sípiipéq pehwehrue mitaq kowane.

9 Anotah soirírúnsabe koyabo seyabonue áhnte wehekáh sótaikúwe. Ópeq tanáhráq súwana anotah soirírúnsabe wáninka áhnte nonaburóróúwe. Minayabe Poraga sensabé,

10 Sípiakáq itenkakáq wáninkoneho. Íné iwíáhumé pokonaraq íre peh sípiakáq kahgoakáq ite moq wáninkoneheqmúne úwe.

11 Úwana sóntia kené kíápéténiga Porane ehweh íre irena peh sípi soberú anínseq sípi abowáreqne ehweh irowe.

12 Sipwarí segagairabeq ópeq tanáhráq méyabe íre kaweqtapéq púara áhnte kegá, Sípi kewewe q pokoneheqmúne uwe. Kíriti marákórápéq mó sipí kagairabeq áwíq Píníkie. Segá iwíáhéra, Píníkiwe

íre anotah soiríri marákóe. Minayabe sípi keweweq pokue ópeq tanáhráq mitaq kowíanehe uwe.

Anotah soirírúnsabe wáninka anotah nonaburóróúwe.

¹³ Pehgáriq soirírúnsabe sega iwíáhéra, Aiq kawerire íwíáhuwaq sípi keweweq Kíriti marákórápéqté áyéhrápéq wahtotaq pokowane.

¹⁴ Pokowanana marakóipeqté anotah soiríqká paentowe.

¹⁵ Anotah soirírúnsabe sípi sóirirúrabeq íre korahúwe. Íre korahúnsabe sípi soberú anínká sípi kékabonkúwana sóiriqka anehepeq pagume meqmena kúwe.

¹⁶ Itega Káúra marákó sótaikowanaraq pehgáriq sípi abariue pankeqme sípirapéq marahwáne. Anotah soirírú púana mi arámbéhrí anotah pagégé árámbéhríe.

¹⁷ Sípi pitegíneho éra págege nahgáqtáté ákáhnabubu táchru táchruuwe. Ápáríka marákórág sóiriqka sípi paentáwena arahwéraq móitehneho éra sega séri pugeq súówana sípiga pehipi pokúwe.

¹⁸ Mó wehekáh peh anotah soirírúwana sípi umehúnsabe wáninkíneho éra sega kahgowarí mewe wánípipeq súówe.

¹⁹ Súówana mó wehekáh móñkakáq anotah soirírúwara mó wehekáh anotahtaq áhreu puara sípi soberé mensáméhnsámári mewe wánípipeq súówe.

²⁰ Áhnte wehekáh íónkakaq pópoqnahakáq wehyoqkakáq íre ábóraq kowana peh anotah ibónsúwana sóirirúwe. Minayabe sega wáninkoneheqmúne íwíáhuwe.

²¹ Wánínkoneheqmúne íwíáhéra áhnte wehekáh táchutahuq awehriuwana. Awehriuwana Poraga se míórabeq séna sensabé mahraréna, Wehukeo, néne ehweh ireq Kíriti marákórápéq íre súótaq tahirímé sípiipéqté ménsáméhnsá peh kék irino.

²² Amahnága íre áhreoro. Moke itega íre pukone-heqmúne. Peh morá sípi airaiq piteginawire.

²³ Íné Manikáne aní ména wensabé iwíáh íwíáhata atauge. Inokáhpeq wene íópeqté áninká ínéba iriwe ména

²⁴ mahrarue teniena, Porao, íre áhreúno. Aroma kené wahnah Sísáhriga arene ehweh irankéhboq weba pokiniewón. Minayabe Manikánka arereq moke sípiipéq míáh kéreq amahnága íre pukia peh oga míáhro aitéhre.

²⁵ Manikánka tení éhwéhnsábé aiq pútare atóge. Wega teninsábé aiq pútaraginawire íwíáhuge. Minayabe íre áhreoro.

²⁶ Peh morá sóiriqka paentáwe sípi marakóipeq surahue piteginkehe úwe.

²⁷ Inokáhpeq 14 wehekáh parabagútaq anotah soiriqká íre parabagia peh sípi anotah soréq wání áwíq Mérítérénia paentowe. Paentowara inokáhnabubu sípiipéq arambehrio kegá, Marakó peh wahtotare íwíáhuwe.

²⁸ Iwíáhéra sega náhgáqtate wání agehga marówana peh ákáhtaq wahtótáq 40 míta kowe. Konsabe sípiga mó kúwara sega mótaq mó agehga marówana peh wahtotaq 30 míta agúwe.

²⁹ Peh wahtotaq agú púara sípi marakóipeqté ébáhmári paentáwe súnsabe pitegineho éra áhrewe. Áhreéra itaréitaré náhgáqtáq áhéni sarira mewe wánípipeq márówe. Mi ahénigá wánípipeq

tuegáwagiwe ambubu aginkeheéra inokáhpeq sípi
anehepeqte tuparúówe. Tuparuera apubúue
ahyahbikerankeheéra púreruwe.

30 Sípiipéq arambehriu kegá seye náhenéra, Maha-
taq pukonehboq sípiakáq karábúsi keákáq sueq
káriq sipí kewewe marakóipeq pokoneheqmúne
uwe. Mira íwíáhunsabé sega mó ke péhe éhwéh
teriera, Itega mó ahéní sípi abiahtapeq sariwe
tuparuanéhe uwe. Tuparuanéhe éra káriq sipí
wánípipeq márumárówe. Mi karíq sipí kewewera
pokonehe éra márumárówe.

31 Márumárótaq Poraga sóntía kené kiápéténireq
wene sóntía kereqsabé, Sípiipéq arambehriu kegá
ite iuwera pokirataq wáníkoneheqmóe úwe.

32 Úwara sóntía kegá káriq sipí táhraró nahniáq ki-
raq súówana mi sipí sóreq wanítáq márunsurahéna
pehipi pokúwe.

33 Ahyahbinkiranotaq Poraga ómi míó keyabé,
Táhutahuq nahro éna pagu pagunéna sensabé, Itega
téhtaré wíkí iwíáh kikiréq táhutahuq íre narutówe.

34 Irupi pukiyehboq amahnága nahro. Ite
íre wáníkoneheqmúne. Peh ite ómi áhkórapeq
kéagorahúne úwe.

35 Mi ehwéh iraréna se tagotaq táhutahuq
mewena Manikánsabe kaweróne atena keqme
nówe.

36 Keqme nówara sirupipeq moke eyoyóéra
táhutahuq nowe.

37 Peh íregáritaq 276 wehuké mi sipíípéq
míahwane.

38 Se táhutahuq nowana siyahbankirowara sípi
umehínego éra moke tahutáhúq wánípipeq súówe.

Sípi pitegú ehwehne.

39 Ahbiahipeq marakó ábóraq kowara sípiipéq arambehriu kegá tagéra eheqte marákóbo iwiáhuwe. Iwiáhéra kaweq arahwé tagéra sípi korahonaraq mitaq kowíanehe iwiáhuwe.

40 Mira iwiáhunsabé sega áhení nahniáq kiraqme sóreq wanípípéq súowe. Sípi soberinkeheéra sega soberé kara pugeq súowe. Sóriqka sípi paentáwe áhnopeq méitankeheéra sega séri pankeqmárówe.

41 Moke mirau puana sípiga peheráh kéna wánípipeqté arahwéraq móbegue kowíowe. Arahwéraq móbegúnsabe íre pokorahúwana anehepeq wánínka mésubiqmaq subiqmarúwe. Mésubiqmaq subiqmarúnsabe sípi piteginaúwe.

42 Sontía kegá iwiáhéra, Karábusi kegá wánípipeq súbímiue áhkórapeq keague taqnobagiyeho éq amahnága se subiq suanehe iwiáhuwe.

43 Iwiáhuwana sene kiápéténiga, Pora subiq súého iwiáhéra ahqáho aritowe. Wega wánípipeq súbími tagaríah kékabé, Ebeqme itega wánípipeq ahkuague súwímiue áhkórapeq pokoro.

44 Anehe mó kegá sípi pitegia áyéhráqpópoq abaraqpópoq táhtoqme áhkórapeq kékagigehe úwe. Úwaq itega moke wega teiunserahnue kaweqtaq áhkórapeq kékagowane.

28

Wehenka Pora pó ehwehne.

1 Áhkórapeq kowéq mi marákó áwíq Máratae irahwáne.

2 Mibeqté kegá ite mehwéh aitera kaweraitówe. Ibonsúwana titirúnsabe sega ira pariówe.

3 Poraga irawarí kosiqme sesiqmeue ira pariowe. Ira pariotaq osoronsabe mipi mío wehenká ira kunkúnuwana tueyokéna Porane ayahnkara pówe.

4 Wehenka wene ayah péna pahtiwara mibeqté kégá tagéra seye náhenéra, Mi anímé wehuke subiq suo anípómo. Íre wáninkinsabé we ahbabáq ani púana amahnága pukinkehe uwe.

5 Uwana wene ayahnkara kóbíq kóbirúwana wehenka iraipéq megúwana Pora peh míowe.

6 Peh míowara sega áwénunéra iwíáhéra, Wene ayahnkara muinabomo. Aunúnkaq márunsurahéna pukinabirapómo íwíáhuwe. Íre wahto tanáhráq áwénunuwana sene iwíáh íre aiq pútaragúnsabe sega mó iwíáhéra, We manikápómo íwíáhuwe.

Awahre koré kaweragú ehwehne.

7 Mi marákórápéqté wáhnáh ání wenáwíq Púbíúsae. Mitaq wene marakó wahtotare. Wega ite mehweh aintena wene nahtapeq apahtáróráq kawerue kirabo aitowe.

8 Wenabo osorosorú awahrééna puriq puriqkakarúwe. Awahreúwana Poraga weba séna púreréna wene ayahnkaratáté táhtorowana kaweragúwe.

9 Kaweragúwara moke mi marákórápéqté kégá minayabe írówara moke awahre kegá Poraba suwana púreraritowana kaweragúwe.

10 Mibeqté kégá ménsámehnsá pehipi nái náinuwe. Itega mi marákóráq apahtáró ió méq suanehe owanaraq moke iuwahbeh naneq ménsáméhnsá sípiipéq sáharageheéra náíúwe.

Poraga Aroma suwahpeq pokú ehwehne.

11 Árékásántaría suwahpeqte sípí ópeq tanáhráq mitaq sípi kagairabeq kowe. Sípi abiahtapeq se ábárahrené siyahqno tahnsa náneq píkisah kowe. Mi abaráhréwé péhe mániká áwíq Súsine ahnínkawárárée. Apahtáró ío itega mi marákóipéq méq mi sípí kewewe q pokowane.

12 Mó marákórápéq pokue Sírákíúsa suwahpeq apahtáróráq kowíahwane.

13 Mitaq sueq sípi kewewe q pokue Árégíúma suwahpeq pokowane. Mó wehekáh sípi anehepeqte sóírírúnsabe mitaq sueq apahtáróráq sípiipéq Pútéóri suwahpeq kowíahwane.

14 Mitaq Sísa tagariáh ké méra, Iteba kaegaeoro unsabe abapete téhtaréráq seba kowíahwane. Mitaq sueq ahtapeq pokue Aroma suwahpeq konehe íwíáhowane.

15 Aroma suwahpeqte Sísa tagariáh kégá, Porarehga áhníbórá seneherawoe u ehwéh irera táhmaro kega ahtapeq sure máhkétirapéq áwíq Ápíúsa séra mitaq íwénunuwe. Mitaq kaegaeo nah apahtáró korabeq íwénunuwe. Poraga sutaq se tagéna wene arupipeq eyoyóéna Manikánsabe iwiáh íwíáh atowe.

16 Itega Aroma suwahpeq kowíahwanaraq sega Pora íre karábúsiipéq móatera peh wewene nhatapeq móátowe. Wereq peh morá we wahnahnu sontiá ánínseqka kaegaeuye.

Poraga Aroma ke kawe q ehwéh teriu ehwéhne.

17 Wega mitaq ména apahtáróráq mibeqté Asiu kené wahnah keyábé síáhrabúwara suwe. Weba suwana sensabé, Nánuwahraho, Asiu ke

íre ahbabáq arítáráuge. Iteriborehne sansá íre anterutauge. Se íre ahbabárarítáráugarawé Sarúsarama suwahpeqte Asiu kegá íné táhtoqme Aroma kebá móíntárówe.

¹⁸ Aroma kegá néne ahbabáqsabe kabaréra kase-naintárówe. Kasenaintera se ahtebome íné íre pukorahi ahbabáruraunsabé sega, Soraq auwanéhe urowe.

¹⁹ Soraq auwanéhe urowara Asiu kegá anotah ahqáho arítárówe. Anotah ahqáho arítárónsabé ínéga mahraréna, Aroma wahnáh ání Sísáhri íné éhwéh teawenana iwíáhue tagéna teinkéhe urauge. Minayabe surauge. Séna nánuwahrah Asiú kékéyábe ehwéh aritanieéna íre surauge.

²⁰ Ite tagéna mah ehwéh teinieéna íáhrabuge. Marakóipeq tuina anímé ite Asiu kegá áwénunona anímé wensabé aiq pútare atóge. Minayabe karábúsiipéq míóge úwe.

²¹ Úwara sega wensabé, Súría marákórápéqté kegá are éhwéh pahsí íre sehiranue íátówe. Mahtaq suro Asiu kegá arega ahbabárire íre teiátówe.

²² Mah marákó mårákórápéqté kegá Sísane sásá íre kaweq sansáne tei teinurowe. Minayabe arega teiena ehwéh iraneheqmúne uwe.

²³ Seyega iwíáhu wehekáh Porane nahtapeq áhnte kegá weba suwe. Suwana wega moke mi wehekáh Manikánka wahnah wahnahnirabeqte éhwéh teriuwe. Segá Sísá éhwéh irageheeéna wega Mósísiga sehgióro ú ehwehnkákáq Manikáne ehwéh iraru kené sehirankakaq sáhnsahwe síwáhnorúwe.

²⁴ Síwáhnorúwara táhmaro író kega wene ehwehnsabé aiq pútare atówara mó kegá íre aiq

pútare atówe.

²⁵ Segá íre peh morá iwíáhuwana pokonehera utaq Poraga mahraréna, Manikáne Awanka wene ehweh irarú ani wenáwíq Áísáía iwíáh atowana wega itene igaqnaréhyabe mahraréna,

²⁶ Mah ke korerio. Korerie, Itene iahrega áhnte tanáhráq ireqmé íre kawerue iahtebahwe. Itene iuranka áhnte tanáhráq tagéqmé íre kawerue iahtebahwe korerio.

²⁷ Sene iwíáh págege agirara sene siahrrerate ireyabe suwahrieh puara sene siahre parokirara sene siura aiq pigire. Segá ireyabe íre suwahriehtaq tahirímé sene siahre iréra siura tagéra kawerue siahtebah irino. Iahtebahtaq tahirímé ínéba surowana kawerarító irino. Íné Manikánka aiq iraruge úwe teriuwe. *(Aisaia 6.9-10)*

²⁸ Poraga Áísáíane ehweh teriena mó mahraréna, Ite mina tahnsano puana Manikáne Awanka iwíáh ato ehwéhnká aiq pútaragire. Minayabe Manikánka Sísansabé aiq pútare atáh ké kawerarite ehwéh nahnsó ke korerio aintéhre. Nahnsó kegá kawerue iratiagehe. Minayabe ahtebahro úwe.

²⁹ Poraga Aroma su wahpeqte Asiu ke mi ehwéh aiq teriuwe. Teriuwara Asiu kegá seye ehwehéra pokuwe.

³⁰ Poraga mitaq téhtaré ópéq ména wewega mó iotáq mó iotárue paiqma paiqmaru nahtápéq míowe. Wene nahtapeq su keyábé kawerue mehwéh aritena

³¹ Manikánka wahnahni ehwéh teri terinúwe. Teriena itene Wahnah Sísa Karáhé éhweh

Eqmaro Ke 28:31

cxl

Eqmaro Ke 28:31

pahsuqme síwáhnorúwe. Síwáhnorúnsabe Aroma
wahnáh kégá íre ahqáho atówe.

**Manikáne O Ehwehne
God's New Talk: The New Testament in the Awa
Language of Papua New Guinea
Nupela Testamen long tokples Awa long Niugini**

copyright © 1974, 1997 Wycliffe Bible Translators, Inc.

® Faith Comes by Hearing

Language: Awa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 28 Dec 2024 from source files dated 31 Aug 2023

9673cf68-887a-574e-9ac8-846469c86b12